



महात्मा पं० कृष्ण जू राजदान सुन्द वॉनमुत

शिवु लँगुन

Book donated for
ASHRATA LIBRARY





Book Donated for
ASHRAM LIBRARY

महात्मा पं० कृष्ण जू राजदान सुन्द वौनमुत

शिवु लँगुन

Book Donated for
ASHRAM LIBRARY

संपादक :

श्याम लाल राजदान

प्रकाशक :

ललिता स्टोर्स, दुकान नं० १३
राम दरबार मंदिर, शास्त्री नगर, नई बस्ती
जम्मू तवी १८०००४

महात्मा पं० कृष्ण जू राजदान सुन्द वोनमुत

शिवुँ लगुँन

ग्वडन्युक संस्करण १९९८ ५०० कापी

सजिल्द म्वल : ५० र्वपयुँ
४१-५०

आवरण : शंकराचार्य मंदर,
श्रीनगर, कश्मीर

नोट :
सोरिय अधिकार छि रँछरिथ थावुँ आमुँत्य

Typeset and Printed at Rekha Printers Pvt. Ltd., New Delhi-110 020

परनुं खातरुं इशारुं

देवनागरी लिपि हुँजव मात्रायव अलावुं यिमुं मात्रायि केहं खास
कोशिरि आवाजुं प्रकटावनुं बापत यथ किताबि मंज लगावनुं छे
आमचुं, तिम छे यिथुं पाठ्य :-

अ : अछ (आंख), मेछ (मखी), लैर (मकान)

आ : आठ (आठ), होल (आदत), वांस (आयु)

उ : जुं (दो), सुह (शेर), बुं (मैं)

ऊ : सूत्य (साथ), तूर (ठंड), कूत्य (कितने)

ऋ : छैट्य (जूठे), फेक्य (कंधे), लेज (हांडी)

ॠ : नोट (घड़ा), लोट (पूछ), होल (टिडा)



महात्मा पंडित कृष्णजू राजदान
(१८५०-१९२६ ई०)

विषय सूची

(भाग १)

१ ओमकारें रूपें छुख सर्व अधिकारो	३
२ सत् च्यथ आनंद अमृत चावतम	६
३ ओमकारें रूपस शरणे आये	९
४ साविदान मन छुम परमानंद	१२
५ राजन खांदर येलि म्वकलोवुय	१४
६ उमा रोंद्रस त्रिभुवनसारस	१६
७ दक्ष प्रजा पतुं निस यज्ञस तै	१९
८ खिव खसुं पोशुं पूज करे जालाये	२३
९ शिवुं नावस प्यठ सपजुंख सतिये	२६
१० शिव जी ओस प्यठ कोलासस	२७
११ वीर भद्रन दीव छ्यपुं दिवनांविन	२९
१२ हे परात परें विशेश्वरें शिव शंकरें हरें	३१
१३ श्री न्यराकारै त्रिभुवन सारै	३२
१४ परम ब्रहमो परम शंकरो	३४
१५ परम आत्मुं पानुं छुख मन तै प्राण	३५
१६ कुस कस जेवे तुं कुस कस मरे	३७
१७ स्वयं हृदय म्योन तति चुं दूज जालानुं	३९
१८ दमुं दमुं शमुं नमुं प्यमुं पायस तै	४१

१९ निशुँ अन्तुँ रस्यति आगहँ शंभू	४३
२० ज़ाँज गाश मुह राँच म्य गेटुँ रोवुम	४७
२१ भक्ति भावनायि सान छुस दस बस्तै	४८
२२ कोफूर अंगुँ सफेद रंगुँ	४९
२३ जग येलि मोकल्योव वारै कारै	५४
२४ सेतारु स्वर गोय कनुँ नुँय कनुँ नुँय	५५
२५ सदा शिव सौमियो छुख पाप गालन	५७

भाग २

२६ करमवान ओस हीमाल बोंड दयावान	६१
२७ यिमै पतुँ दिमै नाद	६४
२८ दया कर मे दया वानुँ	६७
२९ यिथै पौठ्य शिव लीला लैज वनुँने	७२
३० सदा शिव जूग्य लौगिथ ओस लारान	७४
३१ हतो साधो मतो वनतम म्य यिछ कथ	७६
३२ दोपुस साधन म्य प्यठ नाहक गयख तंग	७७
३३ च्यतुँ सुफारुँक्य चाफ आलुँ सुफारी	७८
३४ हतो साधो कपट सोरुय वनान छुख	८०
३५ न चुँ छुख जूग्य तै न चुँ सैन्यास	८१
३६ शरण डीशिथ फिरन जूगिस वर्ण प्योस	८३
३७ वुछुन जूगिस बन्योमुत ब्याख रंगा	८४
३८ हे शिव शंकहँ परमीशहँ हहँ	८५

३९ महादीवन दोपुस अजहद कोरुथ तफ	८८
४० भवानी आयुँ अंज जंगल ब खानै	९०
४१ प्रेयम शिव सुंद चें ओसुय ज्यनुँ कालै	९१
४२ करुंज भक्ति त्वता छै परम शक्ति	९२
४३ र्योशा अख ओस ओसुस शिव सुंद भाव	९३
४४ हरे नारायणस लोंग बावने हाल	९६
४५ यि बूजिथ श्री वेष्ण जी ख्वश स्यठा गौ	९९
४६ कलन छम ज्यव डलन छुस छुय सथुँय सथ	१०१
४७ सदा शिव सोमियो छुस भक्ति ह्यनुय	१०२
४८ वनै क्या वोंत्य तिम नजदीक यकबार	१०५
४९ परमुँ शक्ति वरुँवुन परमीश्वर है	१११
५० यिथै पोंठ्य पार्वती शिव लीला	११५
५१ लजायि रस्यति प्रजाये	११७
५२ यि लीला बूजिथुँय ख्वश गौ महीशर	१२०
५३ म्य गम कोसुथ द्यगंबरै	१२२
५४ शब्दस कन थाव वनहारिये	१२५
५५ स्यठा येलि साँपनुस मन साविदानुँय	१२७
५६ समिवे विगुँजव वनुँवुन जोन है	१२८
५७ नंदुँ लालुँ आव गिंदने रास	१२९
५८ यि बूजिथ त्रैलूकुँचि त्रियुँ आये	१३१
५९ पोर्य पोर्य लग्य तोस रथुँ सवारे	१३२
६० सर्व आकारुँ रूपुँ वेष्णुँ भगवानस	१३५

६१ हंसुं पखुं ह्यथ च्यथ फंबुं सीरि शंभू	१३७
६२ बाल नेरि चाजि वेरि शंभू	१४०
६३ कम वस्तुर नाल्य क्या वनुं लो लो	१४२
६४ रंगुं बुलबुल छुय जटाधारी	१४४
६५ मन म्योन बिन्द्राबन तुं लो लो	१४६
६६ भावुं यावुन छु होशुं पोशुं थरि शंभू	१४८
६७ युस सर्व सृष्टि हुंद बब तै मांजुंय	१५०
६८ महाराजस सैत्य सालुर्य आये	१५१
६९ म्यवुं कनि म्वखतुं वोथ चंदन बागस	१५२
७० महादीव येलि महाराजुं बैनिथ आव	१५४
७१ हीमालुं पर्वतुं ने घरि जायख	१५६
७२ वनुंवुंनि अछुं रछुं वछुं स्वर्ग दारै	१५७
७३ बनोवुन दासुं भावै दास कैलास	१५९
७४ होशुं पोशनूलुं वन वनहारे	१६०
७५ गन्धर्व लूक आव वायान बाजे	१६२
७६ गनन गनन प्रेयम येलि तमि युथुय वोन	१६४
७७ न्यथ पोशुं वुंजि पोशि थरि फवल्य फूल है	१६६
७८ ओम कर श्रूख पर श्री गणेशाये	१६८
७९ म्वखतुं कनि तारक छिस तापुं दानस	१७१
८० ग्यवुन गिन्दुन नचुन तति सारिवुंय ह्योत	१७३
८१ भावुं पम्पोश फोर्ल्य प्रेमै सरुं सुंय	१७४
८२ अनिख वैन्य दिथ च्वपारी पोश सारी	१७९

८३ युधुय रंगा वुछिथ मीना वनान ओस	१८०
८४ भक्त वत्सलुं मोनुख म्योन्य मनुं नुंय	१८२
८५ दयन दयायुं सूंत्य ह्योत दै भतः ख्योन	१८६
८६ स्वनुं शीनुं बुतराथ भरनै आये	१८७
८७ महा मायायि प्रत्यक्ष होव दर्शुन	१८९
८८ सैमिवो लूकौ स्वनुं शीन वालौ	१९०
८९ वनुंनि पृथ्वी लैजिस क्यथुं पोरुय दरैबो	१९१
९० पालुं वुंनि येमि हालुं वथ लागि बालुं बालुं	१९२
९१ वुछिथ स्वनुं शीन गयि हारान सारी	१९४
९२ श्रोग जोन शिव रूप द्रोग जोन स्वन	१९६
९३ असान असान लोंगुख वनने सदा शिव	१९८
९४ येछि चाजि दाजि वचि स्वनुं शीनुं माजि	२००
९५ इशारा अख कोरुथ खंत्य शीनुं की क्वह	२०२
९६ गोकुलानदुं गूव्यदुं गूपालै	२०५
९७ त्वता बूजिथ स्यठा ख्वश गोस कीशव	२०८
९८ सथ प्वरणन हुँदि सत् ज़नै	२०९
९९ सतुक स्वर बूजिथुंय ख्वश गोस सत्ग्वर	२११
१०० सत् ज़न बन मन कर कोलासुंय	२१२
१०१ करेनि लग्य नेरुं नुंच सारी तयोरी	२१४
१०२ गोशुं प्यठु पोशनूलुं रुत छुख चुं बोलान	२१५
१०३ सोथ आव बामुन द्राव ह्वछमुंचि हरि	२१६

१०४ नन्दन बागस मंज नयर बन्धन.....	२१८
१०५ होशुं पोशनलुं थव कन.....	२२०
१०६ बालक अवस्थायि लगयो बो.....	२२३
१०७ वेंशंबर ह्यथ विशेश्वर लोंग पकोने.....	२२७
१०८ ओम सत् च्यथ आनन्द गणुं टोठ.....	२२८
१०९ परमीश्वर पूरक पूरणो.....	२३०
११० कर म्य पदमुं पेत्रन नेत्रन मंज वास.....	२३३
१११ शंख चूर मारुवुंनि मोर मुकटुं धारुवुंनि.....	२३६
११२ धर्मुक धोर कोर खेत्य हार वनसुंय.....	२३७
११३ हरी हर द्राव ह्यथ महाराजुं महरेंज.....	२४०
११४ स्मरेंज चाजि सारी पाफ हारी.....	२४१
११५ शक्ति रोंस शक्ति प्रावुं भक्ति रोंस सम्भलुं.....	२४४
११६ ह्यथ प्रभाथा क्वछि क्यथ आव.....	२४६
११७ न्यरवानुं परमुं पदुं धरमुं सभाये.....	२४८
११८ शामुं छुय क्वछि सूमुं सिरियुं रूंपुं प्रभात.....	२५०
११९ छै यीचन रोंचनुंय मंज अख सतुंच राथ.....	२५२
१२० शिवुं रोंच हुँदि द्वहुं बीठ्य निष्काम.....	२५४
१२१ करिथ सतुं राथ सारी हरषुं किन्य औस्य.....	२५७
१२२ बालुं छुय लालुं त्रेटि कनि वासुक हटि.....	२५८
१२३ न्यथ चौज पूजा शिव शंकरें करें.....	२६०
१२४ न्यरंजन वातिथुंय प्यव शुन्य थानस.....	२६२
१२५ रूंपुं रेंस्यति कुस ज्ञानि कमि सनुं नयि गोख.....	२६३
१२६ हरें हरें म्वखुं वन गोम ह्यथ व्वमाये.....	२६४
१२७ कृपा करतम हरी हरै.....	२६६

राजदान साबुन म्वस्तसर परिचय

महात्मा पंडित कृष्ण जू राजदान सुंद जन्म ओस सपुदमुत १२
भौद्रपद १९०७ बिक्रमी तदानुसार १९ अगस्त १८५० ई० वनपुह गामस
मंज। यिछु अख जान बौड गाम युस जम्मू-श्रीनगर राजमार्गस
प्यठ स्थित छु। युँ गाम छु अनन्तनागुँ प्यठुँ पांछ किलो मीटर
दूर। राजदान साबस ओस वेसि किस अकिस बैडिस रईस, श्री
दया राम कौलुँज कूर भागि आमँच, य्वसुँ ज़न राजदान साबस
केह वरियुँ ब्रौँठुँय, यानी तेहँजि जिंदुँगोनी मंजुँय स्वर्गवास सपुँज।
राजदान साब सपुँद्य २७ मार्गशीर्ष १९८३ बिक्रमी तदानुसार
१३ दिसंबर १९२६ ई० अंतर्धान। सु ति वनपुह गामस मंजुँय।

राजदान साबुँ निस पिता जी सुन्द नाव ओस श्री गणेश जुव
रैणा (राजदान) सु ओस अख स्यठा ओसूदुँ हाल रईस तुँ बौड
जोगीरदार। सु ओस तमि ज़मानुँ किस हिन्दोस्तानुँ किस वार्याहस
इलाकस फ्यूरमुत तुँ अमिस ओस वार्या तजरुबुँ हौसिल सपुदमुत।
अम्य कौर पनुँनिस कुनिस नेचविस तौलीम दिनुँ बापथ तजरुबुँ
कार तुँ कौबिल व्वस्तादन हुंद तलाश। यिमन कौबिल तुँ
तजरुबुँ कार व्वस्तादन हुँदिस ह्यदायतस तल सपुँज राजदान
साबुँज फारसी, संस्कृत रियाजी बेत्रि मजमूनन हुँज तौलीम
शोरुह। अमि अलावुँ आव इमन धार्मिक शिक्षा दिनुक तुँ
ज्योतिष्य विद्या हेछुँनावनुक ति इन्तिज़ाम करनुँ। कौबिल तुँ
तजरुबुँकार व्वस्तादन हुँजि रहनुमाई मंज कौर होनहार बचन
कमुँ सुँय कालस मंज स्यठा केह हौसिल। व्वस्ताद ओस्य
तिहिँजि कौबिलियच हुँद्य गीत ग्यवान तुँ तिहिँद्यन ग्वनन हुँज
तौरीफ करान।

राजदान साँबु निस ल्वकचारस मंज सपुंज अख अजीब घटना ।
 तिम आस्य ल्वकटिय तुँ अकि द्रहुँ कोर तिहिंद्य मौल्य तुँ माजि
 यिनुँ वाजिजि जेठुँ जूनुँ पछुँ ओठुँम द्रह मंज गामि कि दीवि
 हुँदि थानुँच यात्रा करनुक निश्चय । बालक कृष्णन केर सूँत्य
 गछुँ नुँच यछा ज़ोहिर । मँजिल ओस स्यठा दूर तुँ अकिस
 ल्वकटिस शुर्य सुँदि बापथ ओस नुँ यूत मँजिल कँडिथ यि यात्रा
 करँज संभव । अवुँ म्वखुँ आव नुँ तैम्य सुंद सूँत्य पकुन
 मुनौसिब ज़ानुँनुँ । मगर अमि कथि हुँज बावथ आयि नुँ बालक
 कृष्णस केहं ति करँनुँ ।

येमि द्रहुँ माज मौलिस यात्रायि प्यठ नेरुन ओस, बालक
 कृष्ण आव छलुँ सूँत्य होर योर फेरनि सोजनुँ तुँ यात्री द्रायि
 तैमिस चूरि यात्रायि प्यठ । येलि होरँ योरँ फीरिथ सु वापस घरँ
 आव तैमिस लोग पै जि यात्रायि वाल्य छि द्रामुँत्य तुँ सु छुख
 घरिय त्रोवमुत तैमिस सपुद स्यठा सदमुँ तुँ तैहंजव अछिव किन्य
 लोग बारानुँ वसनि । घरि क्यव बाँचव, हकव हमसायव, नोकरव
 चाकरव, सारिवुँय केर पनुँन्य पनुँन्य पौठ्य तैमिस छ्वपुँ करनावनुँच
 कूशिश मगर तैमिस रुक्यव नुँ हरगिज ति ओश । यूत यूत
 ज़्यादुँ तैमिस तसल्ली दिनुँ आव त्यूत त्यूत गौ सु ज़्यादुँ वदान
 तुँ यूत सु समझावनुँ आव त्यूत चाव सु ज़्यादुँ श्रवकजन । तैम्य
 न ख्यव केहं न चव केहं । फकत रूद अछिव किन्य म्वखुँ
 हारान । ओखूरस येलि वदान वदान थोक तैमिस पेयि न्यँदुर ।
 न्यँद्रि मंज वुछ अम्य अख स्वप्न । अख रूपीठ तुँ दिवुँच दार
 बटुँजा, साफ शफाफ, शूभुँ वुँन्य तुँ लूभुँ वुँन्य पलव लागिथ,
 दयायि तुँ कृपायि हुँज साक्षात मूर्ति आयुँ तुँ रोटुन सु ख्वनि
 मंज । अमि फ्युर अमिस पनुन शुहुल अथुँ कलस तुँ वोन नस,

“वुछबा, चें ओसुय येच शोख म्य निशुं यिनुक, मगर यिमव ओनुख नुं चुं केह तुं चें लोगुथ वदुन। व्वज आयस बुंय चें निश। व्वज कर छ्वपुं तुं म वद”।

बस युंहोय ओस द्वह तुं युंहोय ओस सात, माजि भगवती कर अमिस स्यजुंरुंच नजर तुं अमिस आयि पानुं मौज सरस्वती म्वखस तुं रूजुंस बराबर वांसि सूंत्य सूंत्य सहायतस।

राजदान सोबन ओस गुरु धारण कोरमुत। तिहिदिस गुरु महाराजस ओस नाव श्री मुकुन्द राम शास्त्री। गुरु महाराज ओस्य श्रीनगरें (ओल्य कदलुं) रोजान। तिम ओस्य गीता, उपनिषद पुराण बेत्रि शास्त्रन हुंघ प्रकांड पंडित। रूहोनियतस मंज ओस तिमव स्यठा थोद मुकाम प्रोवमुत

राजदान सोब येलि गुरु महाराज सुंदिस संपर्कस मंज आयि, तिहिंजन सलोहियतन लोग वुतिश तुं रूहोनियतुंकिस मोदानस मंज ह्यचुं तिमव छालुं मारजि। तिहिंजि तरकी हुंज रफतार लैज तेजुंनि। अथ दौरान रूघ राजदान सोब अकसर पनुंसि गुरु महाराजस निश गछान तुं ह्यदायतुं रटान। तिमव कर अथ दौरस मंज अज हद मेहनत यि-दप्य-जिति ग्रटुं कोडुख पान। अथ कुन वुछित ओस्य तिहिंघ गुरु महाराज तिमन प्यठ स्यठा मेहरबान। सूंतिय ओस्य तिहिंजन उपलब्धियन वुछित तिमन आदर ति स्यठा करान।

अकि लटि येलि राजदान सोबुंजि गोरहोजिरी मंज गुरु महाराज सुंदिस दरबारस मंज तिहिंजि शायरी मुतलिक कथ कथ चलान ओस, अक्य चाटन वोन गुरु महाराजस “राजदान सोब छिनुं शायुर वायुर केह बैल्कि छि तिम शारें चूर करान तुं तिमन

पनुन नाव दिथ पेश करान। गुरु महाराजन बूज तूँ वोनुख नुँ
केह। मगर मनस मंज गेयख शंका पोदुँ। तिमव कोर गानस
सूँतिय अमि कथि हुँज जांच कर नुँक निश्चय।

वार्या द्रह गयि। कथ गयि सारिनुँय मेशित अकि द्रहूँ केर गुरु
महाराजन यछा ज़ाहिर जि सारिय चाठ ह्यथ करहव डल
सोला। तिहिंजि यछायि अनुसार सपुद डल सोलस गछनुक
सोरुय इतिजाम। चुनांचि निश्चित द्रहस प्यठ द्रायि गुरु महाराज
चाटुँ जमोच सूँत्य इंगस क्यथ डल सोलस। येलि इंगुँ मंज
डलस पकनि लोग, गुरु महाराजन बुलौव्य सारिय चाठ तूँ
बेहनौविख पानस निशुँ। अमि पतुँ बुलौव्य तिमव राजदान सोब
ब्रोंठ कुन तूँ कोरुख तिमन फरमाश जि डलस प्यठ बोजुँनौविव
केह कविताहा। राजदान सोबन द्युत च्यथा तूँ ह्योतुख वनुन तूँ
लोग व्वद्भव यथ लीलायि :-

सरँ कोर संसार नदुँरुय द्राव।

डल मुँ होशुँ च्यतुँ किय पंपोश छाव।।

यि लीला छि अख शाहकार।

अमि वाकुँ सूँत्य गौ यक तरफ चोगुल खोरण मुंह बंद तूँ
दोयमि तरफुँ सपुद गुरु महाराज सुँदिस दिलस मंज राजदान
सोबुँनि बापथ यजतस तूँ येहतिरामस बेयि ति वार्या हुर्यर।

राजदान सोबस ओस माजि भगवती स्पजरुँच नजर केरमुँच
तूँ तिहुँज अनुकम्पा रूज तिमन प्यठ सदा व सर्वदा। तिमन
ओस अख खोसूसियत स्व यि कि यथ कामि तिम रटुँहन दर
दस्त, तथ मंज ओस्य तिम यि दैप्य जिति ब्वडान तूँ अकसर

तथ कामि रँत्य पाठ्य वातुं नावान अन्द । अमिय एकाग्रितायि
हुँदि तूफानुं किय कारणुं आयि तिहिँदि दँस्य कलील वकफनुंय
मंज बेड्य बेड्य मँजिल मारणुं ।

आध्यात्मिक माँदानस मंज पनजि तरकी हुँदिस सिलसिलस
मंज ओस नुँ राजदान साँबस कदामत परस्ती पसन्द । पनजि
तरकी हुँजि वति प्यठ कदमुं कदमुं पकुन ओस नुँ तिमन
गवारा । तिम ओस्य लांपुं त्रावुँजि तुँ छालुं मारँजि यछान । येमि
खातुँरँ तिम काँचाह ति मेहनत करनस तयार ओस्य तुँ कोताह
ति खतरँ मैल्य ह्यनस तयार ओस्य चुनाचि थवनोव तिमव घरस
मंज आध्यात्मिक साधनायि बापथ अख कमरँ अलग यथ मंज
काँसि ति बेयिस नफरस अचनुक इजाजत ओस नुँ । इला ओस
सु नफर द्वहस मंज अकि फिरि अचान येमिस अति सफाई
करनुँच तुँ अति किस सामानस ठीक ठाक थवनुँच डिवटी
ओस । अँथ्य कमरस मंज लौज तिमव साधना करँज तुँ सु
कमरँ रूद पतुँ पूरँ वाँसि तिमन सुय मकसद पूरँ करान । यिथुँ
पाठ्य कोर तिमव पनुन पान रूहानियतस पूरँ पाठ्य वकफ तुँ
रूद्य ओरँ योरँ ध्यान हटोविथ अँथ्य वति प्यठ पकान ।

पनुनि कठिन तुँ अनथक परिश्रमुँ सूँत्य कैर्य राजदान साँबन
पडावन हुँद्य पडाव सर तुँ वाँत्य तरकी हुँद्यन थद्यन मँजिलन ।
कामयाबियौ हेँत्य तिहिँद्यन कदमन मीठ्य दिन्य । रूहानियतुँचि
देगि लँज ग्रख । अम्युक जोश तुँ हुबाब रल्यव यिहिँजि शायरी
सूँत्य तुँ अथ मंज आयि मेछरस तुँ मोधरेरस सूँत्य सूँत्य हना
तीजी ति । राजदान साँबुँ निस शखसियतस खौत नौव रंग तुँ
तिहिँद्यन अहबाबन हुँजि ग्रँज मंज सपुद स्पठा हुर्यर । यिहुँजुँ
कथुँ ज़न आसुँ बोज़न वाल्यन सेहरँ करान तुँ तिहुँद्य भजन

मुहित निवान। यिहुँज शोहरत तुँ नेक नौमी ह्यँचुँन च्वपोर
फेहलुँज यि शोहरत तुँ नेकनौमी वौच आखुँर वातान वातान
वक्तुँ किस राजस, महाराजा, प्रताप सिंघस ताम ति। महाराजा
प्रताप सिंघन द्युत राजदान सौबस तुलुँ मुल रौजा भगवती हुँदिस
थानस प्यठ यिनुँ खात्रुँ न्यमन्त्रन।

राजदान सौब ओस्य आम तोर तुलुँ मुल गछानुँय। महाराज
बहोदुर ति ओस्य गाहे बगाहे ओर वसान मगर अज ओस
राजदान सौबस महाराजा प्रताप सिंघ सुँदिस निमन्त्रनस प्यठ
ओर गछुन। येलि तिम ओर वौत्य महाराज सौब आयि तुँ
निहान तिमन पननिस बेठालस प्यठ, मगर राजदान साबन नियुँ
तिमुँय अथस थफ करिथ नागस प्यठ तुँ वौनहख “महाराज,
ग्वडुँ करौ माजि भगवती नमस्कार। अमिस वनौ जि अज छि
म्याजि भक्ति हुँज परीक्षा।” महाराज सौबस ओस मनस मंज
ख्याल आमुत जि बुँ वनुँ राजदान सौबस कि नागस गछि
पौजिस रंग बदलुन। तिमव येलि राजदान सौबुँज कथ बूज तिम
गयि हौरान ति तुँ ख्वश ति। बहर हाल येलि तिम नागस निश
वौत्य अथ ह्यौतुन पौजिस रंग बदलुन। यि पोज गौ वारँ वारँ
सब्जा-ति-सब्ज। महाराजा प्रताप सिंघन ज़न लौब पानुँ भगवान।
तिहिँदिस दिलस मंज गयि राजदान सौबनि बापथ बे इन्तिहा
श्रद्धा पौदुँ य्वसुँ ज़न वक्त गुजरनस तुँ नैव्य नैव्य तजरुबुँ
वुछनस सूँत्य सूँत्य ज़्यादुँ पोछर लबान गयि तुँ बराबर वाँसि
ताम कौयिम तुँ दौयिम रूज।

महाराज सौब येलि ति श्रीनगरँ प्यठुँ जौम अथवा जेमि प्यठुँ
श्रीनगर गछान ओस्य तिम ओस्य वनपुह रुकान तुँ राजदान
सौबस दर्शनुँ बापथ आलव करँ नावान। अथ्य सूँत्य ओस्य तिम

काह र्वपयि नकुंद तुँ नाबद दोरँग नजरानुँ पौठ्य तिमन भेंट करान। यि सिलसिलुँ रूद ता उमुर जारी। राजदान साबस ति ओस महाराज साबुन स्यठा प्रेम तुँ स्नेह। मगर यिति छि अख हेकीकत कि तिम गयि नुँ पनजि पूरँ वाँसि मंज जांह ति पननि कुनि हाजतुँ खातुँरँ महाराज बहोदरस निशि। तिमन द्युत नुँ पनुन्य आत्म सम्मानन तुँ स्वाभिमानन अमि कथि हुंद जांह ति इजाजत।


पूछस मंज ओस महाराजा प्रताप सिंधुँ सुँजिय बरादरी हुंद बोया राज करान। अख द्वहा बन्यव महाराज साबस वाच तार जि पूछुक राजुँ छु स्यठा बेमार। महाराज साबन सूज नफर राजदान साबस निश। राजदान साब आस्य तिमन द्वहन श्रीनगरस मंजुँय। येलि तिमन यि शेछ वाच तिमव दोपुख जि शेछ सूज्यूख अन्नदान बेत्रि करनुँ खात्रुँ। नफर गौ राजदान साबुन जवाब ह्यथ। यि नफर ओस राजदान साबुन अख सम्बन्धी। दपान केह घंटय गयि पूछुँ प्यठुँ वाच ब्याख तार जि बेमारस हसौ छु ल्वचुँरँय। यि बूजिथ गौ तस नफरस अफसूस ति तुँ हना शरमन्दगी ति। शामुँ शामै वोत सु नफर चलान तुँ लारान राजदान साबस निशुँ तुँ वैजिन तिमन दोयिमि तारि हुँज कथ। राजदान साबन वुछ सु बाम्बुर्योमुत तुँ तिमन तौर फिकिरि अम्य सुन्द मतलब। तिमव वोन तैमिस, “हतो बेकला, तैमिस ना छुवुँ बचुन, न छस ज्यादुँ फुरसत। जल्द सूज्यूस शेछ अन्नुँ दान वनुँ दान करनुँ बापथ। नफर द्राव वापस। मगर तैम्य सुंद दिल ओस जन शेश पंजस मंज।

पगाह सुबहस वाच प्रभातिय ब्याख तार जि बेमार हसौ गुजर्यव।

संपादक



समर्पण



युँ पवित्र संग्रह छु महात्मा कृष्ण जू राजदान सुँदिस देवता
स्वरूप पोत्रुँ, पंडित शंकर नाथ राजदान, सुँजि पुन्य स्मृति मंज
श्रद्धापूर्वक समर्पित करनुँ यिवान, यिम ज़न शुक्रवार, २७ मई
१९६५ जेठ ओठुँम द्वह वनपूह स्वर्गवास सपुँद्य ।



भाग १

भगवान शिव जी महाराज सुँदि माता
शक्ति हुंद दक्ष पुत्री सेती हुँदिस
रूपस मंज वरण करनुँच वार्ता



आदि दीवस अस्तुति

ओमकारुँ रूँपुँ छुख सर्व अधिकारो
मूलाधारुँ ध्यान धारुँयो ।
सेद्धि दाता छुख विघ्न हरतारो
महागणपतुँ ध्यान धारुँयो ।

सारिनुँय ब्रोँठ छै ग्वडुँ अनवारो
जपुँ यज्ञुँ सहाकारुँयो ।
विकटुँ रूँपुँ छुख वीदुँ ओँकारो
महागणपतुँ ध्यान धारुँयो ।

नाँल्य छै लालुँ मालुँ नागेंद्रहारो
बलदातुँ गैन्यशुँ बलुँ प्रारुँयो ।
रुद्रुँ गणनुँय हुँदि हा सरदारो
महागणपतुँ ध्यान धारुँयो ।

आदि शक्ति हुँदे आधिकारो
ईकुँ दंतुँ वीद व्यस्तारुँयो
शिव जी सुँदि टाठि विघ्न न्यवारो
महागणपतुँ ध्यान धारुँयो ।

परम शक्ति हुँदे सीवा कारो
यछा पोत्रुँ व्यवहारयो ।
बालुँ चँद्रुँ क्षूभ कासुँ वुँनि शूभिदारो
महागणपतुँ ध्यान धारुँयो ।

सर्व शक्ति मानुनि आँझा कारो
प्रक्रमुँ येमि संसारयो
प्रथ तीर्थ ब्रोठ चुँय पतुँ क्वमारो
महागणपतुँ ध्यान धारुँयो ।

लम्बोदरुँ ही सर्व व्वपुँकारो
म्वक्लाव येमि संसारयो ।
लम्बोदरिये कोरुथ आहारो
महागणपतुँ ध्यान धारुँयो ।

यँदुँराजस येँलि खोत अन्धकारो
जोरण गोस लुरुँ पारयो ।
म्वक्लोवथन छुख बख्खन हारो
महागणपतुँ ध्यान धारुँयो ।

वेँण्णन कोरनय नुँ नमस्कारो,
सँद्रस कोरुथ वथवारयो ।
गजुँ म्वखुँ भँव्यनै जै जै कारो
महागणपतुँ ध्यान धारुँयो ।

वेँण्णुँ भगवानस बूजुथ ज़ारुँ पारो
कृष्ण पिंगलुँ अदुँ आय आरयो ।
वक्रुँ तुण्डुँ बल छुय महाव्यचारो
महागणपतुँ ध्यान धारुँयो ।

वस्तुँर नाल्य छिय रंगि गुलनारो
चोँतुर ब्वजुँ बडि सरकारयो ।
चानि दरबारै लबुँ दरबारो
महागणपतुँ ध्यान धारुँयो ।

मन्त्र नायकुँ ही ब्रह्म अवतारो
पूजुँहथ गणपत यारयो ।
सर्व स्यंज दिनुँ कुय छुख म्वखतारो
महागणपतुँ ध्यान धारुँयो ।

वल्लभा सूँत्य छै सु स्वरूँफ धारो
अथन कयथ चोर हँथ्यारयो ।
भूतन तुँ राक्षसन करान संहारो
महागणपतुँ ध्यान धारुँयो ।

अविद्यायुँ साजे दन्दुँ सूँत्य मारो
मकुँ सूँत्य पाप गाल वारयो ।
पदमुँ स्मरँज सूँत्य क्रूध द्वख हारो
महागणपतुँ ध्यान धारुँयो ।

सिंह खगुँ आसनुँ जोरावारो
धूम्र वर्णुँ संसारुँ सारयो ।
येमि भवसरुँ दिनुँ कृष्णस तारो
महागणपतुँ ध्यान धारुँयो ।

* * *

गुरु महाराजस त्वताः

सत् च्यथ आनंद अमृत चावतम

सत् ग्वरँ हावतम गटि मंजुँ गाश

येत्य छुख छांडथ कथ ब्व मकानस

गोमुत छुस अज्ञानस मंज

ओंन छुस ज़ोज हुँज वथ वुछनावतम

सत् ग्वरँ हावतम गटि मंजुँ गाश

वोलनस संसारँचि मायाये

म्वकलै चानि व्वपाये सूँत्य

दय्यायि हुँजुँय नज़राह त्रावतम

सत् ग्वरँ हावतम गटि मंजुँ गाश

छुय काम क्रूध लूभ मुह अंधकारँय

ममतायि सूँत्य व्यस्तारँय म्योन

समतायि सूँत्य येमि मंजुँ म्वकलावतम

सत् ग्वरँ हावतम गटि मंजुँ गाश

संतोष, व्यचार, सत्संग, धरमुँय

खटनै आयम क्व करमै सूँत्य

अनयछायि परमै गथ प्रावनावतम

सत् ग्वरँ हावतम गटि मंजुँ गाश

सत्ज़न प्वरँष यिम ओस्य प्रकृतिपर

चरि जीव प्रोवुख ईश्वर स्थान

तिमुँ नुँय मंज बाग आसन म्य द्यावतम

सत् ग्वरँ हावतम गटि मंजुँ गाश

शब्दुँ प्रकाशुँ वारुँ वासना हारतम
ह्योर कुन खारतम पजि रजि सूँत्य
उपनीषदन हुँद्य सिर मेति बावतम
सत् ग्वरुँ हावतम गटि मंजुँ गाश

ल्वकचार अँद्य गोम घरिके क्षूबै
जवान छुस रछतम लूभै निश
बुजर छु नजदीक मतुँ मन्दछावतम
सत् ग्वरुँ हावतम गटि मंजुँ गाश

व्वपदीशुँ सूँत्यन वुछियुँय त्रावतम
सूँत्य मा आस्यम कुनि ची लीश
ब्रह्मानंदुँ सुँय प्यठ वातनावतम
सत् ग्वरुँ हावतम गटि मंजुँ गाश

ध्यानुँच नदिया न्यरमल कर्यथुँय
यूगुँ पाजि सूँत्यन भैर्यथुँय छै
बुँय तन नावै चुँय मन नावतम
सत् ग्वरुँ हावतम गटि मंजुँ गाश

यँद्रेय यिम ओस्य द्रायम फँट्यथुँय
ह्यस ह्यथ रँट्यथुँय खँट्यथुँय पोरुँय
सौर्य शोम्रावतम कुनुय बनावतम
सत् ग्वरुँ हावतम गटि मंजुँ गाश

ज्ञानुँक्य न्यथरुँय वारुँ मुचुँरावतम
पंपोश ज़न फोलरावतम मन
अद्वयतुँ भावुँ किन्य पानस छावतम
सत् ग्वरुँ हावतम गटि मंजुँ गाश

मूलुं तलुं ओसुस न्यरमल पोजी
व्यवहारुं प्रक्रेच कौरनस यख
न्यरनय गरमी सूत्य व्यगलावतम
सत् गवरुं हावतम गटि मंजुं गाश

नाव छुम कृष्ण छम चौजी आशी
हावतम सत् च्यथ आकाशी
संसारस मंज पुषुं मतुं पावतम
सत् गवरुं हावतम गटि मंजुं गाश

* * *

जगत तुं त्रण कारणन हुँज व्वत्पेती

ओमकारुँ रूँपस शरणे आये

ओम नमः शिवाये कर

परमात्मा युस छु परमानन्दुय

तैम्य सुँय छुय स्वच्छंदुँय नाव

स्वच्छंदस निशि माया द्राये

ओम नमः शिवाये कर

माया ईश्वर यछा ज़ानुँय

तमि मंजुँ वेँष्णुँ भगवानुँय द्राव

ब्रह्मा व्वपदोव वेँष्णुँ मायाये

ओम नमः शिवाये कर

लछुँ बदि ख्वगुँ सान नगरुँय काण्डुँय

सोर संसार ब्रह्माण्डुँय ह्यथ

पाँदुँ कोर ब्रह्मा सुँजि यछाये

ओम नमः शिवाये कर

दक्ष प्रजा पत ग्वडुँ व्वपदोवुन

जगतुक होवुन तस व्यवहार

वार्या ज़ाये तस कन्याये

ओम नमः शिवाये कर

तिमुँ नुँय मंज अख कूरा ज़ायस

भगवत माया घरुँ चायस

तस निशि ज़न्म ह्योत माजि व्वमाये

ओम नमः शिवाये कर

तस माजि मौलिस छु जै जै कार्हय
तस ह्युव नुँ बख्तवार्हय कांह
यस घरि पिछ क्वमोरी जाये
ओम नमः शिवाये कर

ब्रहम र्योश दीव लूकुस सरदार्हय
तपुँ र्योश बडि आधिकारय सान
यस पिछ दया कर दयाये
ओम नमः शिवाये कर

त्रैलोकि नाथस त्रिभवन सारस
परम शिवस भस्माधारस
स्वयं क्वमोरी बागुँन्य आये
ओम नमः शिवाये कर

व्वमा रोद्रस छु नमस्कार्हय
सर्व आकारय छु शिव भक्ति रूप
व्यवाह कोरहस लोलुँ तै माये
ओम नमः शिवाये कर

सतोवुह कोरे पथ कुन आसस
व्यवाह कोरनख चन्द्रमस सूँत्य
सात नेछतुँर छै तिम ताराये
ओम नमः शिवाये कर

प्रजापथ गौ मनुँ साविदानुँय
येलि शिव जी सनिदानुँय आस
दोपनस कन थव म्याजि लीलाये
ओम नमः शिवाये कर

पननी द्वख स्वख पनन्यन भायन
वननी सारिनुँय लौजिम छिय
तैम्य ति बोजुँ नौव्य पनुँन्य हमसाये
ओम नमः शिवाये कर

ब्वद्ध म्याँज वातिय योरुँय योरुँय
तोरुँय तोरुँय सोरुय चुँय
येति योर कृष्णस कर व्वपाये
ओम नमः शिवाये कर

* * *

व्वमा जी हुँदि विवाह विजि दक्ष
प्रजापतुँज अस्तुति, भायन बन्धन तुँ
हमसायन कुन

साविदान मन छुम परमानंद
शिवनाथ साँपनुम बांधव तुँ बन्ध

सरँ ज़न फोल्मुत छुस पम्पोश
ल्वकचारस छुम आमुत बोश
पां फयूर साँपनुस आनंद कंद
शिवनाथ साँपनुम बांधव तुँ बन्ध

अम्य श्री गंगा धारन ग्वसोज
स्वयंवरँ वैरँन कन्या म्योज
आपुँरस प्रेमुँ सूँत्य द्वधुँ बतुँ कन्द
शिवनाथ साँपनुम बांधव तुँ बन्ध

तसुँजि मायायि ब्वद्व वातिय नुँ सोज
नै स्वै ब्रहमा वैष्णन जोज
नै छुस आदि मध्य नै छुस अन्द
शिवनाथ साँपनुम बांधव तुँ बन्ध

अथ कर पूरँ गौरम तने
मुश्कुँच कीर्तना कुस सन वने
यिवान कौचाह छस स्वगंध
शिवनाथ साँपनुम बांधव तुँ बन्ध

सुय ब्रह्मा सुय वेष्णु मानुन
जगत्तुक ईश्वर सुय ज़ानुन
सुय परमात्मा सुय स्वछन्द
शिवनाथ साँपनुम बांधव तुँ बन्ध

सुय छुय शास्तुर वीद सागर
सुय छुय आसुँ वुन वेद्याधर
सुय छुय सार ओमकारुक ब्यंद
शिवनाथ साँपनुम बांधव तुँ बन्ध

अभेदुँ भक्ति छै तसुँजुँय ज़ान
सुय छुय मन तै सुय छुय प्राण
सुय नेरि औषध शास्त्र मन्द
शिवनाथ साँपनुम बांधव तुँ बन्ध

लछि बदि लोलुँ तै प्रेमै सूँत्य
जपुँ तपुँ धरमै करमै सूँत्य
पोशुँ पूज कर्य थुँय जुव तस वन्द
शिवनाथ साँपनुम बांधव तुँ बन्ध

कृष्णुँ फिर मुँ कोरुँय कर मुँ तोरुँय
तिथुँ पाठ्य पूजायि धोरुँय कर
यिथुँ पुष्पुँ दन्तन लाग्यनस दन्द
शिवनाथ साँपनुम बांधव तुँ बन्ध

* * *

शिव जी सुँदिस व्वमा जी ह्यथ कैलास पर्वत गछनस प्यठ

राजन खांदर येलि म्वकलोवुय
परम शक्ति गौ लछुँ नोवुय ह्यथ
गटुँ पेछ्य चंद्र चूडन म्वख होवुय
अछुँ पोश गौ लछुँ नोवुय ह्यथ

पंपोशिक्य पौठ्य फौल संसारेंय
जगतस नव बहारेंय आव जान
अरिजि पोशस ह्यथ गौ न्योवुय
परम शक्ति गौ लछुँ नोवुय ह्यथ

होवुँर्य घरि सुय वारै कारै
परमासनुँ व्यवहारै सान
हशि हेहरस ह्यथ रूवखसत द्रोवुय
परम शक्ति गौ लछुँ नोवुय ह्यथ

गुलाबस तै आरुँवलि म्युल गौ
दिल गौ मीलिथ रूद नुँ केँह ब्यन
यँबुँरजलि हुंद रंग सौँबलन प्रोवुय
परम शक्ति गौ लछुँ नोवुय ह्यथ

व्वमा रोद्रुँ छुख न्यथ असि भासन
नेष्कल मन कर आसन धार
हृदयुक पंपोश असि वथरोवुय
परम शक्ति गौ लछुँ नोवुय ह्यथ

तस निश क्या छिय वस्तुँर जामै
व्यरक्त छुय नैष्कामै सान
न्यधानुँ अबदन हुंद स्वनुँ सोवुय
परम शक्ति गौ लछुँ नोवुय ह्यथ

तस निश क्या छुय गंडुन तुँ छावुन
युस आसि शूभि शूभुरावन वोल
त्रैलूक येँम्य ईशरन व्वपुँदोवुय
परम शक्ति गौ लछुँ नोवुय ह्यथ

तस निश क्या गयि लक्ष्मी तुँ द्यार्य
युस आसि लूभुँ अन्धकारै रोँस
ब्रहमा वेँणुँय येँम्य बनोवुय
परम शक्ति गौ लछुँ नोवुय ह्यथ

यूगुँ गछुँ डबि छै लछुँ बजुँ हेरै
कृष्णस फेरै निशि म्वकलाव
ह्योर खारुन छुस ग्वडजुक पोवुय
परम शक्ति गौ लछुँ नोवुय ह्यथ

* * *

दक्ष प्रजा पतुन दीवताहन हुँजि सभायि मंज कूध करुन

उमा रोद्रस त्रिभुवनसारस
मनुँ किन्य धारणायुँ धारस ध्यान

कौलासस प्यठ क्षमा करुवुन
व्वमा दीवी ह्यथ येलि गौ
वैक्वण्ठ साँपुन तथ क्वहसारस
मनुँ किन्य धारणायुँ धारस ध्यान

द्वह अकि ओसिय त्रेशवै कारण
वीद व्यसतारन दीवता ह्यथ
समेमुँत्य ओस्य मंज स्वर्ग दारस
मनु किन्य धारणायुँ धारस ध्यान

दक्ष प्रजापत मनुँ कामनाये
वोत तथ धर्म सभाये मंज
सौरी वेथ्य तस जै जै कारस
मनु किन्य धारणायुँ धारस ध्यान

गोमुत ओस मंज मुह अन्धकारस
शिवनाथन तोरुँ करनस नुँ कथ
वुठ मुचरोवनस नुँ नमस्कारस
मनु किन्य धारणायुँ धारस ध्यान

करुण ओस पानै श्री न्यराकारस
अदुँ छुनुँनोवनस माया जाल
ब्वडुँ नोवुन मंज मुह अंधकारस
मनु किन्य धारणायुँ धारस ध्यान

व्वजलुय बुथ गोस युथ आसि नारस
जिन्य अम्बारस ह्येचनस रेह
कूधुँ म्वख गोस युथ कालुँ सम्हारस
मनुँ किन्य धारणायुँ धारस ध्यान

वननि लोग पानस सूँत्य ओस शुदी
मैदी बोलनस दीवन मंज
येति योर लगुँ वोँज अमि किस चारस
मनु किन्य धारणायुँ धारस ध्यान

वारुँ पोठ्य येँजा व्वज बनावै
यछायि, प्रेमुँ तुँ भावै सान
पथ कुन नावा थवुँ संसारस
मनु किन्य धारणायुँ धारस ध्यान

ब्रहमा वेँष्णुँय ह्यथ दीव सोरी
सनिदानुँय करुँ आवाहन
फकत करुँ नुँ गंगा धारस
मनुँ किन्य धारणायुँ धारस ध्यान

येति योर पथ कुन यिम व्वज आसन
तिम तस भासन नुँ यज्ञस मंज
अनुँनस नुँ जांह जपुँ किस व्यवहारस
मनु किन्य धारणायुँ धारस ध्यान

बुँ ति मन्दुँछेवनस सुति मन्दुँछावन

ठठुँ पौठ्य कथ पावनावन याद

अदुँ गछुँ पनुँनिस कारस बारस

मनुँ किन्य धारणायुँ धारस ध्यान

यिय गँजराविथ जग बनोवुन

सारिनुँय वनुँनोवुन सालस

दोपनख दैप्यजि नुँ भस्माधारस

मनु किन्य धारणायुँ धारस ध्यान

कृष्णुँ यिथुँ तिथुँ घरि घरि शिवुँ शिवुँ कर

अनुभव भावुँ किन्य द्यवुँ टोठिय

शरणुँय गछ चँद्र कलाधारस

मनु किन्य धारणायुँ धारस ध्यान

* * *

दक्ष प्रजापतुन यज्ञ करुन

दक्ष प्रजा पतुं निस यज्ञस तै
दिवता आयि पोशुं दस्तै ह्यथ

आवाहन गौ ब्रह्म लूकस तै
ब्रह्मा वेष्णुं भगवान ह्यथ आव
सतुं रेश्य तति आस्य वीद परनस तै
दिवता आयि पोशुं दस्तै ह्यथ

अँद्य अँद्य येलि तिम बीठ्य यज्ञस तै
दक्ष प्रजापतुं नुँय वोनूनख
आवाहन कर्क्यजि नुँ शिवस तै
दिवता आयि पोशुं दस्तै ह्यथ

शिव जी ओस प्यठ कौलासस तै
माजि भवाजि कुन लोंग वनने
दपनि कोनुं आव असि कांह सालस तै
दिवता आयि पोशुं दस्तै ह्यथ

माजि भवाजि फीरिथ दोपनस तै
आस्यख व्यवहारँच गांगल
पनुँन्य छिख पतुं निन आस्यख नुँ ह्यस तै
दिवता आयि पोशुं दस्तै ह्यथ

दीवी येमि रंगुं येलि दोपनस तै
छ्वपुं कँर ईशरन गौ यँच काल
तोहँ कांह दपनि आखनुं आस्य तिम मस तै
दिवता आयि पोशुं दस्तै ह्यथ

अदुँ दोप दीवियुँ शिवनाथस तै
कोरि घरँ माल्युन दपनुँ रोस्तुय
गछुनुय वोनवुँ त्वहि मंज वीदस तै
दिवता आयि पोशि दस्तै ह्यथ

बुँ ति गछुँ आब क्या छुम गछनस तै
पननुय घरँ लोलुँ माल्युन छुम
वैन्यथुँय गयि रूखसत ह्यथ तस तै
दिवता आयि पोशि दस्तै ह्यथ

मायायि हुँदिस जाँपानस तै
खेच सूँत्य ओसुस नन्दकीश्वर
कहरयव कनि शक्तियुँ आसस तै
दिवता आयि पोशुँ दस्तै ह्यथ

स्वखुँ सान येलि वाँच तथ थानस तै
ब्रोँठुँ कांह द्रास नुँ तुँ बोजनुँ आस
क्या ताम गोसुँ छुख सोन वोँदस तै
दिवता आयि पोशुँ दस्तै ह्यथ

स्योदुय गयि खेच प्यठ हुमस तै
वननि लैज प्रजापतस कुन
चानि सालुँ रोस्तुय पानुँ आयस तै
दिवता आयि पोशुँ दस्तै ह्यथ

है है क्याजि गोख मंज मुहस तै
मेशरोवथन चैय जगतीश्वर
आवाहन येति कोनुँ कोर वोस तै
दिवता आयि पोशुँ दस्तै ह्यथ

प्रजापतुँन्यै तोरँ दोपनस तै

कस सूरँ मैत्य सुँय सैन्यासस
न्यथुँन्य सुँय कलुँ मालुँ नौल्य छस तै
दिवता आयि पोशुँ दस्तै ह्यथ

सालस अनुँहन राजुँ रंगस तै

मनुँ छवि ह्यम येति सारिनुँय मंज
शरमनुँ करि ह्यम मंज मारकस तै
दिवता आयि पोशुँ दस्तै ह्यथ

सरपुँ ग्वसाजिस कालुँ कंठस तै

बेहन जाय छस श्मशानन प्यठ
ठंडाया चथ आसान छु मस तै
दिवता आयि पोशुँ दस्तै ह्यथ

दीवी दोपनस वनान छुख कस तै

सुय छुय आसुँ वुन त्रिभुवन सार
अमि कथि नाश वोँज पजिय बननस तै
दिवता आयि पोशुँ दस्तै ह्यथ

यि बूजिथ गयि स्वति मंज क्रूधस तै

अपुँ शब्दौ सुँत्य ह्येचनस रेह
जै भविन जालायि म्वखुँ रूपस तै
दिवता आयि पोशुँ दस्तै ह्यथ

जालायि रूपस पूज करँहस तै

कृष्ण वनि लीला बोजेस सै
खिव छै आसुँ वुँज रछान जगतस तै
दिवता आयि पोशुँ दस्तै ह्यथ

शर्वायस द्वख शमनायस तै
शक्ति रूप धोरिथ सूँत्य-सूँत्य छै
शरणुँय यिमुँ न्यमुँ प्यमुँ पायस तै
दिवता आयि पोशुँ दस्तै ह्यथ

* * *

महामायायि हूँदिस ज़ाला रूपस त्वता

Book Donated for
ASHRAM LIBRARY

ख़िव खसुँ पोशुँ पूज करुँ ज़ालायि
महा मायाये छु जै जै कार

महा वेद्याये ज़गत माताये
महा लक्ष्मी शिव प्रियाये
वेष्णुँ मायाये सर्व स्यद्धाये
महा मायाये छु जै जै कार

समया अख ओस छांडनि द्राये
ज़ाला रूपस वेष्ण ब्रह्मा
अन्द कुनि लोबहसनुँ फीरिथ आये
महा मायाये छु जै जै कार

सिरियुँ हिव्य कनुँनुय छिस कनुँ वाली
व्वज़ली जामै छिस नौली
यँद्राक्षी रूपुँ चँद्रुँ कलाये
महा मायाये छु जै जै कार

भक्ति बापथ ज़गत व्वपदोवुन
सारि नुँय होवुन ज़ालुँ म्वखुँ रूप
त्रिभुवन त्रै कारण तस निशि द्राये
महा मायाये छु जै जै कार

शिव शक्ति रूपुँ छै चैतुर ब्वज धोरिथ
सोज पालना व्यसतोरिथ ब्रोंठ
प्रारब्द व्वपदोव तसुँजि यछाये
महा मायाये छु जै जै कार

पापन क्षै कर मौज भगवतिये
छख पार्वतिये सैती रूप
दर्शनुँ बापथ लारान आये
महा मायाये छु जै जै कार

सतजन प्वरशव प्रसन्न करनावुँख
तमि सूँत्य प्रावुँख परमै गथ
आनन्द गण कोर असुँजि सीवाये
महा मायाये छु जै जै कार

दया रूपुँ दिनुँ भक्त्यन म्वक्ति
परम शक्ति सोज भक्ति बोज
नमुँने अस्य आयि प्रेमुँ तै माये
महा मायाये छु जै जै कार

हृदयस मंज छख जोति रूप आसुँ वुँज
अजपा भासुँवुँज यिवान नुँ द्रीठ्य
गटुँ कास वेल्य मुँत्य छि लूभुँचि छाये
महा मायाये छु जै जै कार

चराचर जगि छै व्यापक आसुँ वुँज
सोन्य खोट्य कर्म कासुँ वुँज छै सै
पाप जौल्य द्वख गौल्य तसुँजि दयाये
महा मायाये छु जै जै कार

प्रजापतुँसुँय येलि खोत क्रूधुँय
चाजि स्मरैज निशि रूदुय दूर
वीर भेद्रन मोर यैजचि जाये
महा मायाये छु जै जै कार

द्यन रात चौजी कीर्तन करेहा
चानि स्वर दिनुँ सूँत्य स्वरें हा ध्यान
मूक्षि बंगुँ चाने मनुँ साज वाये
महा मायाये छु जै जै कार

पानुँ छख वाणी ही मौज भवानी
ब्रहमुँ ज्ञानी तै वीदुँ सागर
सत् ग्वर छख वथ हाव वेद्याये
महा मायाये छु जै जै कार

कृष्ण जी वोँलमुत छुय ममताये
म्वकलीय चानि व्वपाये सूँत्य
द्यन वोँत्य नैजदीक वन समताये
महा मायाये छु जै जै कार

* * *

व्वमा जी हुँदिस योगाग्नि मंज पनुन शरीर भस्म करनस प्यठ

शिवुँ नावस प्यठ सपजुँख सतिये
श्री पार्वतिये भव्यनै जै

पूजायि पोश लागै लवुँ हत्यये
अकिनगामि आसुँ वुँज छख शिवा
रक्त बीज मारिथ छख पानुँ ततिये
श्री पार्वतिये भव्यनै जै

पोश सोम्बरविम व्वजुँल्य नील्य छेतयये
पूजा करुँहै इष्ट दीवी
जारुँ पारुँ वारुँ बोज छिय आरुँ कतिये
श्री पार्वतिये भव्यनै जै

अमर नाथुँ कालासुँ की सूरुँ मतिये
वरनख तुँ करनख अर्धशरीर
तैत्य छख आसुँवुँज तस सूँत्य सतिये
श्री पार्वतिये भव्यनै जै

अष्ट स्येज सूँत्य छै ब्रूँत्य तै पतिये
शिव शक्ति रूँपुँ छख सर्व व्यापक
कृष्णस टोठ छख बोजान येतिये
श्री पार्वतिये भव्यनै जै

* * *

नंदकीश्वरुँ सुन्द कैलास पर्वतस गच्छित
शिव जियस सोरुय हाल भावुन तुँ
शिव जी सुन्द वीर भद्र व्वत्पन्न करुन

शिव जी ओस प्यठ कौलासस
नन्दकीश्वर गौ वनने तस

योहँ तोरु दीवी हुंद संवाद
दज़नुक यि केंछा ओस तस याद
म्वखसर सोरुय कुँसुँ वौननस
नन्दकीश्वर गौ वनने तस

क्रूधस मंज़ गौ कालुँ संहार
त्युथुय युथ त्रन भवनन हेयि नार
वीर भद्र साँपुन तैथ्य क्रूधस
नन्दकीश्वर गौ वनने तस

वननि लोंग वीर भद्रस शिव जी
बुँति आसै छै चें म्याँजी द्री
तिय करुख यिय करौ कल्पांतस
नन्दकीश्वर गौ वनने तस

यिम तति आसन दीव कारण
अन्द चुँ हेँज्यख मारण मारण
वथवार कॅर्य ज्यख बैडिस यैज़स
नन्दकीश्वर गौ वनने तस

वीर भद्र ब्रोंठ द्राव पतुँ शिव जी
करनि लोग यिय दोपुस तैम्य तिय
ही क्षमा करै वुँनि बस कर बस
नन्दकीश्वर गौ वनने तस

कूधुँ म्वखुँ निशि रछ कालुँ संहार
ह्यतुँकारै पोछ्य कर छ्यतुँ नरकुँ नार
वेह मंजुँ शहजार दितुँ कृष्णस
नन्दकीश्वर गौ वनने तस

* * *

वीर भद्र सुंद दीवन मार पीट करुन

वीर भद्रन दीव छ्यपुं दिवनोविन
सारिनुंय हाविन पननीय जोर

गवडजी दक्ष प्रजापथ रट्य थुंय
कलुं चट्यथुंय छुननस अग्नस
छोग्य लटरि कंड्य कंड्य दीव मन्दछोविन
सारिनुंय हाविन पननीय जोर

केह केह गोलिन केह केह जालिन
केह केह वालिन अहंकारे निश
कलुं चट्य चट्य पृथ्वी प्यठ त्राविन
सारिनुंय हाविन पननीय जोर

ब्रह्मा रोद्र मन्त्र परेनोवुन
चानुं नोवुन सुय गुह्य बैनिस मंज
सिरियुं दिवताहस दन्द फुट्टोरोविन
सारिनुंय हाविन पननीय जोर

वेष्णुं भगवान लोंग हरे हरे करने
अनुगृह अनुगृह लोंग परने
सौर्य दिवता हरे हरे करे नाविन
सारिनुंय हाविन पननीय जोर

भृगुं र्योश वस्य प्यव रूदुस नुं वोर्य
सोर्य दोर्य येलि खुंजुनस
छलुं सूत्य बैड्य बैड्य बलुंवीर पाविन
सारिनुंय हाविन पननीय जोर

सफेद बुथ्यसुंय चंद्रमुं दीवस
कँदय मंडुल कौरनस तुं रूदुस नुं धोर
बीमुं सूत्यन तस कलुं होखुंरोवुन
सारिनुंय हौविन पननीय ज़ोर

चारें केंह ज़ोनुख नुं गयि आवारय
भस्माधारय यियनय आर
कमुं कमुं लीलायि तिम वननौविन
सारिनुंय हौविन पननीय ज़ोर

यिम तति ओस्य त्रेयलूक्य दिवता
डांगौ सूत्यन ह्योत्नख जान
त्राहि माम त्राहि माम बारव द्याविन
सारिनुंय हौविन पननीय ज़ोर

ग्वडजी वेष्णन वेजनस लीला
तमि पतुं ब्रहमन अदुं दीवौ
शिव नाथ जी असि व्वज म्वकलोविन
सारिनुंय हौविन पननीय ज़ोर

भावनायि पोश फोल्स्य मनुं चे वारे
कृष्ण जी धारणायि धारे ध्यान
यिम पोश फोल्स्य तिम ईशरस छौविन
सारिनुंय हौविन पननीय ज़ोर

* * *

ब्रह्मा जी सुँज शिव अस्तुति

हे परात परें विशेश्वरें शिव शंकरें हरें
 चराचरें गंगाधरें परमीश्वरें ईशरें
 वीदुं ओमकारें त्रिशूलधारें न्यराकारें सदा शिव
 वेद्याधरें दयासागरें कर्ताकरें जगतीश्वर
 आनन्द गणुं वृषभासनुं कौलासुं वासुं सैन्यासुं
 परमात्म प्वरशुं महा दीवुं अमर नाथुं ही अमर
 हे अविनाशुं च्यथ आकाशुं अघूरें गूरें शंभू नाथुं
 श्री अकालुं भैरव नाथुं महा कल्पांतुं थ्यराथ्यरें
 भस्माधारें नागेंद्रहारें कलाधारें हे कीवलुं
 न्यरंजनुं त्रैलोचनुं सनातनुं महीश्वरें
 त्रैलूकिनाथुं त्रिभुवन सारें महीशानुं मुकुन्दुं
 कर्ता यूगुं ब्रह्मा वेष्णुं कांडुं ब्रह्मांडुं मनोहरें
 हे भूलुं भालुं, महा कालुं महा संतुं सुशिवुं
 हे नील कंठुं शिव नाथुं अमरीश्वरें सत्गवरें
 परमानंदुं परम ब्रह्मुं हे परम शिवुं शिवुंनाथुं
 सन्म्वख यितुं मृत्युंजयुं न्यरनै नयुं करनावतारें
 कालुं संहारें नागेंद्र हारें येमि संसारें म्वकलावतम
 महा रोट्टुं करनावतारें कर म्योन चारें छुम आसरें
 हे सेदि साधुं कालागुं रोट्टुं जटाधरें त्रिनेत्रुं
 हे विश्व नाथुं दिगम्बरुं स्वरूप चोन छु आश्चर
 सूरें मति, व्वमा पति ज्ञानुं वति प्यठुंय अन
 कृष्ण युथ करि शिव शिव मन्थुर जपि षडाक्षर

* * *

वरुण जी सुँज शिवास्तुति

श्री न्यराकारै त्रिभुवन सारै
प्रारै पनुं ने यारै बल
भस्माधारै छम चौज लादन

साधन प्यमयो पादन तल
श्री न्यराकारै त्रिभुवन सारै
प्रारै पनुं ने यारै बल

लमयो जामन रटयो दामन
शिव नाथुं छम चौज मनि कामन
त्रिजगत पालै यितुं म्योन सालै
चावतम प्यालै अमृतुं जल
श्री न्यराकारै त्रिभुवन सारै
प्रारै पनुं ने यारै बल

त्रिभुवन सारो हनि हनि मंज छुख
मायायि सूँत्य छुखनुं यिवान द्रींठ्य
सत च्यथ आनन्दुं कीवल गूवेदुं
जाय चौज हृदयुक पंपोशुं डल
श्री न्यराकारै त्रिभुवन सारै
प्रारै पनुं ने यारै बल

मनुं किस बागस फुलया द्राये
रछुं वुँनि लछुं नावि अछुं पोश छाव
शोकुं चानि प्रेमुं बुलबुल छिय नालान
बोलान शिवुं शिवुं द्यदुरि तुं जल
श्री न्यराकारै त्रिभुवन सारै
प्रारै पनुं ने यारै बल

ही कृष्णु वासना स्यद्ध थौ श्वद्ध थौ
ब्वद्ध थौ सतुँ सूँत्य सनिदान
सतुँ सुँय मन थौ सतुँ सुँय कन थौ
सतुँ किस कुलिस वसि आनंद फल
श्री न्यराकारै त्रिभुवन सारै
प्रारै पनुँ ने यारै बल

* * *

मंगल दिवता सुँज शिवास्तुति

परम ब्रहमो परम शंकरो
जगदीश्वरो भविनय जै
हरँ हरँ हरँ हरँ गंगाधरो
जगदीश्वरो भविनय जै

महरोद्रुँ महादीवुँ परमीश्वरो
दयावान अनन्तवान छुख भगवान
सदाशिवुँ शिवनाथुँ दया करो
जगदीश्वरो भविनय जै

परमात्मुँ नीलकंठुँ जटा धरो
हनि हनि वंदुँयो पनुँनुय पान
हरँ कास असि सारी अरँ सरो
जगदीश्वरो भविनय जै

वेष्णुँ रूप्पुँ कृष्ण जी भस्मा धरो
चानि व्वपुँकारँ चोन धारँ हा ध्यान
सतची वथ हाव हे सत् ग्वरो
जगदीश्वरो भविनय जै

* * *

बुद्ध दिवता सुँज शिवास्तुति

परम आत्मुं पानुं छुख मन तै प्राण
चिन्तायि होशुं बोँज वासनायुं सान
त्रेयि ग्वनुं सोँस छुख श्री भगवान
सदा शिव सोमियो वन्दयो पान

स्वखुं म्वखुं कास्तम पापुँच हान
श्वभुं दरशनुं कुय छुम अरमान
पद्मपादुं सन्तुं साधुं छुख दयावान
सदाशिव सोमियो वन्दयो पान

प्रेमुँच नैदिया पकुँवुँज जान
श्वद्ध वासनायुं सूँत्य करस क्वलुं वान
तमि मंजुं ध्यानुं पाजि सूँत्य करेँ श्रान
सदा शिव सोमियो वन्दयो पान

सोँच्च वोँज पँडिथा ब्यहान ओस वान
बालकौ करहस चेंय सूँत्य ज़ान
तिथै पोठ्य ध्यानुं मंजुं हावतम म्य पान
सदाशिव सोमियो वन्दयो पान

संसारस मंजुं छुस नादान
मनुं किन्य छुमनुं चोन ध्यान ठीकान
जेवि ओत छुस चोँन्य गीत ग्यवान
सदाशिव सोमियो वन्दयो पान

शिवुँ करमी छुस कृष्ण राजदान
मनुँ किन्य धारणायुँ धारुँ चोन ध्यान
श्वभुँ लक्षनुँ प्रथ शायि चोन थान
सदाशिव सौमियो वन्दयो पान

* * *

बृहस्पतुं सुँज शिवास्तुति

कुस कस जेवे तुँ कुस कस मरे
छरा छु थ्यरा श्री हरेँ नाव
कुस कस दीवस पूजा करे
छरा छु थ्यरा श्री हरेँ नाव

संसार छु केमिस येमिस छु तैमिस
अमिच गांगल छेँ अविद्या
यथ भ्रमुँ दीशस मंज कुस दरे
छरा छु थ्यरा श्री हरेँ नाव

कुस साधुँ संगुक संवाद बूजिथ
बिहिथ सतुँचि शिकारि क्यथ
असार सरस अपोर तरे
छरा छु थ्यरा श्री हरेँ नाव

आकाशुँ पातालुँ पूरबुँ पछमुँ
दक्षिनुँ व्वतरुँ नजदीक दूर
सुय परमुँ शिव जानुन घरि घरे
छरा छु थ्यरा श्री हरेँ नाव

सुय शिव शंकर छु सत्गवर आसुँ वुन
ध्यानुँ सँत्य भासुँ वुन हृदयस मंज
तस रोस कुस शिव शास्त्र परे
छरा छु थ्यरा श्री हरेँ नाव

सुय ज्ञानुं दरवाजस मुचरावुवुन
सुय छुय करे नावुं वुन राजुं यूग
-तंदि रोस कुस अचि म्वखुं लरे
छरा छु थ्यरा श्री हरे नाव

हे कृष्ण सत्संगुं हेश्यान चुं कर
प्रकाशुं रूपुक चुं स्वर ध्यान
सत् अय बोजव कुस कस स्वरे
छरा छु थ्यरा श्री हरे नाव

* * *

रचना कारं सुँज शिवास्तुति

स्वयं हृदय म्योन तति चुँ दूज जालानुँ
तीजुवानुँ जोति रूँपुँ ग्वसाजो

वैषानर अंगुँ अन छुख चुँ श्रोंपरानुँ
प्राणस समानुँ सूँत्य बोंग्रानो
प्रथ कुनि सोंक्षी परमात्मुँ छुख चुँ पानुँ
तीजुवानुँ जोति रूँपुँ ग्वसाजो

पछि चाजि सत् ज़न पतुँ चेंय लारानुँ
अकि शब्दुँ सूँत्य सूर मलानो
ओम्कारुँ ध्यान वारुँ धारणायुँ धारानुँ
तीजुवानुँ जोति रूँपुँ ग्वसाजो

लीलायव सूँत्य मन गोय साविदानुँ
आशुँ तोषुँ जल छुख कुमलानो
युस यिय मंगिय तस ती छुख चुँ दिवानुँ
तीजुवानुँ जोति रूँपुँ ग्वसाजो

दीवन दोपुथ कोनुँ छिवुँ केंह मंगानुँ
भक्ति भावनायि छुस बुँ टोठानो
कोरवुँ होस प्रसन्न सोरवुँहोस पछि सानुँ
तीजुवानुँ जोति रूँपुँ ग्वसाजो

दोपहै तोरुँ यिय सन्म्वख सनिदानुँ
शिव नाथुँ यिय छिय मंगानो
प्रजापत जिंदुँ गछि तप जप करि पानुँ
तीजुवानुँ जोति रूँपुँ ग्वसाजो

नतुँ येति योरकुन आसन यिय वनानुँ
यज्ञ करनस छु नाश बनानो
पथ कुन वज कांह जग आसि नुँ करानुँ
तीजुवानुँ जोति रूप्पुँ गवसाजो

अदुँ दोपथख तोरुँ क्याजि छिवुँ तंबलानुँ
तिय बनि यिय छिवुँ वनानो
प्रजापत जिंदुँ गछि ध्यान धारि मनुँ प्राणुँ
तीजुवानुँ जोति रूप्पुँ गवसाजो

अमि वाणी येलि कोरथख बन्धानुँ
प्रजापत छावुँल्य कलुँ सानो
यज्ञस प्यठ गौ हरुँ हरुँ जपानुँ
तीजुवानुँ जोति रूप्पुँ गवसाजो

कृष्णस जालायुँ रूप्पुँ छुख भासानुँ
हृदयस मंज दूँप प्रजलानो
मुह गटि मंजुँ छुख जोज गाश हावानुँ
तीजुवानुँ जोति रूप्पुँ गवसाजो

* * *

छावुल्य जेवि दक्ष प्रजापतुं सुँज त्वता

दमुँ दमुँ शमुँ नमुँ प्यमुँ पायस तै
छुस बेकस तै करुम रक्षपाल

शरण गछुँ हा शरवायस तै
सुय छुय आसुँ वुन त्रिभुवन सार
वन्दुँ हस जुव जान वॉलिंज वस तै
छुस बेकस तै करुम रक्षपाल

सूर ओस गोमुत मंज अँगनस तै
दक्ष प्रजापतनिस शेरस
करुनुय ओस तिय कर्ताहस तै
छुस बेकस तै करुम रक्षपाल

दीवव दोप तति शिव नाथस तै
प्रजापत गछि व्वज जिंदुँ सपदुन
भरुत्यन हुन्द वाति बोजुन तस तै
छुस बेकस तै करुम रक्षपाल

छावुला अख ओस तथ समयस तै
कलुँ चोटहस ओस तिय कांछान
नमस्कार भविन तस भागिवानस तै
छुस बेकस तै करुम रक्षपाल

बोड प्वजि वान ओस प्राक जन्मस तै
त्रिभुवन सारन कलुँ चोटनस
मूक्ष गौ परमुँ पदवी दिचनस तै
छुस बेकस तै करुम रक्षपाल

सुय कलुँ पतुँ दक्ष प्रजापतस तै
लोगुन तुँ द्युतनस जीवादान
थोद वोथ पकान गौ प्यठ यज्ञस तै
छुस बेकस तै करुम रक्षपाल

फीर्य फीर्य अँद्य अँद्य परमुँ शिवस तै
प्रेदिक्षन दिय दिय लोग वनने
बख्युम गयोस मंज मुहस तै
छुस बेकस तै करुम रक्षपाल

है है मुह मायायि वोल्नस तै
है है क्या गोम कोरुम युथ कार
राक्षस बोज़ शरमन्दुँ कोरनस तै
छुस बेकस तै करुम रक्षपाल

आकाशुँ डुलुँविथ ब्वन वोल्नस तै
पृथ्वी प्यठ द्युतनस दोरिथ
किब्रन कोरनम तकसीर छु कस तै
छुस बेकस तै करुम रक्षपाल

* * *

वैरागस मंज दक्ष सुँज त्वता

निशुँ अन्तुँ रस्यति आगरुँ शंभू
न्यर मलुँ जलुँ गोस खरुँ शंभू
नोन गोस मंज भवसरुँ शंभू
सोन पान मोठ म्य क्या करुँ शंभू

पानस मंज ओस नोन आकाश
सत् व्यचार न्यत्रन जोज हुंद गाश
मुह वुनरि खोट में जरुँ जरुँ शंभू
सोन पान मोठ म्य क्या करुँ शंभू

मुह कठुँ कारुँ सूत्य बोजनुँ आम
रातस द्वह तै सुबहस शाम
मंदिजन द्वह म्य लोग दरुँ शंभू
सोन पान मोठ म्य क्या करुँ शंभू

क्रेठि व्वंदुँ के वंदुँ सूत्य अंदुँ वंद
म्वख आम खटनुँ तुँ गोस यख बंद
पंपोश ज़न गोस बरुँ शंभू
सोन पान मोठ म्य क्या करुँ शंभू

चंचल साँपनुम च्यत चंद्रम
त्वकटिस प्योम मनि शमुँ शबनम
बुजरुक सूर प्योम जरुँ शंभू
सोन पान मोठ म्य क्या करुँ शंभू

छुस शिशर गाँठ ज़न मनुँ किन्य सख्त
जीवुँ आरुँ रस्यतिस छमनुँ चाँज भख्त
स्वरुँ रोस मा व्यसरुँ शंभू
सौन पान मोठ म्य क्या करुँ शंभू

दुँयि हुँजि तूरि मे आत्मुँ सिरियुँ खोट
ओन बन्योस नोन ओसिथ गोस गोठ
क्रूधुँ कठ केश्य कोरुस खरुँ शंभू
सौन पान मोठ म्य क्या करुँ शंभू

संसारुँ छानन कोर मे वोरुँ कार
दारुँ कनि लोगनम दिहुँ अहंकार
तुलुँ कतर्युक लोदुन घरुँ शंभू
सौन पान मोठ म्य क्या करुँ शंभू

कोरनम कलि कालुंक्य शिशरण
धारुँ छेयि वारुँ वुथिची नेशरण
वुरिनम पां म्वखु लरुँ शंभू
सौन पान मोठ म्य क्या करुँ शंभू

ममतायि त्रुँयि कोरनस खानुँदार
दोपनम विषय भूगन पतुँ लार
घरुँ अछ लूभुँकि बरुँ शंभू
सौन पान मोठ म्य क्या करुँ शंभू

यँद्रेय शुर्य छिय ताबेदार
दार्यव कनि छिय वैथ्य नव दार
वुछ हवा कर हवस खरुँ शंभू
सौन पान मोठ म्य क्या करुँ शंभू

तृष्णा थैवमय खेदमतगार

छूवह दिथ रात द्वह घरें कुन सार
लूटिथ पनुँन्य तूँ व्वपरें शंभू
सौन पान मोठ म्य क्या करें शंभू

ज्योन मरुन मेशराव स्वखुँ सान बेह
शिशरस मंज यख त्रेशा चेह
युथ घरें छुय आश्चरें शंभू
सौन पान मोठ म्य क्या करें शंभू

रूजिथ यिथ्य सुँय घरस मंज गोस
यैच कौल्य होशस प्योस काँप्योस
तूरि हुँज छम थरें थरें शंभू
सौन पान मोठ म्य क्या करें शंभू

न्यर मलुँ नेष्कलुँ नेष्कामै
छिय बसंतुँ रंगुँ वेल्य मुँत्य जामै
पदमुँ नाभुँ पीताम्बरें शंभू
सौन पान मोठ म्य क्या करें शंभू

अमृतुँ वर्षनुँ सुँत्य चाने
यियुँ दजि मुँचि हियुँ थरि म्याजे
बामुन शामुँ स्वंदरें शंभू
सौन पान मोठ म्य क्या करें शंभू

जाला रूँपुँ जोति स्वरूँपुँ यिम
सिरियुँ ह्युव प्रत्यक्ष दर्शुन दिम
चानि तीजुँ तापुँ कति दरें शंभू
सौन पान मोठ म्य क्या करें शंभू

नोंन नेरि आत्म सिरियिकुय प्रकाश
मुह कठकेशि सुँय सुय करि नाश
आकाश वुछुँ ज़रुँ ज़रुँ शंभू
सोन पान मोठ म्य क्या करुँ शंभू

नै रोज़ि कठकोश नै सरदी
बेयि साँपुनि यिय ओसुस तिय
न्यर मल ज़ल भवसरुँ शंभू
सोन पान मोठ म्य क्या करुँ शंभू

कृष्णस सिरियुँ रूप हावि ग्वसोज
शीनुँ मंजुँ वुछि सुय नेरान पोज
सर्य गोस कर्य कर्य सरुँ शंभू
सोन पान मोठ म्य क्या करुँ शंभू

* * *

शरमन्दगी मंज दक्ष सुँज त्वता

जौज गाश मुह राच म्य गेटुँ रोवुम
सिरियुँ प्रजुँ नोवुम नुँ रोवुम द्वह

प्रेत्यक्ष आसिथ कति प्रजुँ नोवुम
मंदिजन होवुम रातुँ क्रूल्य पान
स्वरुँ पखि कति हंसा वुफुँ नोवुम
सिरियुँ प्रजुँनोवुम नुँ रोवुम द्वह

च्यतुँ कुय बालुक कति वुजुँनोवुम
सोवुम आदि प्रभातस मंज
मूर्ख बोँज मनुँ मंजलुय अलुँरोवुम
सिरियुँ प्रजुँ नोवुम नुँ रोवुम द्वह

सूरुँ मेचि मिलविथ रयूँजा त्रोवुम
पेचि काना तथ थोवुम सूँत्य
गँज रोवुम मडुँ होस्ता पोवुम
सिरियुँ प्रजुँनोवुम नुँ रोवुम द्वह

* * *

दक्ष सुन्द पछतावुन तँ शंभु महाराजस प्रसन्न करुन

भक्ति भावनायि सान छुस दस बस्तै
ज्यव छमनुँ परँ हा चौज लीला
छावुँल्य ज्यव छम मंदछन छुस तै
छुस बेकस तै करुम रक्षपाल

छावुँल्य बोलि येलि ती वौननस तै
प्रसन्न गौ असनि लोग शिव शंकर
बूज्य बूज्य दपनि लोग ब्रहमाहस तै
छुस बेकस तै करुम रक्षपाल

हे ब्रहमा जी ख्वश गोसस तै
येमिय बोलि पूजायि प्यठ कांछा
युस परि जल्दुँय प्रसन्न गछस तै
छुस बेकस तै करुम रक्षपाल

अमिय गलमोँधुर्य नाव थोवहस तै
तथ बोलि युथ परि प्रथ कांछा
शिव जी साक्षात बोजनि यियुँ तस तै
छुस बेकस तै करुम रक्षपाल

प्रजापतुँ नुँय येलि नीलकंठस तै
छावुँल्य बोलि वैज येह्य लीला
प्रसन्न गोस गछ्यतन मेति कृष्णस तै
छुस बेकस तै करुम रक्षपाल

* * *

दक्ष प्रजापतुं सुँज त्वता

कोफूर अंगुं सफेद रंगुं
लगै गंगुं जटोनी

Book Donated for
ASHRAM LIBRARY

छुनमुत छुय चें वासुक हटि
रछुँन्य मटि सौरिय छिय
आश छम गाश अनतम मंज गटि
लगै गंगुं जटोनी

परम ब्रह्मुं ही कीवलुं
छावुँल्य कलुं लोगुथ मे
चानी सूँत्यन व्वज बेयि बलुं
लगै गंगुं जटोनी

हे परमुं शिवुं परमानन्दुं
बुं चेंय वन्दुं पनुन पान
में जोनुख नुं छुस शरमन्दुं
लगै गंगुं जटोनी

न्यराकारुं न्यरंजनुं
त्रिलोचनुं छुख सोरुय
आनन्द गणुं वृषभासनुं
लगै गंगुं जटोनी

दयावानुं शंकरशनुं
साविदान मनुं धारय ध्यान
युथ ओसुस त्युथुय बेयि बनुं
लगै गंगुं जटोनी

प्रथ बालुं बालुं प्रथ वनुं वनुं
सनातनुं छारथ बो
चुंय छुख चार चुय छुख धनुं
लगै गंगुं जटानी

चिंतामणुं आतमुं दीवुं
महादीवुं ग्वसाजो
द्यन तै रात चेंय करै सीव
लगै गंगुं जटानी

यछा कुलि त्रिग्वणुं म्यवुं
च्यथ आकाशुं शबनमुं सूत्य
तथ मंज ब्याल्य फोल चुंय छुख शिवुं
लगै गंगुं जटानी

सुय ब्याल्य फोल छु सूक्षिमुं दानुं
कुल ह्यथ लंग तुं लंजव सान
हनि हनि वातिथ छुख चुंय पानुं
लगै गंगुं जटानी

चुं यिख बोजनुं ज़ाज हुँदि ज्ञानुं
अमि येमि सान सोरुय ह्यथ
धारणायि वारुं धारिथ ध्यानुं
लगै गंगुं जटानी

सेदे साधुं सूरै मति
व्वमापति छुख नजदीक
चराचरुं छांडथ कति
लगै गंगुं जटानी

द्वह लोग दरस मंज बाग स्वथि
अश्वद्ध वासनायौ सूँत्य
प्रारान बुँ छुस यिम निम वति
लगै गंगुँ जटौनी

बैरौ नाथुँ कालुँकि कालुँ
स्मरँज चाजि निशुँ बुँ छुस दूर
तवै किन्य छुस बुँ येमि हालुँ
लगै गंगुँ जटौनी

आस्तम ख्वश कास्तम जालुँ
ही भूलुँ भालुँ दयालो
करयो लोलुँ पोशन मालुँ
लगै गंगुँ जटौनी

मारै लोलुँ स्वर चे तालुँ
यितम सालुँ यज्ञस प्यठ
ख्यतम क्षीरँ खण्डुँक्य थालुँ
लगै गंगुँ जटौनी

ओसुस वारँ खोँतुम क्रूध
येति योर रूद चेतस मे
क्रूधुँ मंजुँ केह नो द्राम नुँ सूद
लगै गंगुँ जटौनी

दयावानुँ हे बडि दयुँ
मृत्युंजयुँ दया कर
बोजनुँ आख सूँत्य न्यरनयुँ
लगै गंगुँ जटौनी

जालै कंठुं गणचे म्वछि
रत्न दूँपुं बेयि धुपुं सान
प्रेयमुं सूँत्यन ह्यमथ क्वछि
लगै गंगुं जटोनी

दितम ज्यव तुं लीला परें
पेश्य भावुं निशुं रछतम मे
येति योर व्वज करें हरें हरें
लगै गंगुं जटोनी

ही अगनुं म्वखुं जटा धरें
अगनुं वैतुर अग्नस मंज
हुमै ख्यतुं शिव शंकरें
लगै गंगुं जटोनी

यितम घरें महीशरें
मनस धारें चोनुय ध्यान
प्रेयमुं चौजी पूजा करें
लगै गंगुं जटोनी

चरण चोनी द्यगंबरें
रटुंहा हरें मनस मंज
लबुं हा तार येमि भवसरें
लगै गंगुं जटोनी

साधन हुँदे हे सत संगुं
सतुंच मैति करतम लै
संसारन बुं ओन्नस टंगुं
लगै गंगुं जटोनी

कृष्णस में चाव ध्यानूँच बंगुँ
स्मरैज सँत्यन करुम मस्त
त्युथुय युथ गछुँ दबंगुँ
लगै गंगुँ जटौनी

* * *

यज्ञ म्वकुँलनुँ पतुँ नारद जी सुंद सेतारुँ वायुन

जग येलि मोकल्योव वारै कारै
नारुद वोथ सेतारै ह्यथ

दोपनस अरुँज छुम ही न्यराकारै
गछिव तोह्य स्वखुँ सान कोलास प्यठ
वनुँ होवुँ बूज्यतोम श्रुक्य हनुँ तारै
नारुद वोथ सेतारै ह्यथ

शिव नाथ साँपुन वृषभस सवारुँय
फीरिथ वननि लोंग नारदस कुन
सामुँ वीदुँक्य स्वर वन वारुँ वारै
नारुद वोथ सेतारै ह्यथ

रुँच वैन्यजि वाणी बुँ चें कन धारय
भक्ति भावनायि प्रेमुँ भावै सान
दोपनस बोजुम त्रिभुवन सारै
नारुद वोथ सेतारै ह्यथ

यथ वाणी मंज बोज जारुँ पारै
भस्माधारै कृष्णस चुँय
रूप हावुस मुचरिथ नौ द्वारै
नारुद वोथ सेतारै ह्यथ

* * *

नारद जी सुन्द ग्यवुन

सेतारु स्वर गोय कनुं नुंय कनुं नुंय
वनुं नुंय छिय विलुं ज़ारो लो लो

नीरिथ गोख मंज़ जंगलन तुं वनुं नुंय
वृषभस साँपनुख सवारो लो लो
दर्शनुं चान्युक छुस तलबगारो
वनुंनुंय छिय विलुं ज़ारो लो लो

द्वह खोतुं द्वह छुम लोल चोन गनुंनुंय
त्रोवथम चे कोत रफ्तारो लो लो
खोटथम पान तै रोटथम गारो
वनुं नुंय छिय विलुं ज़ारो लो लो

भख्तुं बागनयुं किन्य रुत छुम बनूनुंय
डेशुं हथ चुं बेयि दुबारो लो लो
हीमालुं सुँदि घरि विवाह कारो
वनुंनुंय छिय विलुं ज़ारो लो लो

तथ खांदरस मेति छाँडित अनुंनुंय
डीशिथ त्रिभवन सारो लो लो
तति बोजुं नावथ बेयि सेतारो
वनुंनुंय छिय विलुं ज़ारो लो लो

कम कम बूज़न चेय कित्य रनुंनुंय
सालुं यिख गंगा धारो लो लो
वरिथ निहन बेयि राजुं क्वमारो
वनुं नुंय छिय विलुं ज़ारो लो लो

मनुं चे वाजे नाव चोन खनुंनुय
ध्यानुं सूँत्य हा नामदारो लो लो
मुहर चौज मानान छु सोर संसारो
वनुंनुय छिय विलुं ज़ारो लो लो

शाफ छिम मनुं नुँय पाप छिम छनुं नुँय
आंफ छम व्वज कूत प्रारो लो लो
तार दिम भवसरुं करनावुं तारो
वनुंनुय छिय विलुं ज़ारो लो लो

घरि घरि दर्शुन चोन छुम बनूनुय
हृदयस मंज कोत लारो लो लो
यितुं व्वज सन्म्वख दितुं दीदारो
वनुंनुय छिय विलुं ज़ारो लो लो

कृष्ण लागि पोर्य पोर्य चान्यन ग्वणुं नुँय
छ्यतुं करतस नरकुं नारो लो लो
यितुं यूर्य यियतनय तसुंदुय आरो
वनुंनुय छिय विलुं ज़ारो लो लो

* * *

ग्वडुंजिकि हिसुक अन्त तुं दोयमि
हिसुंकि प्रारंभुं खातुरु रचना कारुं सुंज
प्रार्थना

सदा शिव सौमियो छुख पाप गालन
सदा शिव सौमियो छुख जगि पालन

सदा शिव सौमियो छुख स्वर्ग द्यावन
सदा शिव सौमियो छुख म्वकलावन
अपुज पोज सौन सौर्य छुख चुं चालन
सदा शिव सौमियो छुख जगि पालन

स्यठाहन ना व्वमेदन आश थावन
स्यठाहन गटि मंजै गाश हावन
अगन म्वखुं सूत्य पापन छुख चुं जालन
सदा शिव सौमियो छुख जगि पालन

करान छुख चारुं लाचारन तुं खारन
वेण्णुं रूपुं छुख अवतार धारण
स्यठाहन छुख चुं अंधकारुं प्यठुं वालन
सदा शिव सौमियो छुख जगि पालन

चुं छुख मायायि रूजिथ अन्द कने
तमाशा छुख वुछान अथ क्या बने
तवै छुख छ्वह दिवान कोहन तुं बालन
सदा शिव सौमियो छुख जगि पालन

अगर कांह वुंबरि मंज करि अन्तुँ रैस्य पाप
अकिय शिव नावुँ सूँत्यन तस करख माफ
क्वकर्म नहवन डेँकस छुख अर्थुँ डालन
सदा शिव सौमियो छुख ज़गि पालन

तिछुँय ब्वद्ध दिनुँ युथ असि गम चलन दूर
गुहुन युथ हटि तुँ डेंशव चँद्रमा पूर
वैलिय संसारुँ किय मायायि ज़ालन
सदाशिव सौमियो छुख ज़गि पालन

छेँ कँरमुँच असि पथकुन कर्म हानुँय
पैतिम पथ त्राव नैव नैव हाव ज़ानुँय
नैविस रछ वुछ मुँ व्वज पैत्यम्यन मलालन
सदा शिव सौमियो छुख ज़गि पालन

सैती मातायि हुंदुय छुय प्रेयम जान
अकी कथि चाजि बापत ज़ोल तमि पान
कर्म क्या जान कैर्य मुँत्य औस्य हिमालन
सदा शिव सौमियो छुख ज़गि पालन

* * *

भाग २

भगवान महादीव सुँदि शक्ति मातायि
हुंद हीमाल पुत्री गौरी (पार्वती)
हुँदिस रूँपस मंज वरण करनुक
वृतांत ।



हिमालय सुँज कथ तुँ पार्वती जन्म

करमवान ओस हीमाल बोंड दयावान
मनस मंज ओस धारान शिव सुन्द ध्यान

सु राजा परबतन हुंद आसुँवुन सर
स्यठा ओसिस खजानै लाल गौहर
सेँद्यन साधन दिवान ओस धर्म किन्य दान
मनस मंज ओस धारान शिव सुन्द ध्यान

करान ओस ईशरस कुन जारँ पारै
वनान ओसुस चुँ कर तम म्योन चारै
मनस छुम द्रख स्यठा केँह छुम नुँ संतान
मनस मंज ओस धारान शिव सुन्द ध्यान

स्यठा छुम माल दौलत गंज गौहर
स्यठा असबाब स्वन रूफ ज़र तुँ ज़ेवर
शुरा छुम नुँ अम्युक छुम येँच म्य अरमान
मनस मंज ओस धारान शिव सुन्द ध्यान

सती माता गेयस ख्वश बानुँ ओसुस
तमिस राजस निशन युन पानुँ ओसुस
जन्म ह्योत तमि तस निश गौ स्यठा जान
मनस मंज ओस धारान शिव सुन्द ध्यान

तिथै कूरा तैमिस निश येलि जाये

स्योदुय तस स्यद्ध लैक्ष्मी घरँ चाये

यिथिस भाग्य वानस सूँत्य कुस करियमान

मनस मंज ओस धारान शिव सुन्द ध्यान

त्रिकोटी दीवता छिय आसुँ वुँन्य यिम

स्यठा आदर करान ओसिय तैमिस तिम

तंछन पादन तिम ओसिय शेर दारान

मनस मंज ओस धारान शिव सुन्द ध्यान

कलान छम ज्यव तसुँदि तीजुक वनै क्या

करान ओस्य दीव, स्यद्ध, गंधर्व वाह वाह

स्व ओसुँय सिरियुँ चँद्रमुँ खोतुँ ज़ोतान

मनस मंज ओस धारान शिव सुन्द ध्यान

वनै क्या द्वधुँ नाबद कन्दुँ सूँती

रछान तस ओस्य खेदमत्गार कूँती

बबस तै माजि ओसुँय टाँठ ज़न प्राण

मनस मंज ओस धारान शिव सुन्द ध्यान

परम शक्ति हुन्द श्वभ ध्यान धोरिथ

तिमौ गौरी तैमिस थोँव नाव चोरिथ

स्वंदर माला स्यठा क्या ओस शूभान

मनस मंज ओस धारान शिव सुन्द ध्यान

रछान आसै स्यठा तस च्वंजुँ दाये

रछनुँ आये सतन मंज याम चाये

सदा शिव याद प्योस ओसुँस पतिम ज़ान

मनस मंज ओस धारान शिव सुन्द ध्यान

सैती आस मेशराविन मोज तै मोल
गन्योमुत ओस तस शिव नाथुं सुन्द लोल
प्रेयमुं सूत्य ड्यकुं लौनिस द्रायि छारान
मनस मंज ओस धारान शिव सुन्द ध्यान

गनेयस कल महादीवुंज मनस मंज
ह्यवान पै वैन्य दिवान द्रायिय वनस मंज
तिथै पाठ्य शिव लीला आस बोलान
मनस मंज ओस धारान शिव सुन्द ध्यान

* * *

गौरी माता छैं वनस मंज शिव जियस
छांडनि नेरान तुँ द्वह रात त्वता
करान

यिमै पतुँ दिमै नाद
क्यथो याद मे प्योहम

चुँय छुख जपुँ यज्ञुक जफ
चुँय छुख तपुँ वनुक तफ
चुँय छुख साधन हुंदुय साध
क्यथो याद मे प्योहम

चुँय छुख यूगियन हुंद यूग
चुँय छुख प्रोणियन हुंद प्राण
चुय छुख सतुँ कुय सम्वाद
क्यथो याद मे प्योहम

चुँय छुख नखुँ चुय छुख डखुँ
चुँय छुख दूर चुँय नजदीख
चुय छुख सारिनुँय हुंद आद
क्यथो याद मे प्योहम

चुँय छुख द्वख चुँय छुख स्वख
चुँय छुख परम आनंद म्वख
चुय छुख कम चुँय छुख ज्याद
क्यथो याद मे प्योहम

चुँय छुख साधन हुंद सत्संग
चेँय छुय तनि सफेद रंग
पम्पोश हिव्य छि चोनी पाद
क्यथो याद मे प्योहम

वीदन मंज छुख साम वीद
दीवन मंज चुँय यँदराज
दूँतन मंज छुख चुँय प्रहलाद
क्यथो याद मे प्योहम

रजो ग्वणुँ किन्य छुख ब्रहमा
सतो ग्वणु किन्य वेष्णुँ भगवान
तमो ग्वणुँ छुख गालान व्याद
क्यथो याद मे प्योहम

धरमुँचि लरि छि करमुँक्य बर
चानी वरुँ अचुन छुम
चुँय छुख कुँन चुँय बुनियाद
क्यथो याद मे प्योहम

येँम्य युस ज़ोन सुय तैम्य मोन
चुँय छुख म्योन करमुँ लोन
वनै बुँ चेँय लानिन्य वाद
क्यथो याद मे प्योहम

लोलेँन्य साज प्रेयमुँ बंगुँ
वायै रोज़ दमा बोज़
यितम यूर्य दितम दाद
क्यथो याद मे प्योहम

कृष्ण धारें नावुन ध्यान
सुय युथ ध्यान छु ब्रहम ज्ञान
हयथ शिवुं लाग दिथ समाध
क्यथो याद मे प्योहम

संकल्प त्रावि रटि मन प्राण
वासना गालि दियुं समाध
चाजि दयायि प्रावि ब्यंद नाद
क्यथो याद मे प्योहम

* * *

पार्वती मातायि हुँज शिव जी महाराजस त्वता

दया कर मे दया वानुं
बुँ छस पानुं दयालो

चु छुख ड्यकुं प्यठुक टिकुं
बुँ छस बुधि प्यठुक तीज
ड्यकस टिकुं छुय शूभानुं
बुँ छस पानुं दयालो

चुँ छुख द्वह तुँ बुँ छस रात
चुँ आकाश तुँ बुँ बुतरात
चुँ छुख दान तुँ बुँ छस दानुं
बुँ छस पानुं दयालो

चुँ छुख पोशनूला जान
बुँ छस आरुवल शूभान
अकिय रंगुं छिय आसानुं
बुँ छस पानुं दयालो

बुँ छस कारतिकुँच जून
स्यठा ख्वश तुँ महजून
वहिकुँकि सिरियुं छुख जोतानुं
बुँ छस पानुं दयालो

बुँ छस स्येज चुँ छुख सादुँ
अकिय नादुँ सूँत्यन यिम
मोसुम छस तुँ बुँ क्या ज़ानुँ
बुँ छस पानुँ दयालो

चुँ छुख त्रैलूकुक राजुँ
बुँ छस राज रेँज चेंय हिश
चें ह्यू कुस छु सुय बु मानुँ
बुँ छस पानुँ दयालो

चुँ छुख आत्मा बुँ छस प्राण
अकिस जायि छि मेलान
चुँ छुख अमृत तुँ बुँ छस बानुँ
बुँ छस पानुँ दयालो

चुँ छुख मालि हुँदिय फँल्य
बुँ छस पन तथ तैल्य तैल्य
पनुँ सूँत्य मालि छिय ज़पानुँ
बुँ छस पानुँ दयालो

चुँ छुख त्रेषुँ मंज चँद्रम
स्यठा ख्वश कुन्युक नुँ गम
रोहिन छस बुँ क्या शूभानुँ
बुँ छस पानुँ दयालो

मेषि हुँदै सिरियुँ भगवानुँ
ख्वश आसान छुख तथ मंज
मेषि सूँत्य चेंय छुय यारानुँ
बुँ छस पानुँ दयालो

मकरि हुँदि भोमुं दीवुं
चाँजी सीव करै न्यथ
युथ रत छुय नुं कांह मकानुं
बुं छस पानुं दयालो

कन्ये हुँदे प्रेमुंकि ब्वद्धुं
रछथ द्वधुं तुं नाबदुं सूत्य
जल यिम छिम मे लूख गेलानुं
बुं छस पानुं दयालो

कर्कीटि हुँदे बृहस्पतुं
छस पतुं पतुं चेंय छारान
जोतुंष्य चेंय छिय रत गँजरानुं
बुं छस पानुं दयालो

मीनि हुँदि शुक्रुं मन साविदानुं
प्रसन्न पानुं करतम मन
मनुंक्य सीर छसय बावानुं
बुं छस पानुं दयालो

तुलायि हुँदि शनिश्चरुं
व्वचुक घरुं पनुन छुय
छांडथ वारुं धोरिथ ध्यानुं
बुं छस पानुं दयालो

म्यथनि अंदर ख्वश छुख राह
हे पादशाह स्वखुं फोजुं सान
संकटा दशा छुख गालानुं
बुं छस पानुं दयालो

सिहमि हुँदे हरषुँकि कीतुँ
गमुँ दूँतौ निश म्वकलावतम
छसै स्वख द्वख च़ेय पुषुँरानुँ
बुँ छस पानुँ दयालो

लक्ष्मी हुँदे नारायणुँ
आयसै मनुँ शरण च़ेय
च़ुँ छुख भावुँ सूँत्य टोठानुँ
बुँ छस पानुँ दयालो

सावित्रि हुँदि ब्रहमा जियुँ
चोनुय रूँफ म्य यियुँ ख्वश
दर्शुन दिम छसथ छ़ारानुँ
बुँ छस पानुँ दयालो

पार्वती हुँदि परमीश्वरुँ
यितम घरुँ पनुन छुय
हृदयस मंज छु चोनुय थानुँ
बुँ छस पानुँ दयालो

ईशरुँ कोनुँ छुख यिवानुँ
दर्शुन कोनुँ छुख दिवान
संगदिल छुख नुँ छुख लागानुँ
बुँ छस पानुँ दयालो

पालना छुख च़ुँ म्यौज करान
बुँ छस चौज सीवाकार
कृष्णस टोठ म्य महीशानुँ
बुँ छस पानुँ दयालो

ग्रहघन मंजस छुख सनिदानुं
गुँहुँघ बल ति तैमिस कास
लूकन मंज छस मन्द छानुं
बुँ छस पानुं दयालो

* * *

गौरी मातायि हुंद नागुं बठिस प्यठ शिव जी सुंद ध्यान धारुण

यिथै पाठ्य शिव लीला लैज वनूने

वनान वनान सदाशिव लैज बनूने

तिछुंय गयि मस्त रूदुस नुं कुन्युक होश

फोलिस लोलुं सरस मंज प्रेमूं पम्पोश

शिवुंय साँपुंज द्युतुन शिव नाथ सुंय दिल

पननि पानुंच खबर रूजुंस नुं बिल्कुल

वनस मंज छ्वह दिवान आस रूस्य कंट ज़न

शरण गयि ईशरस पुशरिथ स्व तन मन

वनै क्या तथ वनस आस्य धन भागुंय

येते माता भवाजि कंर भक्ति लागुंय

सु जंगल ओस कोता कर्म वानुंय

येमिस मंज परमुं शक्ति होव पानुंय

वनै क्या आस्य कुल्य यिम इसतादय

ल्वभुख पोर्य ज़ातुं खोतुं कदुर ज़यादय

तिमन कुल्यन यिम आस्य फोल्यमुंती पोश

तिमन डीशिथ सपुंज त्वलसी ति बेहोश

वसो वुंजुं आसुं पाजिचुं नहरुं क्या ख्वश

बुछिथ म्वधुरेर तिहुंद गौ नाब्दस गश

सबुंज कछ वथरिथ तल पादनुंय दवन

सपुन मखमल तुं प्रजल्यव ओइना ज़न

हवा कोस्तूर्य नाफा ज़न मुशुक दार

स्व ज़न आकाशुं प्यठुं वेछ अमृतुंच धार

करान पक्षी सैमिथ आस्य बोल बाशे

वनान आस्य शिव शंकर अविनाशे

ग्यवान आसुं बागुंनैय मंज कुकिलुं गू गू
 मैलिथ भस्मा वनान आसुं शिव शंभू
 सैमिथ कुमरी प्रयमुं सूत्यन वनान आस्य
 चै छुय वासुक हटे असि लोलजी फांस्य
 हवा सूत्यन वनान ओस पन कुल्यन हुंद
 करन आस्य नालुं मैत्य छुय लोल तैम्य सुंद
 वनान ओस जल ज्वयन हुंद हे सदा शिव
 रटन शिव जी तवै छम त्राव मुँच दौ
 सैमिथ सारी वनान आस्य ही भवौनी
 चुं छख शिव शक्ति रूफ अस्य भक्त चौनी
 करैनि दीवीयुं हुंद आयि दिव्य दर्शुन
 कोरुख आकाशुं प्यठुं तस पोशुं वर्शुन
 नजर त्रावुंन वुछुन अख नागुं रादा
 वसिथ तथ मंज दिचुंन लोलुंज समाधा
 पेरैन लीला सदाशिव शाद साँपुन
 प्रेयमुं सूत्य शिव भक्तिस नाद साँपुन

* * *

शिव जी महाराज छि गौरी मातायि हुँज परीक्षा करनुं बापथ रखुंत बदलोविथ यिवान

सदा शिव जूग्य लोगिथ ओस लारान
 वनै क्या हालुं कमि ओस छालुं मारान
 हरनुं मुस्ता वैलिथ भस्मा मैलिथ आस
 बैनिथ वनवोस्य लोगिथ जूग्य सैन्यास
 महा माया दपान ओस भ्रमुरावन
 प्रेयम कोता छु तस म्योन आजमावन
 कुंनुन छुस भावुं वानस लोलुं कुय स्वन
 मनुंच कहवेट बुं लागस छा सु कुन्दन
 गछ्यस लेलुंच नदी जौरी कमिस कुन
 यि गँजराविथ दितुन आलव तैमिस कुन
 करौ सम्वाद चुं कन थाव राजुं कूरी
 छु क्या करमस चे पुशुं प्योमुत ति पूरी
 कुजी जेज यथ वनस मंज क्याजि आयख
 कसुन्द छुय लोल छारैनि कस चुं द्रायख
 सतन मंज युन पज्या येछुनुंय वतन मंज
 गँडिथ क्यमखाब डुलुं गैन्य दिन्य दतन मंज
 दोपुस दीवी म्य छम शिव नार्थु सुँज माय
 दोपुस तैम्य छुय सु बे परवाय है हाय
 गरा आसान छु शीतल ज़न सु कोफूर
 गरा आसान स्यठा क्रूधी स्यठा कूर
 पकुं वुन छुय नुं वीदचि वति कुन सुय
 येमिच यछा गछान छस तिय करान छुय

शकर वुठव मेकर व्वज शिव नाथ शिव नाथ
 सुनाता हूं तुझे मैं धर्म की बात
 करुन ह्य तफ तूँ ज़फ श्रीराम सुन्द नाव
 बहुत लक्ष्मी वह देवे है रखो भाव
 ज़पन छुस रात द्वह श्रीराम श्रीराम
 मुझे है कुछ नहीं इसके सिवा काम
 म्य छुम नुँ लूभ कुनि कुय छुस बुँ सैन्योस्य
 म्य छिम सौरिय वनान वोरोग्य वनवोस्य
 अथस क्यथ छुम फकत मे अख कमंडल
 फिरा करता हूँ मैं मंडल ब मंडल
 बनिय सरतलि स्वन कन थाव चुँ मे कुन
 अगर ज़न ध्यान दिख चुँय म्याजि कथि कुन

* * *

गौरी मातायि हुँद जूगिस जवाब द्युन

हतो साधो मतो वनतम म्य पिछ कथ

सतुँच कथ त्रावमुँच छै रौव मुँच वथ
त्युथुय तफ साध युथ न्यरमल गछिय मन

द्वई त्रावख वुछख पानै सु हन हन
बु बाबा जी वनै चेंय अख जवाबा

अलख बोलख पवलख ज़न रुत गुलाबा
अगर औज़ा चुँ म्योज़ थावख मनस मंज़

गछख साधख चुँ तफ डण्डख वनस मंज़
द्वई त्रावख कपठ थावख नुँ अख जौ

कहूंगी मैं तुझे क्या है सदा शिव
चें छुय मन औनुँ योदवै कासुँ हस खै

बताओंगी तुझे शिव नाथ क्या है
ननान छुख जीव अमा योदवै बनख दीव

सुनाओंगी तुझे क्या है महादीव

* * *

जूग्य छु पार्वती मातायि सूँत्य वाद विवाद करान

दोँपुस साधन म्य प्यठ नाहक गयख तंग

करान छख जंग थिथुँ पौठ्य गौ नुँ सत् संग
कपट त्राविथ म्य वौनमै मन थविथ साफ

गरज कया छुम म्य चेंय निश कर चुँ इन्साफ
म्य छुम फेरान चुँ छख ना कया स्वंदर माल

वनै कया छुय चें गोमुत हालि बेहाल
म्य छुम फेरान चुँ छख ना सिरियुँ न्यरमल

कमी कोरनै चें युथ छल रौटुथ जंगल
म्य छुम फेरान चुँ छख ना तीजुँ वुजमल

गछख मा व्वज चुँ नाहक मीघ सुँय तल
म्य छुम फेरान चें त्राविथ फर्श मखमल

चुँ क्यथ पौठ्य घरि द्रायख कॅम्य कॅडुँय कल
चुँ छख कमि प्रेमुँ बागुँच युँछ यँबुँर ज्वल

म्य छुम फेरान बोम्बूरण कॅम्य कॅडुँय कल

* * *

जूग्य सुन्द तुँ माता पार्वती हुँद विवाद छु जारी

च्यतुँ सुफारूक्य चाफ ओलुँ सुफारी
घरँ गछ राजुँ क्वमोरिये

सतुँ वर्यशुँय छख ख्यतुँ चतुँ वारै
मारै मतुँ करतुँ पननुय पान
सु कवै ज़ानिय करूँज खानुँ दौरी
घरँ गछ राजुँ क्वमोरिये

तस सूरँ मेत्य सुँय कति धन दौलत
मस्त छुय आनंद अमृथ चथ
नै छुय गृहस्थ तुँ नै व्यवहारी
घरँ गछ राजुँ क्वमोरिये

वनुँ खै तीजुँ सोस सिरियुँ भगवानुँय
रूपुँ छुय बडि बोड दीवन मंज
खसुँज छस शूभिदार रथ सवारी
घरँ गछ राजुँ क्वमोरिये

शूभी वेष्णुँजू लक्ष्मी वानुँय
सुय शूभि सानुँय शामुँ स्वंदर
तैम्य यथ ज़गतस अवतार धोरिय
घरँ गछ राजुँ क्वमोरिये

दपुं खै ब्रहमा ति छुय गवणुवानुंय
वीद वखनानुंय न्यथ सत् रूप
संसारस व्वपदावान च्वपौरी
घरुं गछ राजुं क्वमोरिये

यिम त्राविथ छख कस पथ लैजमुंच
संकल्पुं कलि ज़न लैजमुंच जून
कंदि बापथ छै यीच लाचौरी
घरुं गछ राजुं क्वमोरिये

वुछ्य वुछ्य चेंय कुन ताब छुसनुं अननुंय
वननुंय छुसै व्वज ह्यत्कारुं पुछ्य
मन थव प्रसन्न रोज़ बोज़ कन दौरी
घरुं गछ राजुं क्वमोरिये

है है येम्य सुंज़ कल छै गननुंय
त्राविथ सु च़लिय वनुं नुंय मंज़
बूज़मुत छुय साध कस द्रायि सौरी
घरुं गछ राजुं क्वमोरिये

गमुं रौस वुछान छुस मंज़ व्यवहारस
अम दम फीर्य फीर्य संसारस
कम कम राजुं कम कम संसौरी
घरुं गछ राजुं क्वमोरिये

त्यागुं वौरागुं रौस रोज़ व्यवहौरी
व्यवहारुं मंजुं व्वपकौरी आस
कृष्णुं कर रागुं द्वीषुं रौस खानुं दौरी
घरुं गछ राजुं क्वमोरिये

* * *

गौरी जी हुंद जूगिस फटकार

हतो साधो कपट सोरय वनान छुख

न चुँय जूगी न सैन्यासी ननान छुख

हयुवुय फंबुँ ड्यूंग हायख केँज वनान छुख

बुँ केँह बोजै नुँ चुँय नाहक छयनान छुख

अबस ख्वनुँवटुँ सूत्यन ख्वड खनान छुख

अबस माघस अन्दर शीना कुँनान छुख

वनान खारा फलुँच हारा रनान छुख

गछिथ व्वलरस चुँ नाबद फेल्य छुँनान छुख

* * *

गौरी मातायि हुंद जूगिस नसख छु जारी

न चुँ छुख जूग्य तै न चुँ सँन्यास
भस्म मलनुक व्वज आँस्यनै पास

अलुँ गडुर सूँत्य छुय कोरमै माफ
पाफ मा खस्यम नतुँ दिमहै शाफ
युथ पजि हिय त्युथ करैहै त्रास
भस्म मलनुक व्वज आँस्य नै पास

कपटा वौनुथ केह छुनुँ शिव जी
मूर्ख बोज हुंद ह्यू संवाद छुय
महा कालन छुय कोरमुत ग्रास
भस्म मलनुक व्वज आँस्यनै पास

कलि कालन मा पान होवुय
सूँचमुत सोरुय कर्म रोवुय
चंद्रायुण चाफ कर व्वपवास
भस्म मलनुक व्वज आँस्यनै पास

कन दारिथ रोज बोज सम्वाद
च्यथ थाव तस कुन कथ थाव याद
अदुँ छुख साध तै अदुँ वनवास
भस्म मलनुक व्वज आँस्यनै पास

कनस कर थप अदुँ वनस मंज फेर
धरमुँचि लरि छै करमुँच हेर
येति योर शिव शिव करहुन आस
भस्म मलनुक व्वज आँस्यनै पास

कृष्णुँ चोन मोल मोज छुय ईश्वर
लोलुँ सान बोल साँ शिव शंकर
जन्मुँ जन्मुँ आसख तसुंदुय दास
भस्म मलनुक व्वज आँस्यनै पास

* * *

सदा शिव सुंद पार्वती मातायि
प्यठ प्रसन्न सपदुन तुँ पनुन असली
रूफ धारण करुन

शरण डीशिथ फिरुन जूगिस वर्ण प्योस
सदा शिव जी त्युथुय साँपुन युथुय ओस
सतुक सम्वाद बूज़िथ साध ख्वश गौ
शरण डीशिथ बन्यव जूगिस सदा शिव
सतुक संवाद छुय क्वद्रथ करान नैज
सतुँकि संवादुँ सैत्य छै कँज बनान थैज
सतुक संवाद छुय न्यैत्रन अनान गाश
सतुक संवाद छुय पापन करान नाश
सतुक संवाद बूज़िथ मन चुँ ख्वश थव
सतुक संवाद छुय पानै सदा शिव
शरण गछुन दिवान छुय औरत्यन वर
शरण गछुन करान जीवस छु ईशर
शरण गछुनुय क्षनस मंज मूक्ष द्यावान
शरण गछुनुय छु लूकालूक हावान
शरण गछुनुय करान छुय आत्मुच ज्ञान
शरण गछुनुय छु हावान स्वात्म शिव पान

* * *

शिव जी महाराजन धोर पनुन असली रूफ

वुछुन जूगिस बन्योमुत ब्याख रंगा
खैसिथ बृषभस वसान तस शेरि गंगा
सफेद तन आँस न्यरमल ज़न तुँ कोफूर
करोरन सिरियनूय हुँदि खोतुँ चोर नूर
अथन द्रन ह्यथ सु पंपोशा त्रिशूला
तिथै तमि पेर दासुँ भावुँच खासुँ लीला

* * *

गौरी माता छि ख्वश गछिथ शंभू महाराजस त्वता करान

हे शिव शंकरें परमीशरें हरें
भस्माधरें कालुं संहोरी

अमर नार्थुकि अकालुं अमरें
बुं मरें चें पथ ह्यथ सोरी
सुय जिंदुं मरुन छु दीवन ति आश्चरें
भस्माधरें कालुं संहोरी

सतुंच वथ हावुंवुन छुख सतुगवरें
चुंय छुख महा व्यचोरी
चुंय छुख प्रश्न तुं चुंय छुख व्वतरें
भस्माधरें कालुं संहोरी

चुंय छुख माता पिता चराचरें
चुंय छुख बांधव तुं बन्ध सोरी
चुंय छुख पनुन तुं चुंय छुख व्वपरें
भसमाधरें कालुं संहोरी

चुंय छुख वेष्णुं रूप्पुं महीशरें हे हरें
संसारस आख अवतारी
राक्षस गोलिथ भक्त करिथ खरें
भस्माधरें कालुं संहोरी

वीदुँच शूभा छुख चुँ वेंद्याधरें
चुँय वातिथ छुख च्वपारी
कृपा करतम छुम चोन आसरें
भस्माधरें कालुँ संहारी

गंगायि, गयायि, प्रयागुँ, पुष्करें
धरमुँकि फलुँ पाप न्यवारी
चुँय दीवन हुंद दीव छुख महीशरें
भस्माधरें कालुँ संहारी

न्यथ सुलि व्वथुँ हा पतिमि पहरें
चरनन लगुँ हाय ध्यानुँ पारी
दया म्य करतम दया सागरें
भस्मा धरें कालुँ संहारी

महाराजुँ बेनिथ यितम जटाधरें
सूँत्य ह्यथ शूभिदार सवारी
कृपा करतम वरतम स्वयंवरें
भस्माधरें कालुँ संहारी


शिवनाथन तोरें दोपनस बुतिय करें
यिय वनुँहम राजुँ क्वमारी
ख्वश रोज़ स्वखुँ सान व्वज गछ पनुन घरें
भस्माधरें कालुँ संहारी

शेँछ ह्यथ वातिय नारद मनीशरें
करुँनावि खांदुँहुँच तयारी
यिमै तुँ निमथ हालुँय गछिय सरें
भस्माधरें कालुँ संहारी

चोन म्य तुँ कृष्णस प्रेयम दिगम्बरें
चौज भक्ति छम सरदौरी
औषध मन्थुर जपुँ न्यथ षडाक्षरें
भस्माधरें कालुँ संहारी

* * *

Book Donated for
ASHRAM LIBRARY



शिव जी तूँ पार्वती मातायि हुंद मश्वरु

महादीवन दोपुस अज़हद कोरथ तफ

बुँ कोरथस ख्वश स्यठा दफ क्या गछिय दफ
यछख योदवै तूँ पख मे सूँत्य वुजक्यन

पकख नै अदुँ करुन क्या गछि ति चुँय वन
दोपुस तमि छम यछा हीमालुँ सुन्द यिख

त्रिकूटी दीव ह्यथ, तैत्य मे वरिथ निख
दोपुस तैम्य चोन सोरुय छुम म्य मन्जूर

बुँ छुस चैय सूँत्य सूँतिय छुस नुँ केंह दूर
युँ फरमावख बुँ तथ कुन न्यथ थवै च्यथ

सैआदत छम सैआदत छम सैआदत
बुँ सोज़ख सतुँ रैष्य अरुंदती ह्यथ

मुकरर तिम करन येति खादुँरुँच कथ
तिमन येति पानुँ नारद र्योश बुँ सोज़न

लदख शेछ तिम तसुँज़ वौणी बोज़न
चुँ गछ व्वज माजि मौलिस वार्ता वन

यि बूज़िथ युथ लदन तिम हनि प्यठ हन
बुँ छुस शिव शक्ति रूँपुँ वातिथ च्वपोरुय

येमिस द्युत मे तैमिस चे द्युतुथ सोरुय
बुँ छुस चैय सूँत्य चुँय मे सूँत्य छख न्यथ

ख्वहय छुय सथ ख्वहय छुय सथ ख्वयह सथ
चुँ छख गौरी बुँ छुस शंकर छु क्या ब्यन

छु कोरमुत कर्म लौनी असि पैव्यन
चे सूँत्य केंह मे तफावत छनुँ कन थाव

छु गौरी शंकर व्योद मे कुनुय नाव

य्वहै नाव युस ज़पिय तस कासुँ संकट
 दया करुवुन बुँ रोजै न्यथ तैमिस प्यठ
 यि नाव न्यथ ज़पुँ वुँन्यन स्वर्ग द्यावै
 यि नाव ज़पुँ वुँनिस बो मूक्ष्य प्रावनावै
 बनेमुँच पानुँ 'बुँय बुँय' सूँत्य छख चुँय
 चै तै मे कांह ति भ्यन छुनुँ छम पनुँज द्रिय
 वनिथ यिय गौ सदाशिव कोहि कैलास
 अमिय लोलै, अमिय प्रेमै द्वहै आस
 बेनिन कृष्णस मे यैच भक्ति तुँ यैच लोल
 म्य चुँय छुख गौरी शंकरुँ मोज तै मोल

* * *

माता पार्वती हुंद वापस घरें युन

भवौनी आयुं अंज जंगल ब खानै
वनै क्या तफ करुन ओसुस बहानै
महा माया स्व आस ना पननि पानै
छु सोरुय खग तैम्य सुंद अख निशानै
तैमिस अजलै शिवस सँत्य म्युल गोमुत ओस
यिथै ज़ाहिर ज़मादा तफ करुन ओस
हुँरुयव तस तपुँ सँतिय तीज कोता
वनै कोता करै व्वज कुँसुँ कोता
पकुन यामत ह्योतुय तमि घरें कुनुय
वुछिथ लूकौ तैमिस वोन डेंशुँ वुनुय
कोरुय कूरी स्यदन साधन चें प्रसाद
चें दीवी पेश छुय सोन आफरीन बाद
वुछिथ मीनावती गयि वारया ख्वश
हिमालय राजुँ लोँग तस करनि शाबश
प्रज़ल्वुन तस वुछुख करमुक सुप्रकाश
कोरुख तस मरहबा शाबाश शाबाश
चें ओसुँय बालुँ पानै येंच सतुँच लै
चें भविनय जै, सदा शिव सुँज दया छै

* * *

मीनायि तूँ हीमाल सुँद्य पार्वती तारीफ

प्रेयम शिव सुंद चें ओसुय ज्यनुं कालै
करै बो लोलुं पोशन पोशुं मालै

दिचथ हरनुंजुं छालै लोलुं डालै
सदा शिव पानुं छोंडुथ बालुं बालै
चें टोठ्योय बालुं पानै भूलुं भालै
करै बो लोलुं पोशन पोशुं मालै

दक्षन दीशुक चोलुय जल्दुंय मलालै
चें वरने वाति शिव जी कमि हालै
चें रुत छुय ल्यूखमुत पनने कपालै
करै बो लोलुं पोशन पोशुं मालै

गनान छम प्रय वनन हुँद्य पोश वालै
चें लागै पोश मिलविथ अरधुं चालै
छें कृष्णुंज पालना चाने हवालै
करै बो लोलुं पोशन पोशुं मालै

* * *

रचना कारुँ सुँदि तरफुँ त्वता

करुँज भक्ति त्वता छै परम शक्ति

छै भक्त्यन चौज भक्ति नेक बख्ती

छै भक्ति चौज कासान सौज सख्ती

छै भक्ति चौज भक्त्यन नित्य म्वक्ति

* * *

शिव नाथ सुंद अरुणद्युती तुं नारद मुनीशर हिमालस तुं मीनायि निशि कोरि मांगयि सोजुंन्य

र्योशा अख ओस ओसुस शिव सुंद भाव
तैमिस छिय सूत पौरानिक दपान नाव
रक्षीश्वर बोड मुनीश्वर कर्म वानुंय
मनस ओसिस खेनिथ अरदाह प्वरानुंय
यिथै पाठिन दिवान छुय वीद सोक्षी
तैपूवनुं प्यठुं शिव जी आव कोषी
बनारस नाव कोषी हुंद छु मशहूर
महा दीवस छु तमि दीशुक प्रेयम पूर
बसान युस तति म्वक्ति छै बनान तस
सदा शिव पानुं शिव लूकस अनान तस
तोतुय वोतुय तुं सतुं रेण्य मंगुं नौविन
तिमन सोरिय मनुंक्य सिर वारुं बौविन
अरुणद्युती बमै नारद मुनीश्वर
सपुंन्य होजिर तिमन लोंग वननि ईश्वर
छु तारक नावुं दूथा अख बजोरेंय
तैमिय न्यूमुत छु दीवन राज सोरुय
छि तस निशुं दीव लाचार आमुंत्य
बहर अतराफ छिय तफ करनि द्रामुंत्य
तिमन वोनमुत जि छु ब्रहमा जियन यी
छु रोजी तारकस प्यठ पानुं शिव जी
करिव तफ शिव नाथस बनि संतान
लैभिव अदुं राज सुय हेयि तारकस जान

सु तारुक धर्म करमै पेंयुं तोत ताम
 शिवस संतान व्वत्पत गछि योत ताम
 बहाना ज़ाहिरुक तस युथ वनुन प्यव
 नतै नैष्काम नैष्कल छुय सदा शिव
 गछिव तोह्य तस हिमालस निश वनिव यिय
 अनोन गौरी वनान यिथुं पाठ्य शिव जी
 छु फर्मावान यिथै पाठ्य शिव शंकर
 करौ गौरी सूँत्यन अस्य स्वयंवर
 यि बूज़िथ सतुं रेण्य अरुणद्युती ह्यथ
 पकान गयि वैजिख हीमालस हकीकत
 भविन जै जै चें हिविस भाग्य वानस
 सदा शिव पानुं यियिय कजि दानस
 चुं छुख बोंड भाग्यवानुंय कर्मवानुंय
 यियिय शिव नाथ हेनि चेंय कजि दानुंय
 छु वीदुक आद युस ओमकार सुंय मंज
 यियिय सन्म्वख सु चोनिनिस दार सुंय मंज
 निरंजन, न्यरमल, न्यरग्वण, न्यराकार
 न तस क्रूधुंय न तस लूभुंय न्यराहार
 महा मायायुं हुंद छुय कर्म लोनुंय
 दियिय दर्शुन यियिय सुय घरें चोनुय
 तिथै मीनावती येति बोजुं नौवुंख
 स्यठा साँपुंज प्रसन्न यकरार द्यावुंख
 दोंपुख हीमालुं नुंय मंजूर छु मंजूर
 पुनिम चँद्रम खोतुम मे पूरि कनि पूर
 यि कथ चेंतस थैविव मोनिव यि दैगथ
 म्य वोनमुत वाख तोह्य ज़ानिव सतोसत
 ह्योतुख र्वखसथ तिमन निश आयुं कौषी
 महादीवस दोंपुख ही अविनाशी

यि केंछा असि आसुंय आंझा चौज
 अकुंय कथ बोज वुन पानै तिमव मौज
 यि बूजिथ वार्या ख्वश गौ महीश्वर
 तिथै हांजिर सपुद नारद मुनीश्वर
 महादीवन दोपुस शेछ बोज थौकन
 गछिथ ब्रहमा जुवस वेष्णस यि कथ वन
 त्रिकोटी दीवता ह्यथ असि निश यिन
 वुछिथ वेला समिथ तिम हांजिरी दिन
 यि बूजिथ द्राव नारद जी तुजिन दौ
 पकान गौ वेष्णु लूकस वातिथुंय प्यौ

* * *

नारद जी सुँज वेष्णुँ भगवानस शेँछ करुँज

हरे नारायणस लोग बावने हाल
महाराजा महादीवुन चेँ छुय साल

चुँ रामुँ रूँपुँ किन्य सुँतायि टोठ्योख
चुँ कृष्णुँ रूँपुँ किन्य राधायि टोठ्योख
तुलुथ चेँ किसि प्यठ गोवर्धनुक बाल
महाराजा महादीवुन चेँ छुय साल

चेँ लोलुँच थैज खेयथ जसुदायि निशे
चुँ रूदुख लोलुँ किन्य क्वबजायि निशे
सुदामुँनि अथुँ चेँ खेयथ कोम सिरिच चाल
महाराजा महादीवुन चेँ छुय साल

बनोवथन अकि सिर्य म्वछि सुँत्य सु धनी
दोयिमि म्वछि अथुँ चेँ रोटने रुकुँमेणी
व्यनथ करनय दिहस कोता ज़रो माल
महाराजा महादीवुन चेँ छुय साल

विभीशनस द्युतुथ लंकायि हुंद राज
कलस प्यठ चेँ थोवुथ स्वग्रीव सुँय ताज
चेँ बखशोवुथ बलिदानवस ति पाताल
महाराजा महादीवुन चेँ छुय साल

वछ्यन तै बालकन ह्यथ गोंय चै ब्रहमा
बनोविथ तिम तिथिय तस कॅरॅथ क्षमा
चुं टोठ्योख गूपियन छुय नाव गोपाल
महाराजा महादीवुन चें छुय साल

मेरिथ आस्य दीवकी गामुँत्य शे संतान
अनिथ दित्यथस दिलुक कोडथस चें अरमान
तिम आस्य गंधर्व बनेमित्य हे जगतपाल
महाराजा महादीवुन चें छुय साल

परिथ वेँद्या ग्वरन दक्षना मँजिय जान
गछ्यम वापस अनिथ मे मूदमुत संतान
फोँटुम समंदरस वेँद्य वेँद्य मे गेल्य लाल
महाराजा महीदीवुन चें छुय साल

मनस येलि राग सनतानुँ सुंद स्यठा गोस
अनिथ तमि रूँपुं द्युतथस युथ तैमिस ओस
कोरुन अस्त्वथ चै कुन चुँय छुख फिरान काल
महाराजा महादीवुन चें छुय साल

शंकास्वर दूँत मोरुथ शंख तैमिस द्राव
चें तथ शंखस छुय थोँवमुत पंच ज़न्य नाव
तवै बापथ दिचुँथ पोजिस अंदर छाल
महाराजा महादीवुन चें छुय साल

करॅनि लग्य पाँछ पांडव चौज पूजा
स्यठा गौ रश्क राज़न क्या यि शूभ्या
सुदर्शन चक्रुँ मोरथन चेंय शिशुपाल.
महाराजा महादीवुन चै छुय साल

छु कस ताकत वैनथ हेंकि चोन चर्यथ
शुरा सास आठ अख हथ त्र्युं वर्यथ
वरिथ छुख बालुकुय चैटिथ मुहुन जाल
महाराजा महादीवुन चें छुय साल

बनविथ रूप ब्योन ब्योन प्रथ अकिस सूंत्य
कुनुय आसिथ करान ओसुख चुं दिह कूंत्य
स्पठा शरमंदुं गोसै त्युथ वुछिथ हाल
महाराजा महादीवुन चें छुय साल

चें खोरिथ म्वखतुं मालि कित्य म्वखतुं कुली
मँजिम योर्य राधिकायि हुँद्य कूंत्य तुली
तिथै पौठ्य वालि शिव जी रूदुं कनि लाल
महाराजा महादीवुन चें छुय साल

वरेंथ यिथुं पौठ्य श्री आसुय तसुँज प्रै
तिथै पौठ्य शंकरस गौरी वरेंज छै
करुन छुय वार्या ख्वश तस ति हीमाल
महाराजा महादीवुन चें छुय साल

कुनुय छुख आसुं वुन छिय लछ बैद्य नाव
सदा शिव रूपुं कृष्णस दर्शुना हाव
अभीदुं भक्ति बखशुस तस दुयी गाल
महाराजा महादीवुन चें छुय साल

* * *

वेष्ण जी, ब्रहमा जी तू त्रिकूटी दिवता छि यिवान

यि बूज़िथ श्री वेष्ण जी ख्वश स्पठा गौ
 वननि लोग सोन सामी छुय सदा शिव
 अछिव किन्य अस्य पकव हर्षस थविथ मन
 चुँ गछ ब्रहमा जियस वन सूँत्य सुय अन
 गँडिथ गुल्य द्राव नारद जी तसुँज कथ
 वजिन ब्रहमा जियस सूँत्य आव तस ह्यथ
 खबर नारद जियन कर जायि जाये
 त्रिकोटी दीवता बूज़िथ ति आये
 खसिथ गरडस मुरोरी कर तयोरी
 शिवस निश आव ह्यथ सुय दीव सोरी
 गँडिथ गुल्य कोरुख शिव नाथस नमस्कार
 छेँ क्या असि आज्ञा सोरी छि तयार
 महादीवन दोपुख नारद मुनीश्वर
 ग्वडज शेछ ह्यथ गछिन तोत ती छु बेहतर
 गछिथ वोन नारदन हीमालयस यी
 त्रिकूटी दीवता ह्यथ ओय शिव जी
 पकान छै मे पतै तसुँजुय सवारी
 तयोरी कर तयोरी कर तयोरी
 खबर बूज़िथ बजाविन शोद्ययानै
 वजुनि लोग जा बजा नगार खानै
 मुवोफिक आव मे व्वज दौरे ज़मानै
 बनिथ महाराजुँ यियुँ शिव नाथ पानै
 सदा शिवस निशे नारद मुनीशर
 सपुन हाजिर तूँ दोपनस हे महीशर

पकिव हीमालुँ सुँद्य किन्य छनुँ कुनिच तौर
 वुछिम तस वार्या ह्यमथ तुँ बेयि धोर
 खबर बूजिथ सपुँज सालुँच तयोरी
 सवोरी ओस दीवन हुँज चवपारी
 वुछुख लैगना गृहुँद्य तथ प्यठ क्यँदुर्य बीठ्य
 स्यदथ आयि यूगिनी ह्यथ तथ दितिन मीठ्य
 सदाशिव द्राव ह्यथ त्रैलूक सोर्य
 लछन हुँद्य लछ करोरन हुँद्य करोर्य
 खैसिथ गरडस च्वतुर ब्वज श्री नरायण
 पकान अमृथ छकान ओस शंख वायन
 करान ओसिस त्वता गंधर्व सोरी
 हरे गूपाल श्री गोवर्धन धोरी

* * *

रचना कार छु वनान

कलन छम ज्यव डलन छुस छुय सथुंय सथ

छु कस ताकत सु करि तमि खांदरेंच कथ
समेमुँत्य औस्य सालर क्या वनै कूँत्य

सदा शिव ओस क्युथ कम औस्य तैमिस सूँत्य
महाप्वरशन महादीवुन महात्मुँय

वनुन द्वरलभ म्य ब्वद्ध क्यथुँ पौठ्य वातिय
तसुँज लीला कठिन गोमुँच छेँ दीवन

वनुन पज्या अदुँ असि मुखन तुँ जीवन
वनै क्या मूर्ख भावा युथ वनुन छुय

फकथ शिव नाथ सुन्द नावा वनुन छुय
रनिस ख्वनुँ वटुँ सूँत्यन ख्वड खनुन छुय

अनिस रूपस अंदर वावा अनुन छुय
यिथिस कुलि सुँय छु कति त्युहरय कति मूल

करान छुस म्वख्तसर अति छुम गछन तूल
कलन छम ज्यव डलन ब्वद्ध छम वनै क्या

परै लीला करै व्वज कुँसुँ कोता

* * *

रचना कारुं संज त्वता

सदा शिव सौमियो छुस भक्ति ह्यून्य
 बन्योमुत पायि शीला, जड तुं च्यून्य
 दया धर्मस कुनुय केह छुमनुं मौल्य
 कुचैल्य छुस कुचैल्य छुस कुचैल्य
 अहंकारन बनोवमुत गवणव रौस्त्य
 मोहा ओसिथ मुहन कोरमुत बुं होस्त्य
 मेलिन वस्तुर वलिथ छिम छुसनुं श्रुच्य
 फकत यंद्रेय स्वखुंच छम वारं रूच्य
 पशन हुँद्य पौठ्य छुस ख्यथ चथ श्वंगान बो
 मशान सथ छुम दिहुक स्वख छुस मंगान बो
 शमान छुसनुं लमान छुस लूभुं सुंय कुन
 छुनान तृष्णा तवै छम लूभुं सुंय कुन
 स्यठा छुम मद तुं छमनुं वासना श्वद्ध
 गछ्य क्यथुं पौठ्य स्यद म्य छमनुं तिछ ब्वद्ध
 न ज़ानै पार्थी पूज़ा न त्वता
 न ज़ानै आर्थी नै श्रान संध्या
 न ज़ानै तप करुण स्वरुण न नावुंय
 न ज़ानै जप न ज़ानै भक्ति भावुंय
 न छिम पर्यमित्य म्य शास्त्र नै प्वराणुंय
 वुछिथ लूकन कुनुय छुस व्रथ धरानुंय
 थविथ व्रत छम ख्यनुंच आसान मनस कल
 खसान छुम क्रूध असन आसान पतै लल
 म वुछ मे कुन व्वमा नाथो क्षमा कर
 चु वुछ पनुंजे दयाये कुन दया कर

खबर चे छै बुँ छुस अंतर बहे क्युथ
 चुँ छुख युथयुथ नमस्कार ओस्यनै त्युथ
 म्वट्योमुत छुस स्यठा छुस मूर्ख नादान
 तवै ज़ानान बुँ छुस छुम मामसुक पान
 खबर केँह छमनुँ यि मामस बन्यव कथ
 खबर केँह छमनुँ छम क्यथुँ पौठ्य व्वथपथ
 अँदुर्य किन्य छालुँ मारान छुस च्वपोर्य
 न्येबुर्य किन्य छुस वनान प्रारब्ध छु सोर्य
 असत वौणी वनान छुस छुम डलान मन
 अपुज पौज बूज्य बूजिय छुस थवान कन
 न्यबर तीजी अंदर सोर्य म्वचर छुम
 क्षवचर छुम मे ख्वचर छुम मे ख्वचर छुम
 तिछुँय कामुँच मे छम नेत्रन अन्दर जाय
 नजर यामत दिवान छुस छम गछान राय
 खबर सौर्य चेँ छै मन म्योन क्युथ छुय
 चुँ छुख युथ युथ नमस्कारा चेँ त्युथ छुय
 गरा वनान छुसै न्यर ग्वण न्यराकार
 गरा वनान छुसै शंभू जटाधार
 गरा वनान छुसै चेँ छुय न कांह रंग
 गरा वनान छुसै कोफूर छिय अंग
 गरा वनान छुसे न्यर लूभ नेष्कय
 गरा वनान छुसै छै भावची प्रै
 गरा वनान छुसै खेटिथ रेटिथ वन
 गरा वनान छुसै पानै चुँ हन हन
 गरा वनान छुसै ओमकार कुय ब्यंद
 गरा वनान छुस नै ग्वड न चेँ अंद
 गरा वनान छुसै अघोर स्वछंद
 गरा वनान छुसै बे मिसल-ने- मानंद

गरा वनान छुसै छुख आत्मा प्राण
 गरा वनान छुसै छुख यूग तै ज्ञान
 गरा वनान छुसै बैड छै चें दया
 गरा वनान छुसै केँह छुय न परवा
 गरा छुय वेष्णुँ रूपै किन्य मुकटा
 गरा छै शिव रूपै किन्य चें जटा
 बुँ छुस द्वन त्रन अंदर गोमुत व्वदोसी
 कुनुय छुख आसुँ वुन कैलास वौसी
 चें कुस ज़ानिय चुँ छुख क्युथ ह्यू न्यराकार
 चुँ छुख युथ युथ त्युथुय भैव्यनै नमस्कार

* * *

खांदुरक वर्णन

वनै क्या वाँत्य तिम नज़दीक यकबार
 हरे नारायणस भैव्यनस नमस्कार
 त्युथुय अदुँ पांच ज़ज नौम्य शंख वोयुन
 शिव शंभू करिथ श्वभूँ शब्द लोयुन
 शब्द बूज़िथ स्यठा ख्वश गयि सौरी
 वनुँनि लग्य वाँच शिव नाथुँज सवारी
 त्युथुय मीनावैती गयि वार्या ख्वश
 लर्यव खोतुँ थोद वुछुन बंगालुँ कुय पश
 खसिथ तैथ्य प्यठ दोपुन पेंयम नज़र दूर
 वुछुन शिवजी छु क्युथ मे छुम प्रयम पूर
 यियम महराजुँ क्युथ राजुँ कुमारे
 बुँ कथुँ त्रौविथ लगस रथुँ सवारे
 लगस अथ म्वखुँ ज़ाम्पानस लगस बो
 लगस महराजुँ सामानस लगस बो
 गुरिस खसुँनस पथर वसुँनस लगस बो
 स्वंदर म्वखस रँतिस असुँनस लगस बो
 लगस क्यमखाबुँ क्यन जामन लगस बो
 लगस अँतलासुँ पोजामन लगस बो
 यिथय पौठिन गनान ओसुस प्रयम भाव
 तिथै नारद मनीशर तस निशे आव
 गँडिथ गुल्य तस दोपुन यिय ही मुनीशर
 यिमन मंज कुस छु हावतम शिव शंकर
 यि वनतम शामुँ रूँपै कुस छु ज़ोतन
 मुकटा दिथ हँटिस छुस कौस्तुभ मण
 खसिथ गरडस छुनिथ छुय लालुँ मालै
 वलिथ छुसना पीताम्बहँ कुय दुशालय

न्यथूर पंपोश छिस छुय तीजुवानुंय
 म्य अम्य सुंद म्वख वुछिथ छुय द्वख चलानुंय
 युं मा महाराजुं आस्यम ख्वश गछ्यम मन
 यहोय महाराजुं मा छुम वारें वनतम
 दोपुस नारद जियन 'लक्ष्मी नरायण'
 यहोय छुय पंचजज नोम शंख वायन
 सतूगवण छुस स्यठा कासान छु संकट
 भृगुंज लथ छस मृगुं लता वछस प्यठ
 यहोय शिव नाथुं सुंज स्मरण फिरान छुय
 शरण गेछ्य गेछ्य चरण तैम्य सुंद स्वरान छुय
 यहोय छुय प्रथ य्वगै अवतार धारान
 रछान भक्त्यन द्वाराचारन छु मारान
 अमिस यूगी तुं ज्ञानी ध्यान धारन
 छु जै जै कार अहुंघन श्वभुं कारन
 छु बखान परमुं गथ संकट छु हारन
 दिवान म्वख्ती कठिनि भवसरें छु तारन
 दप्योनस बैयि हे नारद मुनीशर
 म कर जल्दी म्य सूंत्यन अख घेरा भर
 यि वनतम कुस छु ह्यथ गंधर्व लूखुंय
 म्वखौ चोरौ परान छुय वीदुं श्रूखुंय
 खेसिथ हंसस वैलिथ वस्त्र व्वजुंल्य छुय
 अथन च्वन ह्यथ चोतुर वेदुंय परान छुय
 दोपुस नारद जियन शेछ बोज कन दार
 यि छुय ब्रह्मा जुवुंय भव्यनस नमस्कार
 अमिय व्वपुंदोवमुत संसार सोर्य
 असुंजि वाणी निशि द्रायि वीद चोरुंय
 दप्योनस बैयि वन छुम शिव नाथुं सुंद लोल
 म्य सारी हावतख व्वज युथ चलयम होल

यि वनतम छै कसुँज यँछ रथुँ सवारी
 पकान छुय सूँत्य ह्यथ बालक च्वपारी
 स्यठा छुय रूँपुँ सोस्तुँय तीजुँ वानुँय
 म्य अँम्य सुंद म्वख वुछिथ छुय द्वख चलानुँय
 यि मा महाराजुँ आस्यम ख्वश गछ्यम मन
 दोपुस नारद जियन वनुँ बोज थौ कन
 यि करमुक गाश छुय धरमुक न्यधानुँय
 यि प्रत्यक्ष दीवता छुय तीजवानुँय
 अमिस छिय सिरियुँ भगवानुँय वनानुँय
 यहोय छुय परमुँ शिव सुंद रथबानुँय
 यिथै पौठ्य हाँव्यनस वैन्य दिथ च्वपारी
 धरम राजुँ बमै यँदुँ राजुँ सारी
 दप्योनस बेयि वनतम छम यछा यी
 अछिव वुछहन छु क्युथ महाराजुँ शिव जी
 छु साधा अख यिमन मंज कमि हालै
 हँटिस प्रथ तरफँ गँडिथ सरपुँ मालै
 असुंद म्वख कासुँ वुन द्वख गालुँ वुन व्याध
 यहोय गौ साध छिस पंपोश हिव्य पाद
 ग्वसोजा नौल्य छुनिथ छुय कमि हालै
 यिथिस न्यरमल स्वरूपस कलुँ मालै
 यि तन जोतन स्यठा अथ छुस मैलिथ सूर
 सफेदो साफ न्यरमल ज़न छु कोफूर
 अंगन भस्मा अमर भूता मैलिथ छुय
 यि गजुँ चम तै सुँहुँ मुस्ता वैलिथ छुय
 खसिथ बृषभस यि असुँवुन न्यथ लसुँवुन
 ननान छुम मंज वनन आसिय बसुँवुन
 करिथ वनवास ची सँन्यासुँ चाला
 छु ज़न सूर सासुँसुँय तल खासुँ लाला

छु मस्ताना कुन्युक छुस नुँ खयाला
 स्यधा सादा व्यरक्ता भूलुँ भाला
 यि मारान आसि छलै बालुँ बालै
 यि वनतम क्यथुँ पौठ्य आमुत छु सालै
 दप्योनस तैम्य चें छुय धनभाग्य कन थव
 पयस वौचुँख यहोय क्या गौ सदा शिव
 यहोय शिव नाथ छुय महाराजुँ चोनय
 छु कोरे चाजि हुंदुय करमुँ लोनय
 यहोय सैन्यास छु आसन कोहि कौलास
 छि सौरी अँम्य सुँदिय दासन हुँदिय दास
 यि बूजिथ प्योस मातम गोस हाला
 वनान क्या छुख चुँ युथ वनुँनुय बुँ चाला
 दप्योनस बेयि नारद जी यि क्या गोम
 गोसोजा ह्यू यि क्युथ महाराजुँ यिथ प्योम
 यि कैम्य योँछनम युथुय महाराजुँ यियनय
 ग्वसोजा राजुँ क्वमारे चें नियनय
 योँछुम कैम्य पोशनुँय सूँत्य खार रूजिन
 योँछुम कैम्य भक्ति सूँत्य व्यचार रूजिन
 योँछुम कैम्य संध्यायि सूँत्य श्रान रूजिन
 योँछुम कैम्य दय्यायि सूँत्य दान रूजिन
 योँछुम कैम्य श्रद्धायि सूँत्य ज्ञान रूजिन
 योँछुम कैम्य कायायि सूँत्य प्राण रूजिन
 योँछुम कैम्य धारणायि सूँत्य ध्यान रूजिन
 योँछुम कैम्य वेद्यायि सूँत्य मान रूजिन
 दिचुँन अदुँ बाख लैजिस व्वज लूकुँ पामन
 मलुँनि लैज खाक वौलिन चाख जामन
 दमन मंज वुछ बनान क्या व्यवहारस
 सपुँज मातम सराया राजुँ दारस

सैमिथ प्वहरेजुं यिमुं तति आसुं वनुवान
 वुठन ब्रेड्य कडनि लजि गयि अथुं हावान
 सपुंन्य हारान सारिय यिथि हालै
 लजोव बोजुं नावने तति तस हिमालय
 म वद कर ब्वद्ध गयख चुंय कथ खयालस
 त्रिलोकीश्वर छु आमुत पानुं सालस
 यछा यिछ गयस दोरुन त्युथ लिबासा
 मोलुन अथ नूहें रूपस सूर सासा
 अमिस लछुं नौव्यसुंय छिय लछ बेंद्य रंग
 चे' इयूठुथ अकुय रंग वुजि यिछ गयख तंग
 यहोय शंभू, स्वयंभू छुस यहोय रूप
 यहोय छुय प्रजलावान सतवै दूंप
 सिरिय अम्य सुंदि तीजुक अख जुंचा छुय
 समंदर सथ असुंज अख क्वलकुछा छिय
 यिथै पौठ्य तस हिमालन येलि वौननस
 दोपुस तमि तोहें सौमी व्वज करिव बस
 छु फरमावुन तुहुंद सोरुय सथुंय सथ
 म्य छुम फेरान यि छम ना खांदुंरेंच कथ
 यि घर छै सारिनुंय शूभायि सानुंय
 तवै लूकन वुछिथ छस मन्दछानुंय
 महाराजस पज्या धारुण वरण युथ
 गृहस्थन लूभुं सोस्यत्यन छुय खरण युथ
 दपिव योदवै तोमुल धान्यस छु नेरान
 म्य वुजक्यन पछ यियम नुं छुम म्य फेरान
 यि गम येलि बोजुं नोवुन ज्यूठ तै क्रूठ
 हिमालय गौ वैथित अदुं लबि कने ब्यूठ
 यिथै पौठ्य सारिवुंय ब्योन ब्योन वौनुख तस
 कमी तस गयि नुं केंह क्रूधस तुं क्षूभस

खबर दीवी ति गयँ रूदुस नुँ केह होश
 महादीवुँन्य अमारण द्युत तैमिस जोश
 पकान गयि माजि निश तस वननि लैज यी
 चुँ क्या जानख कैमिस प्यव नाव शिव जी
 जगत कुनि ओस नुँ तथ ब्रौठ सुय ओस
 त्रिगुण रूपा करुन यछायि पोछ्य प्योस
 यिथिस आकाशुँ सुँय वीदस ति गौ ज्यूठ
 खसुन ह्योर सुति अकिस हेरि प्यठ ब्यूठ
 छु कस ताकत महातम्य वनि अम्य सुंद
 कठिन ब्रहमा जुवस गोमुत छु येँम्य सुंद
 यहोय बेरंग छुय प्रथ रंग सुँय मंज
 यहोय साधन हुँदिस सत्संगुँ सुँय मंज

* * *

पार्वती छि माजि समझावान

परमुं शक्ति वरुंवुन परमीश्वर है
यहोय शंकर है त्रिभवन सार

ब्रह्ममुं रूप्पुं आसुंवुन वीद सागर है
वैष्णुं रूप्पुं धारुं वुन जगि अवतार
शिवुं रूप्पुं दिवुं वुन राक्षसन ति वर है
यहोय शंकर है त्रिभवन सार

यहोय चूरि निवुं नावुंवुन सीतायि है
यहोय लंकायुं है करुंवुन डास
यहोय राम लक्ष्मन शामुं स्वंदर है
यहोय शंकर है त्रिभवन सार

पांचन पांडवन हुंद ईशर है
यहोय अरदाह अक्षोनी गालुंवुन
यहोय कृष्णुं जुव म्वरली मनोहर है
यहोय शंकर है त्रिभवन सार

करता, अकरता, अन्यथा करता
भावी अम्य सुजुंय छै यछा
अगम अपार देगम्बर है
यहोय शंकर है त्रिभवन सार

मत्स अवतार छुय ज्ञान व्वपुंदावुन
सावरणुं राजस प्रलै हावुन
कल्पांत अम्य सुंद क्षन मातर है
यहोय शंकर है त्रिभवन सार

कूरमुँ रूँपुँ समंदरस छुय मन्दुँ नाववुन
चवदाह रत्न द्याववुन बोगुँराविथ
अथि ह्यथ औषध धन्वन्तर है
यहोय शंकर है त्रिभवन सार

पातालुँ वराह रूँपुँ पृथ्वी खारुँवुन
हिरण्याक्ष दूँतस यहोय मारुँ वुन
गजेंद्रस म्वकलाववुन हरी हर है
यहोय शंकर है त्रिभवन सार

प्रह्लाद भक्तिस यहोय पालुँवुन है
मदुँ मानुँ वालुँ वुन हिरण्य कश्यपस
नरसिंह जी यहोय नरमदीशर है
यहोय शंकर है त्रिभवन सार

यहोय म्वक्त करुँवुन मुक्तीश्वर है
यहोय ध्रुव राजुन गूपी नाथ
अटल पदवी दिववुन विशीशर है
यहोय शंकर है त्रिभवन सार

यहोय वामन जी गंगा धर है
बलि राजस बोड दातुँ करवुन
यहोय पानुँ आसुँ वुन सुर तुँ असुर है
यहोय शंकर है त्रिभवन सार

अम्य सुँय साधन हुंद न्यथ प्रणाम है
भारगौ राम है यहोय आसुँ वुन
क्षेत्रयन गालुँवुन अथि ह्यथ तबर है
यहोय शंकर है त्रिभवन सार

ब्वद्ध रूप धारिथ न्यँद्रुं त्रावुन है
जगुं निशुं थावुन राक्षसन पथ
जगन्नाथ सोमी जगतीशर है
यहोय शंकर है त्रिभवन सार

कलकि अवतार छुय यहोय धारुवुन है
अधरमी गालुवुन तथ कालस
धर्म बैडुंरावुन वेद्याधर है
यहोय शंकर है त्रिभवन सार

यहोय वेष्णुं भगवानुन सत्वर है
पोशुं कनि लोगनस त्रेयिम न्यथुर
रामुं सुंद पूजनीय सोमीश्वर है
यहोय शंकर है त्रिभवन सार

कालस जालुवुन भस्माधर है
तवै नाव थोवहस कालुं सम्हार
यमुं राजस अम्य सुंज थर थर है
यहोय शंकर है त्रिभवन सार

यहोय अमर नाथुक अमरीश्वर है
अजोध्या, द्वारिका बैयि मथरा
नैपाल कोषी बैयि काश्मरुं है
यहोय शंकर है त्रिभवन सार

भूगन भूगुवुन यूगीश्वर है
च्यथ ब्वद्ध मन प्राण यहोय आत्मा
यहोय अन्दर है यहोय न्यबर है
यहोय शंकर है त्रिभवन सार

पुष्प दन्तुँ रूँपुँ छुय भूगुँ मूक्ष द्यावुँवुन
यहोय वनुँनाववुन महिम्ना पार
यहोय आनंद गण नन्दकीश्वर है
यहोय शंकर है त्रिभवन सार

हनि हनि मंजु यहोय चराचर है
कृष्णस वनुँनाववुन लीला
थापना अम्य सुँज मनुक मन्दर है
यहोय शंकर है त्रिभवन सार

* * *

मीनावती छे कोरि डांटान

यिथै पौठ्य पार्वती शिव लीला

कनन मातायि कँर छस बैड दलीला

महातम तस वौनुन कोता वनै क्या

दोपुस तमि यी पज्या वनुन चें वाह वाह

मन्दछ छै ना वनान छख वूर तै शूर

चुँ छख किछ कूर म्य निशान गछ चुँ चल दूर

अछव वुछनै वनान छख बैड दलीला

असँज ब्रोठुँय बनेमुँच छख वकीला

शपथ दिचनस तुँ वोननस होर कुन बेह

म्य छुय तेलान वुजक्यन ज़न अन्दुर्य वेंह

सपुँज शरमदुँ गौरी युथ वुछिथ हाल

यि क्या बोजेम अमिस वोलमुत मुहन नाल

महादीवुन महातम बोज़ि सुय पूर

अहंकारस बन्योमुत आसि यस सूर

व्वलँगिथ रोज़ि सुय मायायि ज़ालै

प्रयण यस परम शिवुँ सुँजुँ सरपुँ मालै

सफेदस प्यठ लगान छिय वार्या रंग

सफेदी मानि सुय युस ज़ानि सत्संग

शरीरस छुय पतौ लाकन बनान सूर

भस्म प्रयि तस ज़ि युस रोज़ि दिह निशि दूर

तिथै नारद जियन येलि वुछ युथुय रंग

वैथित गौ पकनि लोग साँपुन स्यठा तंग

दवान दोरान महादीवस निशे आव

व्यनथ कँरनस प्रभो अरजस म्य कन थाव

छे खस त्वहि आसुँवुँज मीनावती हश

वुछिथ स्वयं मूरखुँ बोज़ि किन्य गयि नाख्वश

यछान ओस महराजा जान यियम ना
वरिथ सुय राजुँ क्वमारे नियम ना
कुनी छिव तोह्य तुहुँज माया छे प्रजा
दुई तैस्य भासि यस आसि लूकुँ लजा
मंदछ येम्य त्रौव तैम्य गथ प्रौव बे शक
चुँ मन्दछख कस चै छुख सर्वव्यापक

* * *

शिव जियस त्वता

लजायि रस्यति प्रजाये

अनुगृह छु चोन जायि जाये

कुस छुय दोयिम कस मंदछख

न्यरमल मनुं किन्य छुय नुं शख

ग्वण चोन्य नुं गँजरनुं आये

अनुगृह छु चोन जायि जाये

बालक अवस्था छै चें न्यथ

छुय भूलुं भालै नाव चें सथ

जै जै छु यिछि दयाये

अनुगृह छु चोन जायि जाये

न्यर लूभुं मुह छुय गोलमुतुय

आश्चर यि काम छुय जोलमुतुय

आसिथ यि तीज व्वमाये

अनुगृह छु चोन जायि जाये

व्यरक्तुं वस्तुर छिय नुं नौल्य

फेरान चुँय छुख बौल्य बौल्य

कुस ज़ानि छुख कथ शाये

अनुगृह छु चोन जायि जाये

न्यथुं ननि अमर नाथुं छुख

वस्तुर त्रौव्य तैम्य येँम्य लोँबुख

नालुं मँत्य कँर्य प्रतिमाये

अनुगृह छु चोन जायि जाये

परमूँ शक्ति स्वस्ति भूलुँ भालै
नौल्य छै छुनिथ कलुँ मालै
मस्तानुँ बे परवाये
अनुगृह छु चोन जायि जाये

नव न्यधान धनुँ किय छिय चें पूर
आश्चर ति त्राविथ मोलुथ सूर
वोलनख नुँ मुह मायाये
अनुगृह छु चोन जायि जाये

बृषभस खंसिथ भस्मा मलिथ
हंस्य चम तुँ सुँह मुसला वलिथ
ख्वश गोय चें यिय यछाये
अनुगृह छु चोन जायि जाये

मुकटुँ कनि छै चें जटा
नाव छुय चें संकट कटा
जटा मुकटुँ गंगाये
अनुगृह छु चोन जायि जाये

हंसुँ नावि प्यठ सहाये
रोज़ त्राव हंसुन साये
ह्यमसामय छुम हमसाये
अनुगृह छु चोन जायि जाये

महराजुँ आयोख बैन्यथुँय
कस कोरि कुस ह्यकि बैन्यथुँय
मीना चें वुछने द्राये
अनुगृह छु चोन जायि जाये

डीशिथ चें गयि क्षूभस अन्दर
हावतस रूँफा त्युथ स्वंदर
युथ लगि हिय पोत छाये
अनुगृह छु चोन जायि जाये

कृष्णस दितुं त्युथ दर्शुनुय
युथ भासि ह्यस त्रिभवन कुनुय
त्राविहे लूकुं लजाये
अनुगृह छु चोन जायि जाये

* * *

शिव जी छु ख्वश सपदिथ स्वंदर रूफ धारान

पि लीला बूज़िथुंय ख्वश गौ महीशर

असान असान दोपुन तस हे मुनीशर

छु सोरुय वनुं नुय चोनुय म्य मंजूर

बराबर नतुं म्य निश छिय म्वख्तुं तै सूर
वनै क्या म्योज सम दृष्टी छि किछ हिश

ह्युवुय छुय बुरजुं तै क्यमखाब मे निश
वनन वनन नज़र नारद जियन त्रौव

महादीवन महामाया पनुंज हौव
स्व माया यथ दपान वेशुं रूपुं दर्शुन

सुदर्शुन यथ वनान अमृतुं वर्षुन
करोरन सिरियन हुंद तीज़ा बनोवुन

परम ब्रह्मन पनुन प्रकाश होवुन
परम शिवनुंय पनुन प्रचंड त्रोवुन

करोरुंय सिरियुं कुय तीज़ मिलनोवुन
थेविव तोह्य बोजुं वुंन्यव वारुं ध्यानूंय

कैरिव ब्वद्ध च्यथ थेविथ सत छुस वनानूंय
कुनुय सिरियुं वुछुन नोन छुनुं बनानूंय

न्येथुंर तथ दर्शनस छिनुं केह दरानूंय
करोर येति आसि तति क्या आसि प्रकाश

वुछिथ हेकि कुस सना कस आसि त्युथ गाश
बुं क्या वनुं अदुं सु महाराज़ा बन्यव क्युथ

तिथिस परिवारसुंय युथ शूभि हे त्युथ
डलन छम ब्वद्ध वनै क्या मांज़ि बदल

शफक आव ब्यूठ तस तति पादनुंय तल
वुछिथ नारद जियन कोरनस नमस्कार

चुं कर्ता सारिकुय छुख हे न्यराकार

कुनुय ओसुख मनस चे गोय यकबार
 स्यठा बनू हा तुं दिमुं हा ज्यूठ व्यस्तार
 अकिस क्षनमातरस मंज सोर संसार
 कौरुथ व्वथपथ चें निश तौजुब छु कुस कार
 बनोविथ पाँछ कारण शकलि ओंकार
 चुं छुख परमात्मा मंज भाग म्वस्तार
 दयालु दय चुं छुख छै भाव ची प्रै
 चें भैव्यनै जै चें भैव्यनै जै चें भैव्यनै
 व्यनथ छम बैयति मे यिय हे मृत्युंजय
 वुछन वाल्यन दि तिछुं अँछ युथ चें वुछनै
 असान असान पकनि लोग अदुं सदा शिव
 वनै कोता प्रचंडा पर्वतस प्यव
 वुछिथ मीनावती साँपुंज खबरदार
 नजर त्रैविथ वुछुन शंभू जटाधार
 बन्योमुत राजुं पोत्रा तीजवाना
 भरिथ तंदि तीजुं सूँत्य आमुत जहाना
 सु महाराजा सु साजा राजुं चाला
 छु कस ताकत तम्युक करि अख खयाला
 सु जाँपाना सु सामाना व्यमाना
 छु कस ताकत तम्युक वनि अख निशाना
 महाराजस वुछिथ युथ तीज कुय म्वख
 चोलुस द्वख तै बन्योस परमार्थुक स्वख
 वनुंनि लैज क्या मनुंक्य तमना म्य द्राया
 यि छा पोज किनुं वुछान छस स्वप्न माया
 वनान वनान यिथै पाठ्य गयि स हर्षस
 गुँहुँद्य सारी किंदुर्य बीठिम म्य वर्षस
 चें व्वज हरशीश्वरो हर्षस बुं करथस
 चें आनंदीश्वरो आनंदुं भरथस

* * *

मीना छें ख्वश गछान तुँ त्वता करान

म्य गम कोसुथ द्यगंबरै
पंपोशुँ पूजा करायो

प्रेमै चाने द्रायस बुँ घरे
करहा हरषीश्वरुक दर्शुन
श्राना कोरुम कोरु क्षेत्रिकि सरै
पंपोशुँ पूजा करायो

प्रेमुँचि पृथ्वी परात परै
ज्यवान ज्यवनुँ छु भावुक ब्योल
जोवरे जन्मुँ पाप जालिथ हरै
पंपोशुँ पूजा करायो

जोवरे नागुँ जलुँ जगत ईशरै
अथ भाव ब्योलिस बन्यव सग
परमार्थ रस प्योस परमीश्वरै
पंपोश पूजा करायो

गोलुम क्षूभ अकि क्षनमातरै
चोलुम खोनमुह वाँतिथ मुह
भुवनेश्वरी तोरुस भवसरै
पंपोशुँ पूजा करायो

अनन्तुँ अकालुँ हे अमरै
यमुँ हेरि खसान बन्योम शमदम
यमुँ किंकर गाल्यथम शंकरै
पंपोशुँ पूजा करायो

कामकि क्रूधकि भस्मास्वरै
अस्वर प्रक्रंच कोरनै सूर
हर्षस बुँ करथस हरषीश्वरै
पंपोशुँ पूजा करायो

हे शिवुँ केशवुँ ग्वफि अन्दरै
द्वयि आकारुँ छुख अद्वयतुँ रूप
रामीश्वरै तुँ शामुँ स्वंदरै
पंपोशुँ पूजा करायो

संकट कटा चें जटा धरै
नाव प्योय कोसुथ म्य सोर संकट
वर लोब म्य चे निशि हरी हरै
पंपोशुँ पूजा करायो

हे अमरै हे अजरै
वुछिथ चें जरै रूदुम नुँ होश
चराचरै छुख आश्वरै
पंपोशुँ पूजा करायो

तिछुँ अछ म्य दितम विशेष्वरै
वुछुँ हाय करोरुँ सिरियुक तीज
नतुँ अथ तीजस निशुँ कति दरै
पंपोशुँ पूजा करायो

तीज युथ बनोवुथ भस्माधरै
भव्यनै चें दयस जै जै कार
वाचुँस पयस गयस व्यस्मरै
पंपोशुँ पूजा करायो

कृष्णस दि भक्ति म्वक्तिश्वरै
गदा धरै सदा बोज़
आनन्द दितुँ आनन्दीश्वरै
पंपोशुँ पूज़ा करायो

* * *

मीनायि हँजि जेंवि लीला

शब्दस कन थाव वनहोरिये

वुछ शिव नाथुंज सवारिये

गाह प्यव रूंपुक चवपारिये

वाह क्या शाह आव यपारिये

चरणन लगस बुँ पारिये

वुछ शिव नाथुंज सवारिये

शरण आमुँत्य छिय सारिये

हरी हरन द्वख हारिये

पापन प्वज योर्य मुरारिये

वुछ शिव नाथुंज सवारिये

शूभा छि छांडान अस्य सारिये

स्यद्ध गयि सोज दुनिया दारिये

स्वखुँ मवखुँ नखुँ प्यठुँ वथ्य भारिये

वुछ शिव नाथुंज सवारिये

वुछिथ हर्षस गयि सारिये

द्वरगथ चंज गंज नादारिये

असि वनि आव न्यरनयि नारिये

वुछ शिव नाथुंज सवारिये

वतुँ छिय शेरान दरबारिये

राजुँ छि सोम्बुरान ब्यगारिये

प्रथ कुनि चीजुँच छि तयारिये

वुछ शिव नाथुंज सवारिये

ज्यन करमुँच छे गिलकारिये
गछ कोर नाना प्रकारिये
प्रेमुँ बहँजन वैथ थव्य तारिये
बुछ शिव नाथुँज सवारिये

यँद्राजुँ बन्योव पूजोरिये
अन्न राजुँ बन्योव भण्डारिये
वरण राजुँ थोक पोज सौर्य सारिये
बुछ शिव नाथुँज सवारिये

समिथ छि आमुँत्य लूख सारिये
पोश छिय छेकुँरान चवपारिये
लोग पोशुँ वर्षुन बाजारिये
बुछ शिव नाथुँज सवारिये

प्रेमुँ चानि सूँत्य गौ ओश जारिये
द्वख हर कृष्णस कर यारिये
पर्वत राजुँज क्वमारिये
बुछ शिव नाथुँज सवारिये

* * *

संतुष्ट मीना छें ज़नानन कुन वनान

स्यठा येलि साँपनुस मन साविदानुँय
वनुँनि लेंज छम कुमारी भाग्यवानुँय
नमस्कार आँस्यनस छुस कर्म लोनुँय
स्यठा रूपिठ तुँ स्वंदर नुंद बोनुँय
ज़नानन कुन वोनून दै है सपुन नौन
स्वंदर वानी हेयि तोस तोह्य वनुँवुन

* * *

मीनायि हुंद जनानन वनुंनावनुं बापथ वनुन

समिवे विगुंजव वनुंवुन ज़ोन है
महाराजुं सोन है त्रिभुवन सार

वुज ओस बौड तै वुज बन्योव बालै
सोन है सालुं कमिहालै आव
नव्यन हुंद नोव है प्रान्यन हुंद प्रोन है
महाराजुं सोन है त्रिभुवन सार

स्यठा तीजुं वान है शुभायमान है
घरुं सोन पानुं भगवान है चाव
ज़ोन है ज़ोन है मोन है मोन है
महाराजुं सोन है त्रिभुवन सार

संकट गटि मंजुं अनुंवुन गाश है
थवुं वुन आश है आशुं रस्यत्यन
साजि क्वमोरी हुंद कर्म लोन है
महाराजुं सोन है त्रिभुवन सार

ज़ोतन तनि सूंत्य मन निवुंवुन है
स्वख दिवुंवुन है म्वख होविथ
कृष्णस हृदयस मंज बसुं वोन है
महाराजुं सोन है त्रिभुवन सार

* * *

जनानन हुंद यैजमनस वनवुन

नंदुं लालुं आव गिंदने रास
आहँ कर्य वे आरै

आहँवल दैज लोलुं नारै
आहँ रस्य कर वनवास
आहँ कंच फीर आहँ आरै
आहँ कर्य वे आरै

दिह द्वारिकायि मंज वारै
बुछ्य तोन खेलुवुन रास
दारि मुचरिथ नौ द्वारै
आहँ कर्य वे आरै

हरँ म्वखुं तै हरद्वारै
वनि कंड्य तोन सैन्यास
सूत्य ज्ञानुं तै सुव्यचारै
आहँ कर्य वे आरै

लारि क्या येमि संसारै
सासन ति कर्य वे सास
अख दयुं नाव तारि तारै
आहँ कर्य वे आरै

हारि पबर्तुं दरबारै
लछुं बैद्य सासुं बैद्य सास
नियि वे दयुं धनुं चारै
आहँ कर्य वे आरै

बैन्य वे युथ गुपकारै
शहरँ मंजै वनवास
गेवि वे शंकराचारै
आरँ कर्य वे आरै

कर्य वे स्वंदुर्य नारै
रोव करँनुक अभ्यास
शामुँ स्वंदर बोज़ि वारै
आरँ कर्य वे आरै

कृष्णुँ जू चाव सानि दारै
सूँत्य ह्यथ हरम्वख वीस्य
सिरियुँ चँद्रमुँ प्रकारै
आरँ कर्य वे आरै

कृष्णस सूँत्य ल्वकचारै
कृष्णुँ जू करि अथुँवास
गिंदुँ नुँक्य छि द्वह तारै
आरँ कर्य वे आरै

* * *

ज॒नानन हुंद समुन तुँ वनवुन

यि बूजिथ त्रैलूकुँचि त्रियुँ आये
महाराजस वुछिनि कमि लोलुँ द्राये
नजर दार्यव बरव किन्य याम त्रौवुँख
महादीवुँज सवारी प्रजुँ नौवुँख
न्येथुँर दित्यनख तिथिय युथ बोजनुँ आख
स्वंदर वाणी वैन्यहस वनवन वाख
ह्योँतुख वैक्वंठ कुय मण्डुल बनावुन
समिथ त्रियुँ भावुँ ह्योँतहस वनुँ नावुन

* * *

शिव जियस वनवुन

पौर्य पौर्य लग्य तोस रथुं सवारे
महराजुं राजुं कुमारे आव

भय चोल मृत्युंजयने जयुं सूत्य
दयुं सुँजि नयुं मंजुं तोता द्राव
हीमालुं पर्वतुं जे वनहारे
महराजुं राजुं कुमारे आव

सोनिस पोशुं बागस ओस गोशा
गोशस प्यठ पंपोशा ब्यूठ
रोशुं च़ाव पोशनूल मंज पोशुं वारे
महराजुं राजुं कुमारे आव

पंपोशुं पादुं वुछ सादुं शाहजादा
बागस मंज नागुं रादा द्राव
आकाशुं अमृत प्यव धारि धारे
महराजुं राजुं कुमारे आव

पंपोश फर्शा कोर बंगालस
त्रिजगत पालस सालस वोन
बालुं ब्यूठ बाला दरि प्यठ दारे
महराजुं राजुं कुमारे आव

वनुं चे विगुंजे वनवुंनि द्राये
आकाशुं प्यठुं वछुं अछुं रछुं ब्वन
ग्वण छस वनुंनावान कनुं दारे
महराजुं राजुं कुमारे आव

व्यमानन क्यथ छिस पोंत महराजै
सिंहासनन प्यठ छि राजै रेंश्य
सालुर्य आयि हस्यत्यन वारि वारे
महराजुं राजुं कुमारे आव

सालर्यव डालुं दिचुं प्यठ डालानस
देवान खानस दिवता बीठ्य
अंड्य बीठ्य अपारि अंड्य यपारे
महराजुं राजुं कुमारे आव

शिवुं सत्संगुं नोम अन्न करमुं जाये
बोग्रोव धर्म सभाये मंज
परमार्थ रस प्युर प्रेमचि नारे
महराजुं राजुं कुमारे आव

ख्यावनस चावनस छिख सीवाये
कम कम राजुं रेंश्य खंदमत्गार
मोलुं छिख ख्यावान ओलुं सुफारे
महराजुं राजुं कुमारे आव

युथ महराजुं शूभि पिछि थजि कारे
जल जल वोल्योन राजुं कुमार
वीगिस प्यठ व्वज कोता प्रारे
महराजुं राजुं कुमारे आव

द्वारस सौनिस बन्यव स्वर्ग दारा
काजी सांज शालमारा हिश
सालर्यव कमि हालुं छालुं तति मारे
महराजुं राजुं कुमारे आव

बन्धन त्राविथ कलुँ छस वंदन
वंदन छ्यफ दिच लंदन वोत
चंदन ज्युन वोल ज़ोल बुखारे
महराजुँ राजुँ कुमारे आव

कृष्णुँ अर्धनारीश्वरुँ सुँज दुँय छय
त्रियुँ बंगुँ मरदुँ पानुँ दरदुँ वनुँनाव
शिव शक्ति रूपुँ चवुँ केँछा यारे
महराजुँ राजुँ कुमारे आव

* * *

यजमनस (वैष्ण भगवानस) वनवुन

सर्व आकारुं रूप्पुं वैष्णुं भगवानस
सर्व शक्तिमानस छु आवाहन

व्वज दीवियुं बेछि प्यठ डालानस
सत्य नारानस छे वनुंनावान

प्रोविथ गथ त्राविथ अभिमानस
सर्व शक्तिमानस छु आवाहन

हेरि वछुं अछुं रछुं वायन तुं गायन
बेछि गूपियन तुं गूर्यबायन सूंत्य
हीमालुं सुंदिस देवान खानस
सर्व शक्तिमानस छु आवाहन

विगिजुं आयुं दीवुं कन्यायि ह्यथ लारान
भक्ति भावनारुं सूंत्य म्वस्तुं हारान
वननि लजि ग्वण न्यरग्वण ग्वणुं वानस
सर्व शक्तिमानस छु आवाहन

यूगिनियुं नागिनियुं आकाशुं माँत्रिकायि
वनुवुंनि आयि बजि श्रद्धायि सान
कांह त्रिया रूज नुं मंज पेरिस्तानस
सर्व शक्तिमानस छु आवाहन

असुंनस तुं गिन्दुंनस मंज मेशित पान गोख
च्यथ ब्वद्ध प्राण गोख तस कुन लीन
समोज हुंद स्वख आख मंज व्यथानस
सर्व शक्तिमानस छु आवाहन

सरस्वती, गोमती, गंगा, जमना
स्यंद्र ह्यथ चंद्र भागा व्यतस्ता
सर्व तीर्थ ह्यथ छे सथ जजि कजि श्रानस
सर्व शक्ति मानस छु आवाहन

स्वप्रकाशुं क्वंडुं सुंय सोम सिरियुं साम छिय
शाम छुय सुबुं ह्यथ तन नावान
रात द्वह छि छ्वह दिथ तल सायबानस
सर्व शक्तिमानस छु आवाहन

अथ दयुं गंच लगुं होय पोर्य पारी
येति आसुं सारयय वनवन यिय
ब्वद्ध छनुं वातान यिथिस कारखानस
सर्व शक्तिमानस छु आवाहन

कृष्णुं, श्रेह भर शिवुं नुय कीशवुं नुय
साविदान मनुं बेह ग्यवनुय ह्य
श्रवणुंय कर गछ शिव न्यरवानस
सर्व शक्तिमानस छु आवाहन

* * *

जनानन हुंद वनवुन

हंसुं पखुं हयथ च्चथ फंभुं सीरि शंभू
वनि युँतुं मे हर म्वखुं नीरि शंभू

शांति शहरुक दिम विज्ञानुं राजुँय
भक्ति व्वडि दिम शक्ति पातुक ताजुँय
म्वक्तुं पानै मेलि ब्रगुं तीरि शंभू
वनि युँतुं मे हरम्वखुं नीरि शंभू

कल्प वृक्ष भक्त रक्ष छुख द्वख कासन
नेष्कामुं करमौ कर न्यरवासन
शहजार फिर म्य प्रक़च वीरि शंभू
वनि युँतुं मे हरम्वख नीरि शंभू

न्यर वानुं यँद्रस छुय वर विज्ञान
पखचव कनि यँद्रेय योत्रुं कनि प्राण
नामुं रूँपुं पन कोत वावुं सीरि शंभू
वनि युँतुं मे हर म्वख नीरि शंभू

प्रारब्दस प्यठ रोज़ थव मुं शुर्य भाव
यिछि बाज़ि मंज वुद्युगुं इना त्राव
डुलुं गछ्यतन फेचि या मीरि शंभू
वनि युँतुं मे हरम्वख नीरि शंभू

दिह दृष्टि रौस युस रोज़ि दिह सुँय मंज
करि आत्मस विवेकुं पूजायुं संज
साल्यग्राम ह्युव शूभि प्यठ पीरि शंभू
वनि युँतुं मे हरम्वख नीरि शंभू

शांत विजया प्राविथ त्राविथ गम

दमुँ दमुँ ह्यसुँ खोरिथ वोलिथ दम
स्वरुँ दमुँ शमुँ दमुँ जजीरि शंभू
वनि युँतुँ मे हरम्बख नीरि शंभू

अंतः करणन मंज चोन प्रकार

कार करेवुँनि चानि सूँत्य यँद्रेय द्वार
हँल्य जँद्य कर सेँद्य नैल्य चीरि शंभू
वनि युँतुँ मे हरम्बख नीरि शंभू

परमुँ हंसुँ ज़ानुँ नावतम सूहम पद

तथ पदुँ सुँय यथ मोचि सत्गवण श्वद्ध
थुँलुँ दृष्टी रंगुँ छम गीरि शंभू
वनि युँतुँ मे हरम्बख नीरि शंभू

भावुँ छावुँ येलि अन ज़न फवलुँ वनुँ आख

प्रेयम तैम्य सुंद अदुँ छुय स्वयं पाख
मेल गछि कौल्य यिछि शौल्य टीरि शंभू
वनि युँतुँ मे हरम्बख नीरि शंभू

विश्व रूप ज़ान न्यरलीप वेशंबर

व्यरक्तुँ भावुँ किन्य रोज़ द्यगंबर
आशुँ थफ त्राव अज़ानुँ चीरि शंभू
वनि युँतुँ मे हरम्बख नीरि शंभू

सुय छलि न्यरमल ज़लुँ नेष्कामै

मुह मलुँ व्रैच बैर्य मुँत्य यस छि जामै
युस धोरुँ दरुँ गवरुँ वरुँ चीरि शंभू
वनि युँतुँ मे हरम्बख नीरि शंभू

कृष्णस मुह आवलुँनि मंजुँ बौठ खार
गटुँ दृष्टि फटुँ नस छुस तारुँ व्यचार
ग्वलि रोस इन क्वलि मंजु ईरि शंभू
वनि युँतु मे हरम्बख नीरि शंभू

* * *

मीनायि हुँजि जेवि शंभू महाराजस त्वता

बाल नेरि चाजि वेरि शंभू

न्यरनयि नयि फेरि शंभू

रंगु रंगु फोल बेरंगु कुल

सत् संगु कुय रंगु बुलबुल

तोलुँ ओला येरि शंभू

न्यरनयि नयि फेरि शंभू

फेरुँ नावतम दिथ ज्ञानुँ बल

सूक्षमुँ थूलुँ थलि सम दृष्टि जल

परमुँ शिवुँ करमुँ क्रेरि शंभू

न्यरनयि नयि फेरि शंभू

खसुँ वसि हम्सुँ तोलुँ वारे

आत्मुँ दिह त्वति ग्वबि भारे

प्राणुँ अपानुँ जेरि शंभू

न्यरनयि नयि फेरि शंभू

गोशुँ गोशुँ होशुँ पोशुँ वारे

ध्यानुँ यूगुँ अमृतुँ धारे

करमुँ डोरि धरमुँ बेरि शंभू

न्यरनयि नयि फेरि शंभू

कौफिलुँ आसि वायन ढोल

ब्रोंठ शौंगमुत आसि होश वोल

पोत वाति ब्रोंठ छेरि शंभू

न्यरनयि नयि फेरि शंभू

शहरुँ मंजुँ कर हरुँ म्वख ज्ञान

न वनस मंज मेशरिथ पान

मेहलिश हुँदि तेरि शंभू
न्यरनयि नयि फेरि शंभू

करँ कथ त्याग कथ करँ राग
भक्ति बखशिथ प्रेमुँ पोश लाग

अमरीश्वरँ शेरि शंभू
न्यरनयि नयि फेरि शंभू

द्यन तुँ राच हुंद जग तुँ प्रोन चार
सिरियुँ, अगुँ, जोशुँ, सोमुँ, होशुँ, प्यार

सूँत्य व्यचारँ थेरि शंभू
न्यरनयि नयि फेरि शंभू

पांचि त्वतुँ शमुँ दमुँ रठ द्वार
ज्योति रूँपुँ स्नेह रेह कोदुँ खार

भक्ति भावुँ प्वखुँ सेरि शंभू
न्यरनयि नयि फेरि शंभू

मूक्षि दायक छु चोनुय नाव
सिरियुँ न्यतरँच नजराह त्राव

मंज मुह अंधेरि शंभू
न्यरनयि नयि फेरि शंभू

चँद्र चूँडुँ चोन चरणारविंद
च्यतुँ बोम्बरस तैत्य करि बंद

फीरिथ कोत सु नेरि शंभू
न्यरनयि नयि फेरि शंभू

म्वखुँ लरि प्यठ छु चोन दरबार
भक्त वत्सलुँ कृष्णस ति खार

शक्ति पातुँचि हेरि शंभू
न्यरनयि नयि फेरि शंभू

* * *

जनानन हुंद वनवुन

कम वस्तुर नौल्य क्या वनुं लो लो
मनुं छांडथ वस्तुर वनुं लो लो

शिवनार्थुनि श्वभुं दर्शनुं लो लो
च्यतुं के अमृतुं वर्शनुं लो लो
वनि पितु मे भक्ता ननुं लो लो
मनुं छांडथ वस्तुर वनुं लो लो

हरें सुँजि वेरि लगुं धनुं पनुं लो लो
हरदुं वीर ज़न छनुं पनुं पनुं लो लो
सुय छनुं नुय छुख चुं यावनुं लो लो
मनुं छांडथ वस्तुर वनुं लो लो

जटुं धारें वुंनि वृषभासनुं लो लो
संकटुं गटुं छुख कासनुं लो लो
हटि वासुक छुय आसनुं लो लो
मनुं छांडथ वस्तुर वनुं लो लो

क्वसुं पूजा करै कमि ग्वणुं लो लो
कम बख्तस भक्ती छनुं लो लो
न्यर धनुं सुंद स्वनुं पोश व्यनुं लो लो
मनुं छांडथ वस्तुर वनुं लो लो

प्रथ मावसि पुनिम हुँदि द्यनुं लो लो
श्रूच्य भूज़न च़ेय कित्य रनुं लो लो
मूक्ष बनि चानि ख्यनुं अकि क्षनुं लो लो
मनुं छांडथ वस्तुर वनुं लो लो

मनुं वाजे नाव चोन खनुं लो लो
राजुं यूगुक राजा बनुं लो लो
चेतनुं टोठ च्यतुं चेननुं लो लो
मनुं छांडथ वेस्तुर वनुं लो लो

चानि डेंशनुं छनुं व्यचनुं लो लो
ख्वश साँपनन रव्य वचनुं लो लो
अस्य त्रुयुं ही त्रयलोचनुं लो लो
मनुं छांडथ वेस्तुर वनुं लो लो

सत्प्वरषन हुँदि सत्जनुं लो लो
हे सत् च्यथ आनंद गणुं लो लो
कृष्णस टोठ श्वभुं लक्षनुं लो लो
मनुं छांडथ वेस्तुर वनुं लो लो

* * *

रचनाकारुँ सुँज अस्तुति

रंगुँ बुलबुल छुय जटाधोरी
होरी कर चुँ पारी ज्ञान

गीर्य रंगुँ छिस वस्तुर सारी
नोन होवुन ब्रह्मचोरी पान
त्यागुँ मंजै छुय व्यवहोरी
होरी कर चुँ पारी ज्ञान

रागुँ द्वीशुँ निशि छुय ल्वति भारी
पोशुँ लंजुँ नुँय प्यठ छु शूभान
संतोषुँ ब्रैच प्राणुँ संदोरी
होरी कर चुँ पारी ज्ञान

भ्रम मोनिथ करान खानुँ दोरी
घासुँ क्रेचि नुँय ओल येरान
गछि आसुन युथुय संसोरी
होरी कर चुँ पारी ज्ञान

पर पदुँ सोस थदि प्रकोरी
करमुँ ओश्रन परमुँ शिवुँ थान
अख दोजरान अनीक प्रकोरी
होरी कर चुँ पारी ज्ञान

ब्रह्मुँ अज्ञानुँ किन्य व्यवहोरी
बाल बचुँ नुँय आपुँ आपुरान
जीवुँ दयायि पर व्वपकोरी
होरी कर चुँ पारी ज्ञान

थज़रस वैन्य दिथ च्वपौरी
अविनाशुँ भाशुँ छुय बोलान
कृष्णस वुफि तारि हंसधौरी
हौरी कर चुँ पौरी ज़ान

* * *

मीनावती हँज यँजमनस त्वता

मन म्योन बिन्द्राबन तुँ लो लो

आत्मँ रूँपुँ नारायण तुँ लो लो

सूँत्य सूँत्य ब्रँच गूपियन तुँ लो लो

तैथ्य मंज रास खेलन तुँ लो लो

मन म्योन बिन्द्राबन तुँ लो लो

आत्म रूँपुँ नारायण तुँ लो लो

अंधकारँ कालुँ सरफन तुँ लो लो

भूतात्मा वौल हन हन तुँ लो लो

यँद्रेय गूर्य बालकन तुँ लो लो

वेह दिथ छु होशुँ डालन तुँ लो लो

मन म्योन बिन्द्राबन तुँ लो लो

आत्म रूँपुँ नारायण तुँ लो लो

ज्ञानुँ रूँपुँ श्री कृष्णन तुँ लो लो

मुह गोल दिथ सत् ग्वण तुँ लो लो

प्रक्रेच जल हन हन तुँ लो लो

श्वद्ध करि अमृत ज़न तुँ लो लो

मन म्योन बिन्द्राबन तुँ लो लो

आत्मँ रूँपुँ नारायण तुँ लो लो

भावनायि जमनायि तन तुँ लो लो

ब्रँच गूपी नावन तुँ लो लो

न्यथुँ नजि पान हावन तुँ लो लो

लूकुँ लज़ायि त्रावन तुँ लो लो

मन म्योन बिन्द्राबन तुँ लो लो

आत्म रूँपुँ नारायण तुँ लो लो

भक्ति त्वलसी छावन तूँ लो लो

श्री कृष्णस प्रावन तूँ लो लो

कृष्णु नाव छु आनंद गण तूँ लो लो

कृष्णु नाव छु मूक्ष भक्त्यन तूँ लो लो

मन म्योन बिन्द्राबन तूँ लो लो

आत्म रूँपु नारायण तूँ लो लो

कृष्णु नाव छु प्राण प्राणियन तूँ लो लो

कृष्णु नाव छु अन प्राणन तूँ लो लो

कृष्णु नाव छु संजीवन तूँ लो लो

कृष्णु नाव छु औरत्यन धन तूँ लो लो

मन म्योन बिन्द्राबन तु लो लो

आत्म रूँपु नारायण तूँ लो लो

कृष्णु नाव छु गोनिन गवण तूँ लो लो

कृष्णु नाव छु अभि ज्यथ ज़नतु लो लो

कृष्णु कृष्णु कोर कृष्णन तूँ लो लो

सरतलि सपदुस स्वन तूँ लो लो

मन म्योन बिन्द्राबन तूँ लो लो

आत्म रूँपु नारायण तूँ लो लो

* * *

शंभू महाराजस अस्तुति

भावुं यावुन छु होशुं पोशुं थरि शंभू

हरें दृष्टि गछि दरि कति हरें शंभू

रोच वनुं खेतुं वन कुस वन छु गंभीर

तैथ्य मंज साध तफ अदुं मानोथ वीर

गाल अज्ञानुं अरखोल हरि शंभू

भावुं यावुन छु होशुं पोशुं थरि शंभू

स्वप्रकाशुं रूफ सन्मुख वुछतुं छुय नुं दूर

अंधकारें छाया जाल मल विज्ञानुं सूर

हाह छुय आनस मंज ठरि शंभू

भावुं यावुन छु होशुं पोशुं थरि शंभू

हंसुं पखुं वुंय सैत्य वुफ नावुन पान

जीव आत्मुं हालव मंज होश मोदान

लूभुं तोति मंजुं चोल मुह चरि शंभू

भावुं यावुन छु होशुं पोशुं थरि शंभू

सुय वांगुंज वारि दान भरि शंभू

युस प्रजुंनावि खानुंदार घरि शंभू

नरि लोसुं बाडुंरन लूकुं लरि शंभू

भावुं यावुन छु होशुं पोशुं थरि शंभू

मूक्षि दायक प्रावनावि साक्षात्कार

क्षनमातरस मंज गालि मुह अंधकार

सिरियस निशुं गटुं कति दरि शंभू

भावुं यावुन छु होशुं पोशुं थरि शंभू

राजुं यूगें राजुं यस पकि चेंय ह्यू सँत्य
दयें धनूं वॉल्य तस वति मेलन कूँत्य
यँद्रेय चूरन कति डरि शंभू
भावुं यावुन छु होशुं पोशुं थरि शंभू

थदि सिरियुक प्योमुत छु सजुरस गाह
वुछजि तजरस गजरस अजरस क्या
नजरस प्यठ बालादरि शंभू
भावुं यावुन छु होशुं पोशुं थरि शंभू

वेष्णार्पन कृष्णस सु स्वरूप हाव
च्यथ आनन्दुं अमृत न्यथ चावनाव
निमेषुं उनिमेषुं घरि घरि शंभू
भावुं यावुन छु होशुं पोशुं थरि शंभू

* * *

वनवुन

युस सर्व सृष्टि हुंद बब तै मौजुंय
सुय ह्यथ परम् हंसुं फोजुंय आव

रायि रोस ख्यनुं चनुं चे अपीक्षायि रोस
लूभुं यछायि रोस साजि जायि मंज
खेनि आव हेनि पनजि मायायि मौजुंय
सुय ह्यथ परम् हंसुं फोजुंय आव

यूगुं राजुं शाह गोस ज़न गुतुं मारान
वरण राजुंसुंय क्युत पोअ सारान
यस निशुं दीवुं लूक शूभिनुं पोजुंय
सूय ह्यथ परम् हंसुं फोजुंय आव

अनुं राजुं स्वछ राजुं सूंत्य ह्यथ दीव गण
वाजुं ज़न श्रूच अन बांग्रावान
सारिनुंय भूजनन दिववुंन्य ओजुंय
सुय ह्यथ परम् हंसुं फोजुंय आव

अनुगृह करवुन खेनि चेनि आमुत
कृष्णस तृप्ती दिनि आमुत
सुबहस शाम करि शामस कोजुंय
सुय ह्यथ परम् हंसुं फोजुंय आव

* * *

वार्ता

महाराजस सँत्य सालुँर्य आये
कर्मवान धर्म सभाये बीठ्य

येछि मान पछि सान बीठ्य श्रोचि जाये
यछा भूजन ओस्य तयार
ख्वश गौ यी ईशर यछाये
कर्मवान धर्म सभाये बीठ्य

ताजुँ ताजुँ भूजन रननै आये
माजरैच हुंद छुखनुँ केह हाजथ
राजुँ सभि बीठ्य वाजुँ बाग्रनि आये
कर्मवान धर्म सभाये बीठ्य

भूजन ख्वथ तिम आंगन चाये
तृप्त गयि तिहिंजि सीवाये सँत्य
तनुँ मनुँ वारँ लग्य दारँ पूजाये
कर्मवान धर्म सभाये बीठ्य

* * *

वनुवन

म्यवुँ कनि म्वखतुँ वोथ चंदन बागस
नागस प्यठ लोंग हंसुँ दरबार
हंसुँ दरबार परमुँ हंसुँ दरबार
नागस प्यठ लोंग हंसुँ दरबार

जलुँ कनि अमृत नोन द्राव नागस
बागस मंज चाव संतुँ अकहार
वन्दुँ विजि सोंत ज़न आव तथ बागस
नागस प्यठ लोंग हंसुँ दरबार

ब्वद्ध क्या वाति अथ रागस तुँ त्यागस
वरनि आव शक्ती त्रिभवन सार
तस रोंस क्या छु तिय पूजायि लागस
नागस प्यठ लोंग हंसुँ दरबार

त्युथ दशहार कर तिथ्य सुँय प्रयागस
यथ देह यँद्रेय छि देह अवतार
कोहिम ति द्वादशांतस पूजि लागस
नागस प्यठ लोंग हंसुँ दरबार

नामुँ रूप कल्पित ज़ोन ह्यथ रागस
अस्ति भाति प्रेयि रूँपु पथ द्राव सार
शरमंदुँगी चेंज मन्दुँ वौरागस
नागस प्यठ लोंग हंसुँ दरबार

प्रेमँ करमँ फलँनुय यमँ नियमँ द्रागस
प्रावँ नौव्य अनुगृह की अम्बार
तृप्ती पंपोश फौल्य ललँ त्रागस
नागस प्यठ लौग हंसँ दरबार

होशँ पोश फौल वुद्यूँ पोशँ बागस
दासँ भावँ किन्य आस खेदमत्गार
कृष्णँ सीवा कर आत्मँ रूँपँ आगस
नागस प्यठ लौग हंसँ दरबार

* * *

वार्ता

महादीव येलि महाराजुं बैनिथ आव

तिहुंद भावा वुछिथ बागस अंदर चाव
करिथ ओस थोवमुत फरशा तिमव ज्यूठ

यछा भूज़न खेने ह्यथ दीवता ब्यूठ
यछा भूज़न वनै क्या कथ वनान छिय

येमिस यछा येमिच गछि तस बनान तिय
प्रयन यस ओस यिय तस तिय दयन लोद

वयन यिय ओस तिय मृत्युंजयन लोद
यछा भूज़न ख्यथुंय आंगन अंदर चाय

व्वतम वैक्वंठ खोतुं साँपुंज ततिच जाय
पदम पादव कदम तैम्य याम त्रोवुन

सु आंगुन परमुं पदवी प्रावुं नोवुन
खेसिथ वीगिस प्यठुंय येलि थोव्य तैम्य पाद

कोरुख तथ सर्व तीरथौ दीव प्रसाद
महरेज वीग्य सुंय प्यठ वातुं नोवुंख

महाराजस स्व खोवुंर्य कनि थोवुंख
महाराजुं ओस कुस क्वसुं ओस महरेज

महादीवस महा माया खोवुंर्य किन्य
स्यदथ आयख जंगे कोरनख नमस्कार

छोकिख लैक्ष्मी कलुं प्यठ्य म्वहरें तै द्वार
अथन क्यथ दूँप ह्यथ ओस दूँप माला

रतन चाँग्य आलवन ओस पानुं ज़ाला
महा वेंद्या तिमन ओस आपरावन

तिथिय नाबद फेली यिथ्य मूक्ष द्यावन

बेनिथ ओस सम्पदा मंजु किसि वोजी
 बने मुँच सरस्वती ओस द्वधु मौजी
 गंगा सागर रेटिथ ओस पानुँ गंगा
 गंगा जल ह्यथ गंगा धर जल चैयमना
 पकान गयि वीगि प्यठुँ येलि वारँ वारै
 करँनि लग्य दारँ पूजा वारँ कारै
 छै क्या कथ वनुँ ब्रांदन प्राव किछ गथ
 येमिस प्यठ सत् च्यथ आनंदन थैवुँन लथ
 बेनिथ कुस हेकि तति किस व्यवहारस
 नजर त्रावुँन बन्यव हरद्वार दारस

* * *

जनानुं छे पार्वती मातायि वनवान

हीमालुं पर्वतुं ने घरि जायख
आयख करने जगि रक्षपाल

परम शक्ति परमुं शिव छांडुनि द्रायख
कर्म सूँत्य सपजुँख शिव शक्ति रूँफ
भगवत् माया बोजनुं आयख
आयख करने जगि रक्षपाल

परमात्मुं सिरियुं मंजुं जूत्या द्रायख
प्रजलनुं आयख संसारस
येमि मंजुं द्रायख तैथ्य मंजुं चायख
आयख करने जगि रक्षपाल

जगतुँच दाता छख फल दायख
यस दिख चुँय तस दियुं शिव जी
सुय चैय लायक चुँय तस लायक
आयख करने जगि रक्षपाल

वरने आवुय वैक्वंठ नायक
वीगिस खसुँनुक छुय छायख
मानुं रैज पति व्रता सेती द्रायख
आयख करने जगि रक्षपाल

कृष्णुं लोलुं तारौ सेतारुं वायख
वाणी भवानी चैय गछिय स्पद्ध
स्वय करिय नादुं ब्यंद बोजुँनस लायक
आयख करने जगि रक्षपाल

* * *

दारु पूजायि वनवुन

वनुवुनि अछु रछु वछु स्वर्ग दारै
वारै करुयो दारै पूज

चानि सत्संगुं सूत्य गंगा धारै
दारस कर्म क्रूल वारै खोर
रंगुं रंगुं बर हंगुं द्राव गंगुं आरै
वारै करुयो दारै पूज

हरुं दृष्टि द्वारस बन्यव हरद्वारै
दासुं भावुं दासस बन्यव कैलास
क्रूल खोर लबुं गयि नभ चे तारै
वारै करुयो दारै पूज

भीदुं रस्यति शिवुं वीदुंकि ओम्कारै
श्वकदीव तुं व्यास छिस वीद वखनान
गवणुवान योजस छै स्वनुं तारै
वारै करुयो दारै पूज

नौ दार मुचरिथ धारणायि धारय
जटुं धारुं संकटुं कटुं चोन ध्यान
पादन तल बुं चैय यंद्रिय मारै
वारै करुयो दारय पूज

असि दरकारै कति छै हारै
म्वहरुं तै दारै ठेलि भय भय
कलुं पेठ्य छकोय लूभुं रस्यति शुभिदारै
वारै करुयो दारय पूज

वुज़ सोन वैक्वंठ बन्यौ वारें कारै
कुठ्यन मंज़ ब्यूठ असि कूटि तीर्थ
चंदुनुक स्वभाव असि द्राव दिवदारै
वारै करैंयो दारै पूज़

लग्नस वेलुं वोत व्यनुं न्यवारै
अग्नस प्यठ छी प्रारान दीव
ग्वणुं वानुं स्वनुं हेरि खस वारें वारै
वारै करैंयो दारै पूज़

कृष्णस परमात्मा न्यराकारै
प्राणुं रूप्पुं नौडियन छुख फेरान
वैषयन धारुवन छुख नौ दारै
वारै करैंयो दारै पूज़

* * *

वार्ता

बनोवुन दासुँ भावै दास कैलास

हरीहर श्यामुँ स्वंदर ह्यथ अंदर चास
बिहिथ येति ओस ब्रहमा ह्यथ ब्रहमन

महाराजा तौतुय वोत ह्यथ नरायण
बिहिथ पदमासनस प्यठ शकलि ओम्कार

द्युतुख अंगुनक तुँ लगुनक जान व्यस्तार
सपुँज मीनावती ख्वश युथ वुछिथ रंग

परैनि लैज त्रुँयुँ वौणियुँ भाव की भंग
नचान नचान दोपुन तमना म्य है द्राम

जगथ ईश्वर हरी हर घरै है चाम

* * *

वनवुन

होशें पोशनूलें वन वनहारे

दयि ग्वण ग्यव प्यठ तुम्बकनारे

रात्य रातस असि ह्योत ग्यवनुय

तिय बूज शिवनुँय कीशवनुँय

अमृत प्यव चव धारि धारे

दयि ग्वण ग्यव प्यठ तुम्बकनारे

गटुं चेंज सिरियन होव दर्शुन

दर्शुन ओस अमृत वर्शुन

तमि दर्शुनूं पोश फोर्ल्य वारे

दयि ग्वण ग्यव प्यठ तुम्बकनारे

माँजि कँड्यसुँय वुछ ज़र काँरी

तथ अँन्ध अँन्ध बीठ्य लूख साँरी

रंगुं दिवथा सारिनुँय लारे

दयि ग्वण ग्यव प्यठ तुम्बकनारे

जेशुँ नगुँमै जायि जायि लाँगिय

दिवथुँय आयि ह्यथ रँत्य भाँगी

द्वह गँजरोव वारे वारे

दयि ग्वण ग्यव प्यठ तुम्बकनारे

ज्योति रूँपुँज रीत असि हाँवुँय

लायि भोय गंगुँ व्यस मंगुँनाँवुँय

विभूति प्रथ कांह चीज़ सारे

दयि ग्वण ग्यव प्यठ तुम्बकनारे

आयि बरकथ पानुँ हयथ अतूलुय
खरचाविथ ति पतुँ कूत इलुय
स्यदुँथुय चायि बीठ प्यठ दारे
दयि ग्वण ग्यव प्यठ तुम्बकनारे

साजि वाणियुँ हुँजि क्वमारी
शारदायि निश शीर्य रंग सारी
स्यदुँ लक्षमी वाँकुँ तस पारे
दयि ग्वण ग्यव प्यठ तुम्बकनारे

वजि कृष्णन दयुँ सुँजि माये
कम कम मेछुँ मेछुँ लीलाये
पानुँ दयि गत अथ कन धारे
दयि ग्वण ग्यव प्यठ तुम्बकनारे

* * *

शिव तुं शक्ति

गन्धर्व लूख आव वायान बाजे
त्रन भवनन हुंद राजे आव

शक्ति पातुं दृष्टि वरें कर प्रसादा
सादुं शाहजादा आंगन चाव
जोनून तुं मोनून जगतुंचि माजे
त्रन भवनन हुंद राजे आव

ओरें कनि जटा योरें मुकटा
ओरें वासुक योरें चंदन हार
ओरें कनि तैरके योरें कनुं वाजे
त्रन भवनन हुंद राजे आव

सर्व मंगल मेलि सूँत्य चानि वरेंनै
नतुं क्या बनि सानि करनै सूँत्य
त्रिभवन भरनै आव धनुं दाजे
त्रन भवनन हुंद राजे आव

शामुं प्रभातुं रूँपुं ध्यान धोर च्वपोर
होरम होर वुछ सोर संसार
मुह मोर स्वन ज़न कोर मनुं थाजे
त्रन भवनन हुंद राजे आव

सिरियुं भगवान आव तीजुं सूँत्य भरनै
यँद्राजस मुकटुं जरनै आव
रचि रचि जुँचुं द्रायि मंज तीजुं ताजे
त्रन भवनन हुंद राजे आव

चंदुन तुं क्वंग गुश क्वंगुं चे काजे
ओमकारें रूपस छि दारें पूजा
कृष्णुं वेष्णुं नाव खन मनुं चे वाजे
त्रन भवनन हुंद राजे आव

* * *

Book Donated for
ASHRAM LIBRARY

लग्नं पूजायि हुँज वार्ता

गनन गनन प्रेयम येलि तमि युथुय वौन
 कनन यस गौ सु जीवन म्वक्त साँपुन
 परान ओस साम वीदुंक्य श्रूख्य ब्रह्मा
 व्वमा छै सूँत्य सूँत्यन कर चुँ क्षमा
 परान ओस वीदुँ श्रौच तै भक्ति श्रूखुँय
 ब्रह्मा जी सूँत्य ह्यथ गंधर्व लूखुँय
 तुलान ओस पानुँ नारायण चतुर भ्वज
 त्वता तै शिव शास्त्र पर्य पॅरी ग्रज
 लग्न वुछ ब्रह्मनौ ह्योत वीद वखुँनुन
 व्यग्न चोल ज्योति रूप गौ अग्नूँ मंजुँ नौन
 त्रिवण प्वरुषा अग्नूँ मंजुँ गौ नमूदार
 बिहिथ सन्म्वख कौरन प्रथ चीज आहार
 जटौ मंजुँ अग्नूँ नेरान वीर भद्रूय
 दपान तस नाव छिय कालाग्न रौद्रूय
 प्रेयम भावुक स्वयं तस छुय मकाना
 श्रपुन अग्नूँ कुय छु तैम्य सुंद अख निशाना
 च्यतुक सुय छुय विमर्षा दीप्ति माना
 तवै हृदयस अंदर तैम्य सुंद छु थाना
 सु ज्योति रूप सदा शिव ओस पानै
 अग्नूँ मंजुँ नौन गछुन ओसुस बहानै
 छु सुय ज्योति रूप हृदयस मंज स्वप्रकाश
 छु सुय ज्योति स्वरूप न्यथ सथ च्यथ आकाश
 सु ज्योति रूप छुय नेत्रन अन्दर गाश
 सु ज्योति रूप छुय लग्नन अन्दर राश

सु ज्योति रूँप छुय सिरियस अन्दर तीज़
 सु ज्योति रूँप छुय प्रथ चीज़ कुय बीज़
 सु ज्योति रूँप पानै शिव तुँ केशव
 प्रसन्न गौ अगुँ मंजु तस नौन गछुन प्यव
 महा मायायि मन हर्षस स्यठा गौ
 कौरुण अनुगृह वौरुण शंभू सदा शिव
 ज़नानौ वौन दयन कर पानुँ दया
 दयाये दोष दयन वर पानुँ दया
 परम ब्रह्मस पनुन त्रियुँ भाव भोवुख
 स्वंदर वाणी भवौनी वनुँनोवुख

* * *

वनूवन

न्यथ पोशुं वुंजि पोशि थरि पवल्य फूल है
होरिये होशुं पोशनूल है आव

श्यामुं स्वंदर ह्यथ सर्व सामानुं साजुं
राजुं यूगुं राजुं आव मोज वुछने
प्रकाशुं बोज हुंजि वति जोल जूल है
होरिये होशुं पोशनूल है आव

तत् पदुं भंगुं लंगुं लंगुं फोल्य गुल है
सत्संगुं रंगुं बुलबुल है आव
कुकिलौ भस्मुं मोल तुं शिव शिव बूल है
होरिये होशुं पोशनूल है आव

सत्संगुं सुंय कुन गयि मशगूल है
सत् श्रवणुं सूंत्यन बनोव श्वकदीव
करताज प्योमुत पथर गांदुं ठूल है
होरियै होशुं पोशनूल है आव

आत्मुं बूधुं कुल्यसुंय ज्ञान चल गूल है
भक्ति छस लंजि फल ब्रह्मानंद
म्वक्ति छुस त्युहुर तै शांती मूल है
होरिये होशुं पोशनूल है आव

पजि भावुं सूंत्य अनुगृह पूर्णायि सूंत्य
सर्व शक्ति मानुंजि रायि त्रायि सूंत्य
भक्ति भावुं तारुंचे प्वखुं म्वखुं तूल है
होरिये होशुं पोशनूल है आव

गूपियौ राधा कृष्णुं कृष्णुं बूल है
पथ ब्रोंठ प्रेमुच थौवुख कथ
सत्भाषायि हुंद अमृत खूल है
हारिये होशुं पोशनूल है आव

संसारुं संतापुं मंजु महसूल है
प्वखुं गछि सब्जा सब्जुय गौ
हवछुं मचि धां पचि वोत पां छूल है
हारिये होशुं पोशनूल है आव

ईश्वर अनुगृह रूद अनुकूल है
हनुं वनुं दयुं अनुं धनुं है प्रोव
कृष्णस प्रथ चीज पथ ब्रोंठ डूल है
हारिये होशुं पोशनूल है आव

* * *

पोशि पूजायि वनवुन

ओम कर श्रुख पर श्री गणेशाये
पोशुं पूजाये वेलुं है वोत

करमुं पंपोश सोन लेंबि मंजुं खोत सरुं
हरुं सोन घरुं सानि बरुं याज चाव
स्वरगुंछि अछुं रछुं वनुं वुनि द्राये
पोशुं पूजाये वेलुं है वोत

जोनून तुं मोनुन जगतुंछि माजे
तवै द्रास त्रिभुवन राजे नाव
लगस ना पोत छायाि तै ब्रूठ्य ग्राये
पोशुं पूजाये वेलुं है वोत

ईकस अनीकस शरणुंय आये
शिव शक्ति रूपस सूंत्य सूंत्यन
ब्योन ब्योन रूप होव महा मायाये
पोशुं पूजाये वेलुं है वोत

सुलि विलि तुलुं मुलि गवरुं ओजाये
पूजा कर म्य भावनाये सान
भूतीश्वर वोर माजि रोजाये
पोशुं पूजाये वेलुं है वोत

सतुं सूंत्य परबतुं प्रेमुं तै माये
तथ बजि जाये दिमुं प्रदिक्षन
जय कोर वामदीव वोर शारिकाये
पोशुं पूजाये वेलुं है वोत

खिवि कौर ज्योति रूपन सोन पाये
साजि पालनाये प्यठ छे दीवी
श्री महादीव वौर माजि ज़ालाये
पोशुं पूजाये वेलुं है वोत

अकिनगामि असि कर मनुं कामनाये
पूजा त्रिजगत माताये
जंबकीश्वर वौर माजि शिवाये
पोशुं पूजाये वेलुं है वोत

शिव वौर शक्ति दय वौर दयाये
पार्वती वौर परमीश्वर
ईश्वर वौर ईश्वर यछाये
पोशुं पूजाये वेलुं है वोत

मन की तमना सौरी द्राये
क्वशल्या आये माये सूँत्य
श्यामुं रूप रामुं जू वौर सीताये
पोशुं पूजाये वेलुं है वोत

भाग्यवानी किछ आँस जसुदाये
तिछि यंजमन बायि पादि प्रणाम
वैष्णुं रूप कृष्ण जू वौर राधाये
पोशुं पूजाये वेलुं हँ वोत

श्री महा गणपत वौर वलभाये
सावित्री वौर पानुं ब्रहमाजी
ग्वणुवान भगवान वौर संपदाये
पोशुं पूजाये वेलुं है वोत

धर्मुक सोंथ द्युत कर्म लीखाये
शक्ति वोर शिव तै शिवन शक्ति
श्री महा रोंदुर वोर माजि व्वमाये
पोशुं पूजाये वेलुं है वोत

काश्मीर नगरचि व्वतम जाये
शारदा पीठ छुय प्योमुत नाव
कौमीश्वर वोर माजि शारदाये
पोशुं पूजाये वेलुं है वोत

प्राण वोर बोज ध्यान वोर धारणाये
भक्ति भावनायि वोर सत्स्वभाव
म्वक्त कौर कृष्ण वोर शिव लीलाये
पोशुं पूजाये वेलुं है वोत

* * *

पोशि पूजायि हुन्द दृश्य

म्वख्तुँ कनि तारक छिस तापुँ दानस
छमै ईशानस पोशुँ पूजा

आकाशुँ पोशुँ वर्षुण हनि हनि छुस
रथुँ बानुँ कनि छुस सिरियुँ दिवता
सायबानुँ बन्योमुत छुस आसमानस
छमै ईशानस पोशुँ पूजा

इयकस प्यठ चँद्रमुँ प्रजलान लाल छुस
वावुँ लुकपाल छुस करान गजगाह
ब्रहमा तुँ वेष्ण छिस सँत्य जाँपानस
छमै ईशानस पोशुँ पूजा

चित्र गुप्त ताह छुस करान सामानस
यँद्राजुँ म्वरछलुँ बरदार छुस
धर्म राजुँ थोवमुत प्यठ धर्म दानस
छमै ईशानस पोशुँ पूजा

सतुँ रेश्य सथ जल ह्यथ मंज बानस
अतुँर तुँ कोफूर छकान छिस
सतवै गृहुँद्य छिस ह्यथ व्यमानस
छमै ईशानस पोशुँ पूजा

गंगा सागर ह्यथ छस गंगा
वुदुँ जालान छस दूँपुँ माला
लैक्ष्मी मीठ्य छस दिवान दामानस
छमै ईशानस पोशुँ पूजा

नाबद आपुरान महाविद्या छस

करान जमना छस वावुंजि वाव

द्वधुं मौज सरस्वती सूंत्य छस पानस

छमै ईशानस पोशुं पूजा

जंगुं थाल अनुं वुंज पानुं छस स्यद्धा

व्यूग लेखान छस करमुं लीखा

आत्मुं रूंपुं बसुं वुन छु मनुं किस थानस

छमै ईशानस पोशुं पूजा

वासुक तुं शीशुं नाग छेरि बरदार छिस

रत्नन हुँद्य म्वक्तुं हार छिस नौल्य

गटुं चंज गाश आव सौर्य सुंय जहानस

छमै ईशानस पोशुं पूजा

कुबीर तुं वरुण छिस खर्च बरदारुंय

सोर स्वर्ग दारुंय सूंत्य सूंत्य ह्यथ

रथुं छिख गण्ड्य मुंत्य मंज मोदानस

छमै ईशानस पोशुं पूजा

इयकस प्यठ चंदन ट्योक छुस तीजुं वानस

बुथिस छुस करोहं सिरियुक तीज

छस दया गुल्य गँडिथ तस दयावानस

छमै ईशानस पोशुं पूजा

अर्ग कर मनस तै पोश कर प्राणस

कृष्णुं पूजायुं लाग सनिधानस

जालिय पाफ गालिय अज्ञानस

छमै ईशानस पोशुं पूजा

* * *

वार्ता

ग्यवुन गिन्दुन नचुन तति सारिवुंय ह्योत

यि बूजिथ मंज स्वखस त्रयलोक गोमुत

वजान ओस जाबजा सेताहँ संतूर

दजान ओस जाबजा अंबर तुँ कोफूर

ग्यवान ओस सामवीदुक प्रथ अखा राग

गछान ओस मंज कनन धन भाग धन भाग

यिथै पौठ्य ह्योत त्रियौ त्रियुँ भाव भावुन

स्वंदर वाणियुँ ह्योतहस वनुँनावुन

कुनुय ज़ानिथ ग्यवान ओस्य रौत्य रातस

शिवस तै कीशवस शामस प्रभातस

* * *

पोशि पूजा

भावुं पम्पोश फोर्ल्य प्रेमै सरें सुंय
शिव शंकरें सुंय छे पोशुं पूजा

शिवुं ध्यान धारण वीद व्यस्तारण
अमृत छि हारण कारण तुं दीव
वैक्वंठ साँपुन सानिस घरें सुंय
रामीश्वरें सुंय छे पोशुं पूजा

अमर नाथुं किस निशुं अमरें सुंय
तीर्थ यात्रायि द्रायि ह्यथ प्वजि फल
सर्व तीर्थन हुंद फल छु काश्मरें सुंय
म्वत्तीश्वरें सुंय छे पोशुं पूजा

ग्वडुं आदि दीवस छु जै जै कारेंय
गोड दितुं छस अनवारेंय ब्रोंठ
गण्यशुं बलुं जलुं हलुं मूसलुं धरें सुंय
लम्बूदरें सुंय छे पोशुं पूजा

नौदलुं कलुं वन्दुं अमरीश्वरें सुंय
थेजवारि करें शंकरें सुंय पूज
वेजिब्रारि प्रदिक्षण दिमुं चकुं धरें सुंय
व्यजयीश्वरें सुंय छे पोशुं पूजा

बालुं प्यठुं तुतलायि अर्चन करें सुंय
अनन्त नागुं करें माधुं मासुं सुंय श्रान
शाफ चोल यँद्रस तुं गौ आश्चरें सुंय
वैशम्बरें सुंय छे पोशुं पूजा

अरघुं पोशुं भरघुं शेखायि पूज करे सुँय
मटन वातिथ छि हटन अपराध
मूक्ष बनि प्यत्रण मंज क्षण मातर सुँय
श्री भास्करे सुँय छे पोशुं पूजा

शिवुं रागुं कारकुट नागुं वीद परे सुँय
पापुं हरण नागुं मे हरनम पाफ
भीमुं सीनुँन्य पोठ्य सुँत्य हलधरे सुँय
श्री हरी हरे सुँय छे पोशुं पूजा

प्रेमुं पोशुं मालुं ह्यथ बालुं पेठ्य तरे सुँय
सुनि शायुं व्वमायि करे पोशुं पूज
क्षमा करि मे तुं ध्याना धरे सुँय
व्वमाधरे सुँय छे पोशुं पूजा

कूठेरे अँद्य अँद्य फेरे तथ सरे सुँय
कोटी तीर्थुक छुस महिमा
आश थवुं शंकर शनुं निस वरे सुँय
कूटीश्वरे सुँय छे पोशुं पूजा

खसुं ओझा ह्यथ नन्दकीश्वरे सुँय
शिवस तुं शिवायुं करे पोशुं पूज
परमीश्वरिये तुं परमीश्वरे सुँय
जम्बकीश्वरे सुँय छे पोशुं पूजा

त्रेशुँवुँन्य संज करिथ न्यथ व्रथ धरे सुँय
त्रनवुँन्य भव्यनख पादि प्रणाम
स्वदुं ब्रारि वंदुं पान श्यामुं स्वंदरे सुँय
पीतांबरुं सुँय छे पोशुं पूजा

क्षीरं खण्डुं कन्दुं सूत्य थाला भरं सुय
प्रेमं सूत्य आपरिथ वन्दुं हस पान
नीलुं नागुं नीलुं कण्ठस द्यगंबरं सुय
नीलांबरं सुय छे पोशुं पूजा

दीवस्थली छिय वनान दिवसरं सुय
सारिनुंय दीवन पादि प्रणाम
वासक नागुं श्रानुं शमुं प्यमुं स्वरं सुय
स्वयं कौसरं सुय छे पोशुं पूजा

कप्पालुं मूचनुं भक्ति भाव भरं सुय
पाप क्षै गच्छिथ परं शापुं मूचन
पालन हारस कपालुं मालुं धरं सुय
त्रिशूलुं धरं सुय छे पोशुं पूजा

गंगुं जटन वीतिथ वर मंगुं हरं सुय
चावुं नाव्यम अमृतची धार
प्रां वुन छुस तसुंदिस आसरं सुय
जटा धरं सुय छे पोशुं पूजा

न्यथ सूत्य ह्यथ पनुंसि व्वपरं सुय
शिव रागुं प्रयागुं मंजु करं श्रान
कोटी तीरथुं पोश लागुं ईशरं सुय
त्रिपुष्करं सुय छे पोशुं पूजा

स्वयं गच्छित निशि प्रेयम भरं सुय
कालुं अगुं रोद्रस तुं भद्र काली
पूजुं नैष्कलुं कलुं माला धरं सुय
कालुं शेखरं सुय छे पोशुं पूजा

तुलें मुलि प्रजुं नाविथ सत्गवरें सुंय
राजुं रोजि माजि रोज्ञायि करें पूज
धुपें दूप आलुंवस ह्यथ चामरें सुंय
भूतीश्वरें सुंय छें पोशुं पूजा

रामुं रादन तनुं मनुं पूज करें सुंय
प्रारस हरम्बखुं बरें सुंय तल
प्रथ बालुं खसुं वातुं प्यठ ब्रह्मुं सरें सुंय
जगतीश्वरें सुंय छें पोशुं पूजा

हम्सुं दारें नेरें वातुं प्यठ क्वलुं सरें सुंय
शिवुं लोलुं गंगायि मंज करें श्रान
विश्व रूप ज्ञानिथ विश्वेश्वरें सुंय
गंगा धरें सुंय छें पोशुं पूजा

अर्जन दीवन ह्यथ युधिष्ठरें सुंय
नाराण नागुं कर ध्यानुं पूजा
मनुं किस मन्दरस मंज श्रीधरें सुंय
बोधीश्वरें सुंय छें पोशुं पूजा

पर्वतुं शारिकायि लीलायि परें सुंय
वामुं दीव रछि असि परु सुंय तल
गाल्यम संकटुं किस अस्वरें सुंय
चक्रीश्वरें सुंय छें पोशुं पूजा

रंगुं रंगुं क्वंग पोश फोल्य पोपरें सुंय
जालायि बालिकायि पूजि लागस
श्री महादीवस भस्माधरें सुंय
हरषेश्वरें सुंय छें पोशुं पूजा

नागुं नागुं फेरुं कूत यथ भवसरुं सुंय
लागुं नागुं नाथस कुन मन प्राण
पूज करुं अन्दर शिव मन्दरुं सुंय
आत्मुं रूंपुं हरुं सुंय छे पोशुं पूजा

कृष्णस शिवुं प्रेमुक चावि चरसुंय
तिरथुं फल द्याव्यस घरुं सुंय मंज
रूफ हाव्यस मंज क्षणमातरुं सुंय
षडाक्षरुं सुंय छे पोशुं पूजा

* * *

पोशि पूजायि हुंद वृतांत

अनिख वैन्य दिथ च्वपारी पोश सारी

करॅनि लग्य पोशुं पूजा चार्य चारी
यि केंछा ओस लोजिम करनि लग्य ती

प्रसन साँपुन तिमन प्यठ पानुं शिव जी
करिथ प्रथ रंग रंगै पोशुं नुंय ढेर

कोरुख शिव शक्ति रूपस अँद्य अँदिय घेर
परान ओस वीद मंगल श्रूख्य ब्रह्मा

व्वमा छै सँत्य सँतिय कर चुं क्षमा
तिमन भास्यौ न्यबर अन्दर शिवुंय शिव

चलिख नीरिथ शिव सुँद्य लोलुं आलव
परॅनि लग्य सामुं वीदक्य भक्ति श्रूखुंय

ब्रह्मा जी सँत्य हयथ गंधर्व लूखुंय

* * *

मीनायि हुंद शिवस लोल भरुन

युथुय रंगा वुछिथ मीना वनान आंस

कनन यस गौ तुँ तस मूक्षी बनान आंस
ग्वणन चान्यन मनन माला बनौवुँम

मुकटस प्यठ गँडिथ चाला बनौवुँम
चौलुम शर आश्चर चाले लगै बो

म्य गौ स्यद्ध तफ तुँ ज़फ माले लगै बो
बैडिस नावस तुँ ल्वकचारस लगै बो

ज़री त्वरस तुँ दस्तारस लगै बो
रंगारंग पोशक्यन छेत्रन लगै बो

स्वंदर नेत्रन पदम पैत्रन लगै बो
लगै पुष्पक व्यमानस सायबानस

क्वलस मूलस तुँ शौही खानदानस
गुलाबा छुय चें म्वख म्यूठा दिमै ना

यिमै ना ब्रोंठ कुन मुश्का ह्यमै ना
रटै दामन व्वतम जामन लगै ना

नमै ना छस शरण आमुँच बुँ मैना
शरण गछिथुँय परण पादन प्यमै ना

शमै ना चानि प्रेमुक मस चमै ना
लगै जिगस डैकस तै म्वखतुँ हारस

वंदै सोरुय चें हिविस शूभिदारस
द्योंका ज़न छुय चें स्वनुँ दूँपा लगै बो

प्रज़लवुन छुय स्वंदर रूँपा लगै बो
यि गौँडमुत छुय ति छुय शूभन लगै बो

वुछिथ ह्योतमुत छु पोत लूभन लगै बो

ज़री च्वगस कमर बंदस लगै बो
 दिनस हर्षस तूँ आनंदस लगै बो
 शखुँति नाथो चैं यिछि शक्ति लगै बो
 म्य छम चौज़ भावना भक्ति लगै बो
 यशे पुछ्य ख्वश बुँ कँरथस छुम हशे नाव
 अशे सूँत्य गोंड दिमय कासुम पेशेभाव
 दोपुन दयस ज़गत पाला दयाला
 मनन माला गंडय छै राजुँ चाला

* * *

मनन मालि विजि वनुवुन

भक्त वत्सलुं मोनुख म्योन्य मनुं नुंय
शक्ति नाथुं गण्डयो मनुंनुंय माल

बूज्य बूज्य श्रवणुंय तुं कर्ण कर्ण मननुंय
निधिद्यासनुं ज्ञानुं दूपुंय जाल
साक्षात्कारुं छुख शिव रूपुं ननुं नुंय
शक्ति नाथुं गण्डयो मनुंनुंय माल

आधिकार द्युत्मुत छुय सत्जनुंनुंय
मंज छय अन्द ह्यथ माया जाल
न्यर ग्वणुं लगयो यिथिनुंय ग्वणुंनुंय
शक्ति नाथुं गण्डयो मनुंनुंय माल

युथ छुख तुं त्युथ छुख क्युथ छुख ननुंनुंय
सूय ज्ञानि यस बनि युथ ह्युव हाल
वोन दिथ नोन वुछ्य वुछ्य अन्य छि बननुंनुंय
शक्ति नाथुं गण्डयो मनुंनुंय माल

दिह अभिमानुक कुल हेयि छनुंनुंय
तीव्र वारागुक सूरा वाल
शिव रूपुं ती बनि यी पोह्य पनुंनुंय
शक्ति नाथुं गण्डयो मनुंनुंय माल

भीषणुं यिम म्वख चे कुन अनुंनुंय
तिमुं नुंय आय मंगुं काल यच्चकाल
तिहिंजि अछ नाटि मंज कल्पांत बननुंनुंय
शक्ति नाथुं गण्डयो मनुंनुंय माल

लोळें आलौ अश फ्योर बाँसुं कनुं नुंय
चान्यन गछि ना तर छिम लाल
सुय म्वखतुं बनि हस यथ छि म्वक्त वनुंनुंय
शक्ति नाथुं गण्डयो मनुंनुंय माल

पजि भावुं परमानुं नाव पान पनुंनुंय
शाह पूर वर्ताव अथि ह्यथ माल
मंज बाजरस वान लोद न्यरधनुं नुंय
शक्ति नाथुं गण्डयो मनुंनुंय माल

हेलि हेलि लावि लावि मावि मावि ग्वजुं नुंय
कुजुंरुंकि खलुं फलुं वुछ म्वखुं हाल
घाटस घाटुं प्यव हुरिरस छु छ्वनुं नुंय
शक्ति नाथुं गण्डयो मनुंनुंय माल

नियमुंचन नाडियन यमुं क्यन यनुं नुंय
समदृष्टि जल फिर माला माल
नेष्कामुं कर्मुं भूमि कल्प वृक्ष बनुंनुंय
शक्ति नाथुं गण्डयो मनुंनुंय माल

च्यथ आकाश हाव न्यथ म्वख पनुं नुय
छांडनस लोगमुत छुस पाताल
रोन छुस ख्वनुंवटुं ख्वड छुस खनुंनुंय
शक्ति नाथुं गण्डयो मनुंनुंय माल

यूगुं अंगुं विन छुस ज्ञानुं अन रनुंनुंय
यूगीश्वरुं छुय मूरखुं सुंद साल
अन यछा करतम अनुगृह पनुंनुंय
शक्ति नाथुं गण्डयो मनुंनुंय माल

दयुँ धनुँ प्राप्त छु प्रथ काँसि बनूँनुय
बानुँ रौंस कर्म हयून छुस कंगाल
बडि भगवानुँ लद तम बानुँ पनुँनुय
शक्ति नाथुँ गण्डयो मनुँनुय माल

गण्डुँ गण्ड वुजि छम आम्यन पनुँनुय
वर दिम यँद्रुँ चँद्र छुख चुँ दयाल
दौंगनाव व्वलंगिथ छुख त्रण ग्वणुँ नुँय
शक्ति नाथुँ गण्डयो मनुँनुय माल

सादुँ छम यछा क्वमोरी ननुँ नुँय
स्येज साजुँ गैर सूजिथ संभाल
वरनस संजिवरुँ की वरतनुँ नुँय
शक्ति नाथुँ गण्डयो मनुँनुय माल

शक्ति पातुँ सूँत्य भक्ति भावुँ न्यथुँ ननि नुँय
भक्ति करि मीना भाव हीमाल
ताह खोल वरदनुँ क्यन वरदनुँ नुँय
शक्ति नाथुँ गण्डयो मनुँनुय माल

थफ कैर मनस च्यथ आनंद गणुँ नुँय
तफ गौ स्यद्ध अथि मैठ जफुँ माल
मस कैरनस यिथ्य प्रेमुँ मस चनुँनुय
शक्ति नाथुँ गण्डयो मनुँनुय माल

मीनायि हीमाल पर्वत छु वनुँ नुँय
चैक्रीश्वर छुय त्रिजगथ पाल
सौर्य दीवुँ चैक्रस फीर्य प्रेदिक्षणुँ नुँय
शक्ति नाथुँ गण्डयो मनुँनुय माल

कृष्णस हर म्वखुँ म्वख हाव पनुँनुय
थपि खारतन प्यठ सूहम बाल
फीर्य फीर्य नीरि नीरि न्यर नयुँ वनुँ नुँय
शक्ति नाथुँ गण्डयो मनुँनुय माल

* * *

दयि भतुँ, तुँ लाँकरेअ हुँज शिकायत

दयन दयायुँ सूँत्य ह्योत दै भतः ख्योन

जानानौ वनुवन वौणी अंदर वोन

शखुँत्य यियुँ व्वल्सनस संसार दारे

गछि आसुँज लाँकरन राजुँ कुमारे

यहै कथ गयि शिव नाथस कनस मंज

सु छुय ना सारिनुँय वौतिथ मनस मंज

दोपुख तैम्य लाँकरण क्या गयि म्य वैन्यतोम

सु कुस औषध छु वैन्यथुँय पछ म्य अँन्यतोम

व्यनथ करहस महाराजा थैविव कन

महरेजि लाँकरण गयि गहनुँ तै स्वन

दोपुख तैम्य गहनुँ तै स्वन कथ छि वनन

कनन कर्यतोम छुवना काँसि बनन

सु छा अन ह्युव जि युथ संदारि प्राणन

छु क्या ग्वण तथ बुँ युथ स्वन छुसनुँ ज़ानन

व्वपुद यैलि कम तुँ अमदम युथ म्वलुल गौ

हिवुय शाह तै गदा असि व्वज करुन प्यौ

त्युथुय बुतराँच प्यठ व्वथपथ बैनिन स्वन

हिविय सौरी बनन अदुँ लूभुँ निशुँ प्यन

यि बैनिथ गयि बे परवायि सुँय राय

करुँण गगराय जि गहनस किच करिव जाय

ह्योतुन स्वनुँ शीन वालुन धारि धारे

गहनुँ वोत वौर्यव्युक राजकुमारे

* * *

वार्ता

स्वनुं शीनुं बुतराय भरनै आये
जै जै छु भगवत् मायाये

सारिनुंय गहनक्य तमना द्राये
शंकरन कौचा लौकरन त्राव
ढाय गज स्वनुं की खेत्य भूमिकाये
जै जै छु भगवत् मायाये

शरणे आयि चे बे परवाये
बडि दयुं व्वज यितुं दयायुं प्यठ
धरि नै लरि फेरन लरि जाये
जै जै छु भगवत् मायाये

स्वनुं कुय अवतार धोर स्वनुंशाये
खेत्य प्रथ शाये स्वनुं की ढेर
ख्वश गौ यी ईश्वर यछाये
जै जै छु भगवत् मायाये

समदृष्टि सूंत्य पथ हयोत तृष्णाये
वाजिन छि राजन सूंत्य क्वसुं काम
राजुं बायुं हिशुं द्रायुं च्वंजुं तै दाये
जै जै छु भगवत् मायाये

सारिनुंय स्यद्ध गयि मन कामनाये
लूभ चोल तुं कुस कस रूद म्वहताज
सोरुय संसार गौ कुजी त्राये
जै जै छु भगवत् मायाये

कर्म फल व्वपदोव धरमुँ श्रद्धाये
लूभ येलि गोल तुँ मुह पानै चोल
पर तुँ पान यकसान बोज़नुँ आये
जै जै छु भगवत् मायाये

दयि धनुँ आसुँवुन छु मंज भावनाये
सुय धनुँ गोछ येमि निशि गयि सेर
अदुँ मोग ती सारिय प्रजाये
जै जै छु भगवत् मायाये

लूभ कासि कृष्णस कर्यस व्वपाये
च्यथ शक्ति हुँजि शूभाये सूत्य
हावि तस व्वलुँसुन पनुन जायि जाये
जै जै छु भगवत् मायाये

* * *

वार्ता

महा मायायि प्रत्यक्ष होव दर्शुन
दुदलि बदल प्यवान ओस लालुं वरुन
करान ओस्य पानुं वोज संवाद सौरी
करिव बा व्वज लर्यन खसनुंच तयारी
खेसिव बा ज़न लर्यव प्यठुं शीन वालौ
मरौ मा व्वज करौ क्या कूत चालौ

* * *

स्वनं शीन वालनुंक्य मशवरुं

समियो लूकौ स्वनुं शीन वालौ

पश आयि भर्य भर्य लालौ सूंत्य

आंगनन टेंग खेत्य पथ ह्योत बालौ

कुठ्य पोरण खोत तालवन सूंत्य

द्वर गथ त्राव गत प्राव जदालौ

पश आयि भर्य भर्य लालौ सूंत्य

सदा शिव समियो यूत नसां चालौ

क्या बनि साजव जालौ सूंत्य

वथ मत्तुं लैग्यतन पेठ्य बंगालौ

पश आयि भर्य भर्य लालौ सूंत्य

कम छुनुं प्योमुत कुछि संभालौ

क्या बनि फवतुर्यव तुं थालौ सूंत्य

वानुं वोल्य वानन गयि दिथ फालौ

पश आयि भर्य भर्य लालौ सूंत्य

यँद्राजन तोरें द्युतनख आलौ

क्या बनि तुहुँजव नालौ सूंत्य

बूज्यतन शिव जी ओबरस डालौ

पश आयि भर्य भर्य लालौ सूंत्य

लोलुक ओश त्राव चालौ चालौ

म्वखतुं त्राव नेत्रुं क्यौ लालौ सूंत्य

कृष्णो जप कर मालौ मालौ

पश आयि भर्य भर्य लालौ सूंत्य

* * *

पृथ्वी हुँज त्वता

वनुँनि पृथ्वी लैजिस क्यथुँ पौठ्य दरैबो
यिथै पौठ्य वालि योदवै क्या करै बो
वनुँनि लैज यी स्व जगत पाल सुँय कुन
पज्या येमि हालुँ त्रावुन लालुँ वशुन

* * *

पृथ्वी माता छे शंभू महाराजस त्वता करान

पालुं वुंनि येमि हालुं वथ लागि बालुं बालुं
बालुं यूत चालुं कूत लालुं वरुन

चाजि पालनायि सूंत्य बालुं त्रिजगत पालुं
चालुं वुंज छस बुंय जगतुक भार
हिरण्याख मोरिथ खोरथस पातालुं
बालुं यूत चालुं कूत लालुं वरुन

दशुं ब्वजुं त्रावुं कौचा अशिजे चालुं
नशुं मा संसार पशि कोता
पालुं वुंनि यिथि सालुं शूभा येमि हालुं
बालुं यूत चालुं कूत लालुं वरुन

भय कास दयुं मृत्युंजयुं नैष्कालुं
जै शिवुं ओंकारुं छम चौज सथ
कम करतुं स्वनुं शीनस दम संभालुं
बालुं यूत चालुं कूत लालुं वरुन

खण्डुं खण्डुं कौषी कश्मीरुं नैपालुं
भक्त चोन्य थावुं वुंन्य छि मेय प्यठ पाद
तिहिंदि पासुं कौलास वासुं कास्तम मे जालुं
बालुं यूत चालुं कूत लालुं वरुन

शौक्लुं रंगुं गंगु जटुं धारुं वुंनि भूलुं भालुं
न्यथुं ननि नंगुं नालुं मति रटुं हथ
मंगुं क्या चें टंगुं आयस बोजतम नालुं
बालुं यूत चालुं कूत लालुं वरुन

थावरन मंज बडि बलुं सोस्ति हीमालुं
स्वनुं शीनुं सूत्यन कावरान छस
नेत्र क्यव लालौ कोता म्वखतुं वालुं
बालुं यूत चालुं कूत लालुं वरुन

निष्कलुं कलुं मालुं धारुं वुंनि कलुं वालुं
प्रेमुं मसुं की प्यालुं कृष्णस चाव
मैस्ती यियुं हेंस बनि हे मतवालुं
बालुं यूत चालुं कूत लालुं वरुन

* * *

शिव जी महाराजस त्वता

बुद्धिथ स्वनुं शीन गयि हौरान सारी
परम ब्रह्मो लगायो पार्य पारी
शखुंत्य नाथो भखुंत्य दिनुं सुंय लगायो
शखुँच सूंत्य व्वल्सनस यिनुंसुंय लगायो
अनाहत् शब्द के नादो लगायो
पदम पादो स्यधो साधो लगायो
जित्येंद्रय यूग अभ्यासो लगायो
ग्वसाजो जूग्य संयासो लगायो
अभेदो भक्ति हुँदि भावो लगायो
प्रयोवुनि राम सुँदि नावो लगायो
कमल चरणो मनुँकि स्वरनो लगायो
अँदुर्य हृदयिकि स्वंदर वरणो लगायो
च्यतुँकि चेननुं सतुँकि संगो लगायो
रंगन हुँदि रंगुं बेरंगो लगायो
शमिथ संसार वौरागो लगायो
दिहकि त्यागो सतुँकि रागो लगायो
अविनाशो च्यथ आकाशो लगायो
मनुँकि गाशो स्वप्रकाशो लगायो
चें ज्ञानुँकि यूगुं के होशो लगायो
फोलिथ हृदुँयिकि पंपेशो लगायो
असत् त्रौविथ सतुँकि धौरो लगायो
सतूग्वण रूँपुं न्यर वौरो लगायो
दया धरमुँकि स्व व्यचारो लगायो
न्यराकारो न्यराहारो लगायो
शिवो प्रेमूँकि आनंदो लगायो
अमर नार्थुँकि स्वछंदो लगायो

कुनुय आसिथ बहुस्यामो लगोयो
 मनुँकि आरामुँ श्रीरामो लगोयो
 यछा गननस प्रकट बननस लगोयो
 चेँ बेयि पानस कुनुय अननस लगोयो
 दिहुँचुँ सूरच कहुँतुँ तगनस लगोयो
 दिहस मंज मुह गछिथ लगनस लगोयो
 चेँ साक्षी रोजुँनस प्वरुँषो लगोयो
 स्व रूँपुँ दृष्टि हुँदि हरुँषो लगोयो
 कुमार सुँदि गनिशुँ सुँदि माल्यो लगोयो
 जगथ व्वथपथ करनवात्यो लगोयो
 लगोयो जुव पनुन अर्पण करायो
 कैरिथ अर्पण जुवस जिँदै मरायो
 खबर कति आँस छुख चुँय हनि हने मंज
 कुनुय आसिथ चुँ आसख प्रथ कुने मंज
 महातमुँ चानि निशुँ अँस्य डैल्य मिती आँस्य
 चेँ कोसुथ लूभ लूभन वैल्यमिती आँस्य
 स्वनुक चोँल लूभ धनुक असि द्राव तमना
 सपुन मोलूम सोरुय कर चुँ क्षमा

* * *

पश्चाताप

श्रौंग ज़ोन शिव रूप द्रोग ज़ोन स्वन
राय कति आस असि गजुँ बैद्य प्यन

असि ओस राजुँसी हुंद अंधकार
पाँचि म्वहरि कडहोन राजुँकुमार
स्वनुँ र्वपुँ दिमुँ होस सूँत्य अखजुँ मन
राय कति आस असि गजुँ बैद्य प्यन

शिवनाथुँ ख्वश साँपुँन छि काँपन
धरि नै जल लरि लरि फेरन
ब्रन पेयि बोझि पेयि भरनुँ आयि वन
राय कति आस असि गजुँ बैद्य प्यन

वाणी वेजमुँच आस वीदन
श्रूच गौ स्वन तमि पान छु श्रोचन
सूरुँ बनि नुँय प्यठ अज छु डोलन
राय कति आस असि गजुँ बैद्य प्यन

भय कास दयि असि द्राव अरमान
यि वुछिथ लक्ष्मी ति गयि हौरान
यिछि मायायि निशि स्व छेँ मंदछन
राय कति आस असि गजुँ बैद्य प्यन

नावुँ किन्य बूज़ि मुँत्य आस्य असि लाल
राजस सौनिस आस अख माल
तूदुँ तूदुँ आंगनन मंज छि डोलन
राय कति आस असि गजुँ बैद्य प्यन

खोत्मुत अंधकार वोथ राजन
वेचि कुस मेचि खेतुं श्रोग गौ स्वन
राजुं कुमारन च्वंबि कुस कन
राय कति ओस असि गजुं बैद्य प्यन

आपदा छे तापुं सूत्य गलि कति स्वन
वापुं कति बुतराच फल नेरन
प्राण क्यथुं पोठ्य नवि ब्ववि नै अन
राय कति ओस असि गजुं बैद्य प्यन

सूहं मति पंपोश हिव्य चोन्य पाद
असि छा खबर येमि शक्ति आसि साद
नूर आसि सूर तै सूर आसि स्वन
राय कति ओस असि गजुं बैद्य प्यन

न्यथ चुंय सत् च्यथ आनंद गण
कृष्णस पादन कुन थव मन
कुंदन स्वन छस स्वय स्मरण
राय कति ओस असि गजुं बैद्य प्यन

* * *

शिव जी महाराज सुंद वावुं लूकपालस हुकुम तुं शीनस वटुं नावुन

असान असान लोंगुख वनने सदा शिव
मोंगुवुं त्वहि वार्या स्वन वुजि क्या प्यव
स्यठा ख्वश साँपनुस तुहुँजन बुं लेंहरण
स्योदुय वैन्यतोम व्वज छिवुं क्याजि त्रेंहरण

गँडिथ गुल्य तस दोंपुख यी, ही महीश्वर
हरी हर कर दया बुतराँच वेंछ थर
छि काँपन स्वन नसो गलि तापुं सूँत्यन
न्यबर बुतराँच फल किथुं पोंठ्य नेरन

हिविय सारी बनन अदुं मानि कुस कस
स्यठा पेमुँत्य छि पायस बस करिव बस
करिव ज़ीवन हुँदै बचनुक व्वपाया
जगत रछनुँच कंडिव नैज वेंष्णुं माया

व्यनथ बूजिथ अमर नाथन असुन ह्योँत
तिथुय आकाशुं प्यठुं ओबरण वसुन ह्योँत
वोंनुन वावुं लूकपालस दाजि दाजे
वटुँजि हे स्वनुं शीनस शीनुं माजे

वैटिथ सोर्य करिथ थौ ढेर यकजा
बन्यस सुमेर पर्वत क्या छु परवा
दितुन वावस त्युथुय अदुं बल तुं ज़ोर्य
क्षनस अँक्य सुँय अंदर तैम्य वोट सु सोर्य

अकिस सातस अंदर पृथ्वी सपुँज नैज
फरागत जीव जौचन वारँ साँपुँज
सेदिस सादस यि दोपहस ती करुण प्योस
जगथ सोरुय त्युथुय साँपुन युथुय ओस

कृष्ण लीला परिय बोजुस ग्वसाजे
सुमीरस द्युत बजर यछायि चाजे
मनस अँज वारँ पछ संसारँ ठाजे
चुँ ज्ञानुक स्वन दि बोज सरतलि साजे

* * *

शिव जियस प्रार्थना

येछि चाजि दाजि वचि स्वनुं शीनुं माजि
हा ग्वसाजि साजि सरतलि कर स्वन

नंगुं छुस लोगमुत मंज प्यव वुंजि शाजि
जंगुं छमनुं क्यथुं पौठ्य पकुं मँजिलस
अंगुं हीनस म्य श्रान करुनाव गंगुं वाजि
हा ग्वसाजि साजि सरतलि कर स्वन

नेँष्वद्ध कोरनस मायायि हुँजि ठाजि
फवकुं फोतुं गँजरुम ट्वकुं लैदुरस
म्वखतुं छम भासान जगतुं चि सेलाजि
हा ग्वसाजि साजि सरतलि कर स्वन

संकल्पुं चूर मंज मचि न्यंद्रे म्याजि
अँज वासना ह्यथ छु सँज जागान
गण्डुं थौ च्यथ धनुं मंज मनुं हँम्ययाजि
हा ग्वसाजि साजि सरतलि कर स्वन

तृष्णा तुं ममता मीलित मान माजि
माजि कोरि मेजम खानुं दारस
संतूषुक स्वन न्यूहम दाजि दाजि
हा ग्वसाजि साजि सरतलि कर स्वन

भावुक्य पोश ओस्य पछि हुँजि पूशाजि
रागुं द्वीषुं राजि वति लूटुं नियनस
राजुं यूगुं राजुं आयि मंज अदालेच चाजि
हा ग्वसाजि साजि सरतलि कर स्वन

गण्ड छु सुमीरें सूँत्य ज़ाँज मालायि साजि
सुमीर छुख चुँय तूँ मालुँ फल्य छि दीव
यिछ स्मरण फिरनुँ सूँत्य सीवुँ चाजि म्याजि
हा ग्वसाजि साजि सरतलि कर स्वन

कृष्णस श्रान शिवुँ-शक्ति हुँदि प्रेमुँ पाजि
माजि भवाजि हुँदि पासुँ करेनाव
तमि पाजि पपि तस परमानन्दुँ धाजि
हा ग्वसाजि साजि सरतलि कर स्वन

* * *

हीमालुँ सुँज महादीवस तुँ वेष्णु भगवानस त्वता

इशारा अख कोरुथ खेत्य शीनुँ की क्वह

छु भासान फागणस मंज माघ तै प्वह
थ्यकान छिस दीव छुस शिव रात्री नाव

तमिय द्वह कामदीवुँय बेयि नोवुय ज़ाव

यि केँछा अस्य छि ज़ानान गौ ति व्वथपथ

व्रतुक व्रत छुय च्यतुक च्यथ छुय सतुक सथ
सदा शिवुन बजर अमि द्वह नोन गौ

यि ज़ाला लिंग कुय हाला वनुन प्यव

स्यठा बोड तीज ज़ाला लिंग नुँय कोर

स्वदर्शन चक्र बखशिथ येँम्य वेँष्ण वोर
ब्रहमा तै वेष्ण जी आव प्रदिक्षण दिथ

सु युथ ज़ोनुख तुँ त्युथ तिम गयि फल निथ

सु छुय पूरण मंदछ तस छै नुँ मंजूर

यिथै पोरुय अर्ध प्रक्रम शिवुँ सुंद पूर
परा शक्ति छु ख्वश आमुत य्वहै द्वह

यिवान लारान दिवान भख्यन घरन छ्वह

कुमारी रूँपुँ तस मानान छि सोरी

छि हेरँच भोग तस सोज़ान च्वपोरी
लदान छख भोग्य भोग्यन तोरँ फीरिथ

स्वखुक सामानुँ छख सोज़ान स्व शीरिथ

करान छख सारिनुंय गोंबुंच स्व बरकत
यहै बरकत शखुंति पातुंछ छे हरकत
वटक भारौ यिवान छुय सारिवुंय सान
स्यदुंछ हुंद सारिनुंय बखशन छु सामान

चवहर नागस अमिय द्रह बानुं नेरान
छि पाजिक्य बानुं पानै चरकुं फेरान
दपान येलि राजुं संदिमान रूद हुश्रार
स्यदथ प्रावुंन बनोवुन शंकराचार

शबे कदुंरो शबे मेराज मानान
तिमय यिम पानुं यथ क्वदरथ छि ज़ानान
दपान पथ कालि शिवस रूठ शक्ति
तिमन निश गयि यिमन ओस नेक बखती

मनस मंज ओस तस मानै मलाला
खयाला गोंस हावुन प्योस जलाला
प्रपंचुक फुटनि लोंग अदुं व्यवहार्य
कमिस रूज शक्ति करि हे कार्हबार्य

समिथ गयि पाँछ कारण मनुंनावुंख
परा शक्ति पनुंज शक्ति होंवुंख
न्यराकारस योहै कारा करुण प्यव
शिवुंय गौ शक्ति शक्ति गौ सदा शिव

यि सोरुय शक्ति नाथुंन्य छुस वनान गीथ
सु मायातीत खांदर छुम वनुन हीथ
अरूपन शिवुं रूपै रूप होवुम
त्वले मंज लोलुं सूतिय ललुं नोवुम

न्यरंजन शिवुँ सुँज शकला करिथ आम
द्वहस रातस ग्यवुन ह्यमुँ सुबुँ तै शाम
बुँ क्या वनुँ तति लूकन क्युथ सपुन मन
बन्योमुत ओस येति भगवान येजमन

स्यठा हीमाल येलि ख्वशहाल साँपुन
करुँनि लोग आर्ती नारायणस कुन
कोरुम चाजे दयाये सूँत्य युथ कार
परै लीला करै भावुक नमस्कार

* * *

हीमालुँ सुँज वेष्णु सुँज त्वता

गोकुलानंदुँ गूव्यंदुँ गूपालै
नादुँ ब्यंदुँ परमानंदुँ नंदुँ लालै

मदुँ कैटब मारुँवुनि द्वधुँ चूरै
मनुँ मंजलिस मंज करै गूर गूरै
गूपी नाथुँ बालुँ त्रिजगत पालै
नादुँ ब्यंदुँ परमानंदुँ नंदुँ लालै

यादवक्वलुँ के माधव रामै
ही न्यरमलुँ नेष्कलुँ नेष्कामै
गूर्य बालकन सूँत्य मारुँ वुँनि छालै
नादुँ ब्यंदुँ परमानंदुँ नंदुँ लालै

राधा कृष्णुँ चेंय नादा लायै
श्रीधरुँ प्रेमुँ स्वरुँ म्वरली वायै
रोज शामुँ बोज सामुँ वीदुँचि तालै
नादुँ ब्यंदुँ परमानंदुँ नंदुँ लालै

हृदयस मंज बसुँ वुँनि न्यथ लसुँ वुँनि
असुँ वुँनि असुँ वुँनि गरडस खसुँ वुँनि
नालुँ मति रटुँहथ मो दिम डालै
नादुँ ब्यंदुँ परमानंदुँ नंदुँ लालै

हनि हनि मंज आसुँ वुँनि वासदीवै
रासुँ मंडुल खेलुँ वुँनि कृष्णुँ जुवै
न्यथ सथ भासुँ वुँनि येमि कलि कालै
नादुँ ब्यंदुँ परमानंदुँ नंदुँ लालै

पंकज तनि वैजियंती मालै

अकि तरजुं नाल्य तै मोज दुबालै
संत छिय वलिथ बसंत दुशालै

नादुं ब्यंदुं परमानंदुं नंदुं लालै

कीशवुं शिवुं रूपुं नारायणै

वैन्य दिथ नोन गोख बिंद्राबनै
चोन ह्योत चोन प्रेमुं मस प्यालुं प्यालै

नादुं ब्यंदुं परमानंदुं नंदुं लालै

विदुर जुवनुय घरुं येति चाखुंय

भावनायि सूंत्य ख्योथ सिवमुत हाखुंय
कति गोख तति कोरवन हुंद सालै

नादुं ब्यंदुं परमानंदुं नंदुं लालै

द्रौपदी अकि कृष्णुं नावुं सूंत्य शामै

पादुं गयि तीत्या वस्त्र तुं जामै
यीत्य कंडिस दुरयोधनुं नुंय नालै

नादुं ब्यंदुं परमानंदुं नंदुं लालै

चाजि मायायि सूंत्य मंज द्वारिकाये

मथुरायि हुंजुं हिशुं लरि तै जाये
पादुं गयि अकि दमुं मंजुं कमि हालै

नादुं ब्यंदुं परमानंदुं नंदुं लालै

अजामिल ओसुय बोड भाग्य वानुंय

नैचविस ओस तस नाव नारानुंय
मरनुं विजि फूर तस तिय अकालै

नादुं ब्यंदुं परमानंदुं नंदुं लालै

श्री भगवानुँ छुख पानुँ प्रथ शाये
कुस वोत कुस वाति चाजि मायाये
म्वकलाव असि येमि मुहने ज़ालै
नादुँ ब्यंदुँ परमानंदुँ नंदुँ लालै

कृष्णस शिवुँ रूप्पुँ दर्शुन दिनुँ चुँय
सुय चुँय चुँय सुय कीवलुँ छुखनुँ जुँय
शामुँ प्रभातुँ रूफ हावतस कालै
नादुँ ब्यंदुँ परमानंदुँ नंदुँ लालै

* * *

वार्ता

त्वता बूज़िथ स्यठा ख्वश गोस कीशव
सु दोमूधर, सु वेशंबर सू माधव
सपुँजि स्यद्ध सारि नुँय मन कामनाये
दपान आसिस यि कोर चाजे दयाये
तिथै नारद जियन सेतारहँ वोयुन
यिथै पौठ्य नाद ब्यंदस नाद लोयुन
पदम पादस स्यदस सादस द्युतुन नाद
करुम प्रसाद चुँ छुख साधन हुंदुय साध

* * *

हिमालु सुँज नारायणस ग्वण कीर्तन

सथ प्वरण हँदि सत् ज़नै
हे सत् च्यत् आनंद गणै

न्यर ग्वणै न्यरंजणै
अथ रूपस बुँ क्या वनै

छुख चुँ सौक्षी च्यत चैनै
हे सत् च्यत् आनंद गणै

यनुँ प्यठुँ गोस चे निशि छ्यनै
जीवतिस मंज आसै ह्यनै

चंचल गोस मरनुँ तुँ ज्यनै
हे सत् च्यत् आनंद गणै

टोठहमनै चुँ अकी क्षनै
वासनायव निशि कति छ्यनै

युथुय ओसुस त्युथ बेयुँ बनै
हे सत् च्यत् आनंद गणै

सोन साधन छु व्यनै तुँ प्रनै
चेनुँ वुँन्य छिय चे मंज मनै

सूँत्य व्यचारँ सतू ग्वणै
हे सत् च्यत् आनंद गणै

चे शिव रूपस लगै पौरी
मूलुँ तलुँ छुख चुँ न्यराकौरी

वनि यिवान छुख मंज मनै
हे सत् च्यत् आनंद गणै

मोचुँरावतम पथ कुन सत् च्यत्
चावनावतम आनंद अमृत

तमि चनै चेंय हयू बनै
हे सत् च्यत् आनंद गणै

त्रुयुं वानी त्रैलूचनै
वनुं वनै बूजिथ कनै

अदुं बुतरात भेरेंथ स्वनै
हे सत् च्यत् आनंद गणै

च्यत् विमरषै छुख जोति रूफुंय
हृदयस मंज प्रजलान दूफुंय

सिरियुं प्रजल्यव अमि प्रजलनै
हे सत् च्यत् आनंद गणै

शक्तियुं सूंत्य आख व्वलसनै
हनुं वनै न्यरंजनै

लोदुथ कृष्णस सुय दयि धनै
हे सत् च्यत् आनंद गणै

* * *

शंभू महारज छु व्वतर दिवान

सतुक स्वर बूजिथुंय ख्वश गोस सत्ग्वर
प्रशुन बूजिथ व्वतर कौरनस बराबर
व्यनथ बूजिथ दोपुन तस न्यथ अन्यथ ज्ञान
चलिय अज्ञान प्रावख शिव न्यरवान

* * *

वैरागुक असली रूप

सत् ज़न बन मन कर कोलासुँय
बैस्ती मंज़ वनवासुँय रोज़

च्यतुँ किन्य भस्मुँ मल वल अँतलासुँय
सादुँ प्रक्रेच सँन्यासुँय रोज़
ओम शिव शंभू कर अभ्यासुँय
बैस्ती मंज़ वनवासुँय रोज़

वैषय त्यागुक धर माघ मासुँय
सत्संगुँ कुय व्वपवासुँय कर
आत्मुँ तीरथुँ मन नाव मुह मस कासुँय
बैस्ती मंज़ वनवासुँय रोज़

पान प्रजुँ नौविथ पानै मुँ आसुँय
सर्व संकल्पन ग्रासुँय कर
तलुँ प्यठुँ त्राविथ त्राव तलवासुँय
बैस्ती मंज़ वनवासुँय रोज़

श्री कृष्ण महाराजन ख्यूल रासुँय
गूपी शुराह सासुँय ह्यथ
बालुँ ब्रहमचोरी तोति नाव द्रासुँय
बैस्ती मंज़ वनवासुँय रोज़

महामाया ह्यथ रछुँवुन छु दासुँय
शिव नाथ हृदयावासुँय छुय
तोति तस नाव द्राव साधुँ सन्यासुँय
बैस्ती मंज़ वनवासुँय रोज़

कृष्णुं अँद्रिमि त्यागुं मल सूर सासुँय
न्यँब्रिमि रागुं व्वलासुँय कर
श्वकदीवस गौ यी वैनित्थ व्यासुँय
बेस्ती मंज वनवासुँय रोज़

* * *

पछ्छयन हुँज नेरु नुँच तयारी

करुँनि लग्य नेरु नुँच सारी तयारी

संभालुँनि लग्य पनुँज पनजी सवारी

वेषुँण जी वोथ क्वछे क्यथ ह्यथ सदा शिव

स्व ब्वद्ध कति अनुँ जि वनुँ तति हाल क्युथ गौ

प्रभाता शामुँरुँफ ह्यथ क्वछि क्यथ द्राव

जनानव वोन गटे मंजु गाश है आव

तिछुँय वौणी वनान मीनावती ओस

कनन अंदर गेछिथ म्वक्ती बनान ओस

* * *

मीनायि हुँद वनवुन

गोशुं प्पठु पोशनूलुं रुत छुख चुं बोलान
बोज़ान छसै ताकुं दारे प्पठ

सत्संगुं रंगुं बुलबुलुं छुख चुं शूभान
नेर फेर होशुं पोशुं बागन न्यथ
म्बवुत्तुं तुलि चाजि बोलि युस कन धारे
बोज़ान छसै ताकुं दारे प्पठ

आशुं तोशुं कथुं चाजि अमृत छे हारान
तिमनूय कथन छुम थोवमुत च्यथ
आस छुम धोरमुत अमृत धारे
बोज़ान छसै ताकुं दारे प्पठ

महाराजुं सूत्य सूत्य राजकुमारे
तोतुं ज़न द्राव वनहारे ह्यथ
कन थोव कथि चाजि मन गौ तारे
बोज़ान छसै ताकुं दारे प्पठ

हे त्रिभवन राजुं अमि थजि कारे
सौरस नेर चाकुं वारे क्यथ
शालमार बनोवुम मनुं चे वारे
बोज़ान छसै ताकुं दारे प्पठ

अतुं गतुं पानुं चे पतुं पतुं लारे
कृष्ण संसारस लोयिथ लथ
सथ छस चीज न्यथ सथ व्यचारे
बोज़ान छसै ताकुं दारे प्पठ

* * *

स्यहरुं गण्डनस प्यठ वनवुन

सौंथ आव बामुन द्राव ह्वछमुंचि हरि
बाला दरि ब्यूठ बाला मुकुन्द

भक्ति भावुं पखुं जरि सत् संगुं रंगुं चरि
साजि लरि प्यठ ब्यूठ राजुं हंसा
संकट हरि असि पानस ह्यू करि
बाला दरि ब्यूठ बाला मुकुन्द

अमृतुं कुय सग द्युत त्वलसी थरि
स्वयं त्वलसी लौज भगवानस
युस युस पोश फौल सुय सुय गव वरि
बाला दरि ब्यूठ बाला मुकुन्द

शक्ति कोतुर द्रायि भक्ति कोतर मरि
खक्ति पान वुफुं नावि आकाशस
छ्वह दिथ रात द्वह हंसस सँत्य भरि
बाला दरि ब्यूठ बाला मुकुन्द

तसुंघन चरणुं कमलन अँछ असि जरि
व्वज कति दरि असि गृह पीडा
द्वख हरि परम शाँती सँत्य मन भरि
बाला दरि ब्यूठ बाला मुकुन्द

दुपुं दूपुं कोफूर ह्यथ आलुं वोस नरि
ओम्कारुं रूपस छे दारुं पूजा
वैक्वठ नाथ आव नौन द्राव सानि घरि
बाला दरि ब्यूठ बाला मुकुन्द

तस रोंस यि केंछा भासि सोरुय खरि
कृष्णस क्या करि व्यवहारँ ब्वद्ध
शिव तुँ कीशव स्वरि येमि भवसहँ तरि
बाला दरि ब्यूठ बाला मुकुन्द

* * *

वनवुन स्यहरुं गण्डनस प्यठ

नन्दन बागस मंज न्यर बन्धन

सन्त बीठ्य चन्दन कुलि नुँय तल

च्यथ सिरियुं नोन द्राव मुह गटुं कति आस

कति आस मंज आकाशस ज़ांड

छाया छु वन्दन तुं माया छे अन्दन

सन्त बीठ्य चन्दन कुलि नुँय तल

चरणारब्धन कलुं छिस वन्दन

जसुदानन्दन परम गथ होंव

नेष्कामुं करमुं दानि धरमुं द्वद्ध छि मन्दन

सन्त बीठ्य चन्दन कुलि नुँय तल

दीवुं लूक ह्यथ तथ पद सत् श्रवणुँय

परम शिवुं नुँय कीशवुं नुँय कोर

मुह गोल चोल प्रथ चीजुक बन्धन

सन्त बीठ्य चन्दन कुलि नुँय तल

समोज व्यथानस कुनुय म्वख गौ

अन्तः स्वख गौ सर्व व्यवहार

द्वख चोल म्वख होव ब्रह्मानन्दन

संत बीठ्य चन्दन कुलि नुँय तल

अभेदुं भक्ति हुँच श्रवणुँय छि ग्यवनुँय

विवेकुं ज्यवुं नुँय छि ह्यवनुँय मोज

सृष्टी हुँज भेदुं दृष्टि छि वन्दन

सन्त बीठ्य चन्दन कुलि नुँय तल

शिवुं प्रेमुं आनन्दुं रसुं नुंय मस कर्य
देहवै यँद्रेय बे ह्यस कर्य
सत्संगुं भंगुं चनुं किय स्वगंधन
संत बीठ्य चन्दन कुलि नुंय तल

संसारुं मायि मंजुं न्यर माया कर
कृष्णस मुह हर हे हरी हर
चाजि रायि कुस वाति मायायि फंदन
संत बीठ्य चन्दन कुलि नुंय तल

* * *

Book Donated for
ASHRAM LIBRARY

श्री नारायणस त्वता

होशुं पोशनूलुं थव कन

वाणियुं वन हारि लो लो

राधा कृष्णुं कृष्णुं चुंय वन

लोलुगुं अश धारि लो लो

रंगुं किन्य तैस्य ह्यू बन

वाणियुं वन हारि लो लो

गवडुं कर मन चुं बिन्द्राबन

अदुं नेर बर्य तुं दारि लो लो

श्यामुं रूप वुछ हन हन

वाणियुं वन हारि लो लो

चाव वीदुं कामधीनि थन

भक्ति हुंदि चंड्य वारि लो लो

चथ बन आनन्द गण

वाणियुं वन हारि लो लो

प्रेमुं सूंत्य कर मन रूकमण

नाद लायुस प्यारि लो लो

भक्ति भावुं ईक बनि द्वन

वाणियुं वन हारि लो लो

नित्य ब्रंच रूपुं गूपियन

कोरमुत छु मन तारि लो लो

व्यापख श्री वासदीवन

वाणियुं वन हारि लो लो

बोज जसुदा छस ललुवन

मुह पूतनायि मारि लो लो

यिछि बबि द्वध चन सत ज़न

वाणियुं वन हारि लो लो

भक्ति मंज बन अरजन
 रथ बानसुँय सु लारि लो लो
 गलि कूधुँ दुरयोधन
 वाणियुँ वन हारि लो लो
 मनुँ वाजि कृष्णुँ नाव खन
 धाँहँ अलमास तारि लो लो
 किसि प्यठ छुस गोवर्धन
 वाणियुँ वनहारि लो लो
 हिंसायि कंसस मारन
 सूक्ष्मुँ दारि तरवारि लो लो
 माजि यिम राजुँ तस हिव्य ज्यन
 वाणियुँ वन हरि लो लो
 खट्य खट्य छु नोन भासन
 अँदुरिमि छ्यपुँ छारि लो लो
 च्यतुँ वुजमलि गटुँ कासन
 वाणियुँ वन हारि लो लो
 वृंदावनुँ कुय वन
 मन म्योन व्वश्चारि लो लो
 सब्ज ज़न लागि चरणन
 वाणियुँ वन हारि लो लो
 दास येति रास खेलन
 व्यास नारुद ति लारि लो लो
 बोलुँ नावन श्वकदीव ज़न
 वाणियुँ वन हारि लो लो
 यूगियव भूगिथ भूगन
 वोन हस ब्रहम चारि लो लो
 न्यरमल नेष्कल न्यरगवण
 वाणियुँ वन हारि लो लो

कृष्णस टोठ वेष्णार्पण
नतुँ येति क्या लारि लो लो
जोअ मंज तस सूहम अन
वाणियुँ वन हारि लो लो

* * *

कृष्ण भगवान सुँज़न बालुं लीलायन हुँज़ वखनै

बालक अवस्थायि लगयो बो
मनुं मंज़लिस मंज़ करै हो हो

बालुं कृष्णुं छालुं मारान यितमो
गूपालुं नंदुं लालुं सूँत्य नितमो
श्यामुं प्रेमुं द्वध दामुं दामुं चतमो
मनुं मंज़लिस मंज़ करै हो हो

त्रिज़गत पालुं नालुं मति रटथो
पूतनायि गालुँवुनि क्वछुं ह्यमथो
द्वधुं थजि चूरुं गूरुं गूरुं करयो
मनुं मंज़लिस मंज़ करै हो हो

जसुदानन्दुं पतुं पतुं यिमयो
गूपी नाथुं आलव दिमयो
राग छुम चोनुय ज़ाग हेमुं यो
मनुं मंज़लिस मंज़ करै हो हो

न्यथ गूव्यंदुं गूव्यंदुं करयो
असुँवुनि गिन्दवुनि जिन्दुं मरयो
बडि दयुं चाजुं बालुं खेलुं स्वरुं यो
मनुं मंज़लिस मंज़ करै हो हो

दयुं अवतार ह्यनुं सुँय लगुँयो
दिवकी निशि ज़्यनुं सुँय लगुँयो
श्री कृष्ण नाव प्यनुं सुँय लगुँयो
मनुं मंज़लिस मंज़ करै हो हो

वसुंदीवनिस निनुं सुंय लगुंयो
गोकुल ह्यथ यिनुं सुंय लगुंयो
जसुदायुं द्वध चनुं सुंय लगुं यो
मनुं मंजलिस मंज करै हो हो

श्यामुं स्वंदर वर्णस लगुंयो
जमनायि मंज्य तरनस लगुंयो
नाशुं रैस्यति बाशि करनस लगुंयो
मनुं मंजलिस मंज करै हो हो

पूतनायि दाम दिनुं सुंय लगुंयो
दाम दिथ प्राण ह्यनुं सुंय लगुंयो
प्रेमुंच थंज ख्यनुं सुंय लगुंयो
मनुं मंजलिस मंज करै हो हो

श्यामुं रूपुं जामुं पोरैनस लगुंयो
कामधीनुं रछनि नेरनस लगुंयो
गूर्य शूर्य ह्यथ फेरैनस लगुंयो
मनुं मंजलिस मंज करै हो हो

बन्सेरी शब्द त्रावनस लगुंयो
गुपियन बोजुं नावनस लगुंयो
दयि लोल गंजरावनस लगुंयो
मनुं मंजलिस मंज करै हो हो

गूर्य घरि मन मेलनस लगुंयो
ठठुं करनस गेलुं नस लगुंयो
रासुं मण्डुल खेलुंनस लगुंयो
मनुं मंलिस मंज करै हो हो

यँद्रस कूध गालुँनस लगुँयो
अन्तुँ रौस रूद वालुँ नस लगुँयो
गोकुलुँक्य लूख पालनस लगयो
मनुँ मंजलिस मंज करै हो हो

गोवर्धन धारुँनस लगुँयो
क्वह किसि प्यठ खारुँनस लगुँयो
राक्षस तुँ दूँत मारुँनस लगुँयो
मनुँ मंजलिस मंज करै हो हो

शुर्य खैटिथ थवनाव नस लगुँयो
वैछ्य चूरि निवुँ नावनस लगुँयो
बेयि तिथिय बनावनस लगुँयो
मनुँ मंलिस मंज करै हो हो

ब्रहमा मन्दुँ छावनस लगुँयो
गुल्य गँडिथ वदुँ नावनस लगुँयो
कृष्णुँ गीत ग्यव नावनस लगुँयो
मनुँ मंजलिस मंज करै हो हो

जसुदा पतुँ लारनस लगुँयो
थेकुँराविथ प्रारुँनस लगुँयो
गण्डनस कलुँ धारुँनस लगुँयो
मनुँ मंजलिस मंज करै हो हो

आंगनुँक्य कुल्य त्रावनस लगुँयो
दीवता बनावनस लगुँयो
आकाँश्य वुफुँनावनस लगुँयो
मनुँ मंजलिस मंज करै हो हो

अक्रूर ग्वतुं द्यावनस लगुंयो
पाजि मंजुं तन नावनस लगुंयो
आश्चर वुछिनावनस लगुंयो
मनुं मंजलिस मंज करै हो हो

कंसान्तकुं क्रूधुं निशुं शमयो
पंपोशुं पादन मीठ्य दिमयो
न्यथ चोन चरणामृत चमुंयो
मनुं मंजलिस मंज करै हो हो

कृष्णुं आस मुचुरावनस लगुंयो
वैष्णुं विश्व रूफ हावनस लगयो
जसुदा मैचुरावनस लगुंयो
मनुं मंजलिस मंज करै हो हो

* * *

वार्ता

वैशंबर ह्यथ विशेश्वर लोग पकाने
हलम भैर्य भैर्य लैगिस त्वलसी छकाने
पकान नैष्कल क्वछे ह्यथ द्राव न्यरमल
छकान औसिस लर्यव प्यठ्य ब्यल तुँ मादल
'हरस' साँपुन 'हेरी' 'कीशव' बन्यव 'शिव'
अद्वयतै रूँपुँ नारायण प्रकट गौ

* * *

शिवजी महाराजस तूं विष्णुं भगवानुं सुँज अद्वयतुं रूपुं अस्तुती

ओम सत च्यथ आनन्द गणुं टोठ
सत्य दीवुं सत्य नारायणुं टोठ

शमुं दमुं टोठ दमुं दमं व्वमुं टोठ
सत संगुं के समागमुं टोठ
सत् प्वरशन हुँदि सतजनुं टोठ
सत्य दीवुं सत्य नारायणुं टोठ

ईकुं अनीकुं म्वखुं अकि क्षणुं टोठ
शिव-शक्ति रूपुं द्वयि लक्षणुं टोठ
त्रेयि ग्वणुं सोस्ति त्रेयलोचनुं टोठ
सत्य दीवुं सत्य नारायणुं टोठ

न्यर ग्वणुं टोठ न्यरंजनुं टोठ
चेतन च्यतुं के चेननुं टोठ
अकि पोशुं व्यनुं चुँय मंज मनू टोठ
सत्य दीवुं सत्य नारायणुं टोठ

कीशवुं कीशवुं कीशवुं टोठ
हे शिवुं हे शिवुं हे शिवुं टोठ
गरडासनुं वृषभासनुं टोठ
सत्य दीवुं सत्य नारायणुं टोठ

न्यथ चोन व्रत धरुं श्रीधरुं टोठ
श्यामुं स्वंदरुं भस्माधरुं टोठ
स्वदर्शनुं शंकरशनुं टोठ
सत्य दीवुं सत्य नारायणुं टोठ

कौषी नाथुं मंज तैपूवनुं टोठ
द्वारिका नाथुं बिंद्राबनुं टोठ
अजोध्या नाथुं रामुं रादनुं टोठ
सत्य दीवुं सत्य नारायणुं टोठ

अमर नाथुं श्वभुं दर्शनुं टोठ
शिव नाथुं अमृतुं वर्शनुं टोठ
विश्व नाथुं कपाल मूचनुं टोठ
सत्य दीवुं सत्य नारायणुं टोठ

अनुगृह सैत्यन हनुंवन टोठ
पालुं वुनि नैपालुंकि बनुं टोठ
वैस्त्र रैस्यति वैस्तुर वनुं टोठ
सत्य दीवुं सत्य नारायणुं टोठ

घरि घरि क्षणुं क्षणुं द्यनुं द्यनुं टोठ
आकाशुं पातालुं हेरि ब्वनुं टोठ
पूर्व पछिमुं तै व्वत्रुं दक्षणुं टोठ
सत्य दीवुं सत्य नारायणुं टोठ

शामुं रूप्पुं टोठ प्रभातुं रूप्पुं टोठ
स्वप्रकाशुं रूप्पुं ही ज्योति रूप्पुं टोठ
कृष्णस शिवरोच हुँदि द्यनुं टोठ
सत्य दीवुं सत्य नारायणुं टोठ

* * *

नारायणस तु शिवस अद्वयतुं रूपं आराधना

परमीश्वर पूरक पूरणो
नारायणो नारायणो

अन्तः करणन हुँदि आभासो
चेतन ब्रह्मो च्यथ आकाशो

सौक्ष्मी प्वरशो च्यथ चैननो
नारायणो नारायणो

जगत् नाथो जनाधनो
ही न्यरमलुं नेष्कलुं न्यरग्वणो

न्यराकारो न्यरंजनो
नारायणो नारायणो

वीदांतन गेव्य मुँति गूव्यंदो
पान चे वन्दयो माधव मुकुन्दो

मुह मद गालवुँनि मधुसूदनो
नारायणो नारायणो

ज्ञानकि विज्ञानुं ध्यानकि ध्यानो
यूगुँकि यूगो प्राणुँकि प्राणो

मायायि हुंद अन्त चानि ज्ञाननो
नारायणो नारायणो

भक्ति हुँज सूँता बोँज हुँदि वनो
छांडान सूँत्य ह्यथ सतू ग्वणो

राम आत्म ज्ञान तै मनुँ लक्ष्मणो
नारायणो नारायणो

अन्तः अजोध्यायि मंज रात द्यनो
भावुक भरत छुय चैय पूजनो

सूँत्य ह्यथ श्रद्धायि शत्रुघनो
नारायणो नारायणो

श्वद्ध वासनायि हुंद विभीषणो
करवुन पान चेंय पथ अर्पणो

राघव, रघुनाथुं, रघुनन्दनो
नारायणो नारायणो

ध्यानुक हनूमान छुय तन मनो
नाव चोन पननिस हृदयस लेखनो

तमि सूँत्य मुह लंका जालनो
नारायणो नारायणो

गूपी नाथो जसुदानन्दो

गोर्न्यन सूँत्य भूगिथ आनन्दो

वोन दिथ नोन गोख बिंद्राबनो
नारायणो नारायणो

परम् ब्रह्मो परमानन्दो

भक्त्यन हौविथ चरणारब्धो

ज्योन तुं मरुन छ्योन चाने ज्यनो
नारायणो नारायणो

दिह अंधकारुं के मुह धारनो

राक्षस प्रक्रेंच हुँदि मारनो

सै म्वक्ती छै कंस रावनो
नारायणो नारायणो

न्यरारगल न्यरन्तर मनो

आनन्द अमृत चाव च्यत घनो

अजपा जपुं यज्ञुं जप जपनो
नारायणो नारायणो

निमेषु वुनमेषु प्रथ क्षणु क्षणो
सन्म्वख रोज़तम सनातनो

न्यत्रेच हुँजि त्रैच प्रत्रेच ब्यनो
नारायणो नारायणो

त्रन कालन हुँदि ह्यसुं फेरणो
तमि फेरनुं छुनुं कुन नेरनो

शिव रूपुं द्रुस चोन ओड प्रदिक्षनो
नारायणो नारायणो

मायायि म्युल करनुंकि तेलनो
तेलन तेलन चानि मेलनो

दासन हुँदे रास खेलनो
नारायणो नारायणो

दीवन तृप्ती चानी ख्यनो
पेत्रन युथ सग मूलन दिनो

प्यत्रन आप्या चानि तर्पनो
नारायणो नारायणो

थावर जंगम छुख हन हनो
दिह द्रष्टी कर व्यसर्जनो

कृष्णस रूप हाव वैष्णार्पणो
नारायणो नारायणो

* * *

हीमालुँ सुँज भगवानस त्वता

कर म्य पदमुँ पेत्रन नेत्रन मंज वास

रास खेलुँवुँन्य अथुँ रठ चठ मुँ अथवास

सिरियुँ रूँपुँ माया छेँ चौजी छाया

जिस माया का भेद किसी ने न पाया

पानुँ छुख मायायि मंज न्यर माया

वह माया देव लूक देखने आया

ब्रह्मा, वेष्ण, रौद्र, इंद्र, श्वकदीव, व्यास

रास खेलुँवुँन्य अथुँ रठ चठ मुँ अथवास

राधा कृष्णा रामा श्यामा

हरे नन्द लाला अरे नैष्कामा

ख्यखना केँह चखना अख दामा

गँजराखना मेति स्वदामा

दिथ विकास द्वख म्य कास व्वदास छुस बुँ दास

रास खेलुँवुँन्य अथुँ रठ चठ मुँ अथवास

जसुदा बैन्य बैन्य कलुँ च़ेय वन्दुँना

करमुँ कुँयि ध्यानुँ दानि धरमुँ द्वध मन्दुँ ना

हाल च़ेय ग्वंदुँ ना च़ेय सूँत्य गिन्दुँ ना

त्राविथ बन्धना दीवकी नन्दना

आसरँ चानि आस बृज बाँसी भास

रास खेलुँवुँन्य अथुँ रठ चठ मुँ अथवास

त्रिजगत पाला दीन दयाला

देवकी नंदना बाल गोपाला

हटि छिय कौस्तुभ नौल्य वन माला

अरे नन्द लाला बनसरी वाला

सासुं बजुं त्रियुं छै पतुं मैल्य मैल्य सास

रास खेलुंवुन्य अथुं रठ चठ मुं अथवास

अच्युतुं च्यतुं सुंय म्योनिस मंज गण

सत कर सत्य भामा मन रूखमन

राधा प्राण म्योन्य पानस कुन अन

ब्रंच गूपियन तनि हाव सन्म्वख तन

क्षणुं क्षणुं छ्यनुं मुं आस अख श्वास उश्वास

रास खेलुंवुन्य अथुं रठ चठ मुं अथवास

सोखियन स्वख दिथ दोखियन द्वख कास

तन स्वख मन स्वख दिथ सन्म्वख आस

शुराह कलायि सौंस छुय चोन आभास

शुराह सिंगार पूरिथ छुख व्वलास

शुरा छुख ह्यथ त्रियुं शुराह सास

रास खेलुं वुंन्य अथुं रठ चठ मुं अथवास

गूपी नाथुं चैय पतुं पतुं लारुंना

म्वरली शब्दुं मन न्यूथ कन धारुंना

गछुंखै छेनुं अकि क्षणुं पान मारुंना

शामस ताम चैय शामुं रूंपुं प्रारुंना

कामधीनुं ह्यथ यिखनुं तुं बनुं वनवास

रास खेलुं वुंन्य अथुं रठ चठ मुं अथवास

पोशनूलुँ सुँद्य पौठ्य लोलुँ ओल येरुँना
 वनुँ वनुँ कृष्णुँ गीत वनुँ वुँनि फेरुँना
 पीतांबरुँ की वस्त्र पोरुँना
 वृन्दावनुँ के वनुँ किन्य नेरुँना
 हीमाल छुस बुँ दास ह्यथ सुमीर कैलास
 रास खलुँ वुँन्य अथुँ रठ च़ठ मुँ अथवास

अकि नरि रूखमन तुँ बेयि नरि राधा
 अथुँवास करिथ छै कर म्य प्रसादा
 बन्सरी वायिवुँनि लायोय नादा
 हाविथ पादा गाल व्वपादा
 कृष्णस प्रत्यक्ष भास आस पास आस
 रास खेलुँ वुँन्य अथुँ रठ च़ठ मुँ अथवास

* * *

ग्वणुँ कीर्तन भगवानुँ सुँज

शंख चूर मारुँवुँनि मोर मुकटुँ धारुँवुँनि
पातालुँ पृथ्वी खारुँवुँनि लगुँयो
संकट हारुँवुँनि भवसरुँ ताहुँवुँनि
खगुँ खगुँ अवतार धारुँवुँनि लगुँयो
श्वकदीव सोमियस भीदुँ दृष्टि हारुँवुँनि
व्यासुँ म्वखुँ वीद व्यस्तारनस लगुँयो
वसिष्ठ सुँदि म्वखुँ द्वख न्यवारुँवुँनि
मूक्षि व्वपाय अवधारुँवुँनि लगुँयो
नारद मुनियस भक्ति रथि खारुँवुँनि
सामुँवीदस कन धारुँवुँनि लगुँयो
वाल्मीकि सुँजि जेवि अमृत हारुँवुँनि
राम कथा व्वशचारुँवुँनि लगुँयो
मृति विजि ध्यानुँ सान प्राण सन्दारुँवुँनि
कृष्णस दयनाव यारुँवुँनि लगुँयो

* * *

नारायणस अस्तुति

धर्मक धोर कोर खेत्य हार वनसुंय
रंगुं रंगुं पोशन कर्य अंबार
मादलि त्वलसियुं आरुवलि व्यनुंसुंय
नारायणुं सुंय छु जै जै कार

घरि द्रायि भावनायि सुंत्य दर्शनुं सुंय
चायि पर्वत राजुं नुय दरबार
आयि चैक्रीश्वरुं सुंय प्रदिक्षणुं सुंय
नारायणुं सुंय छु जै जै कार

सुमीर पर्वतुं क्वह खोत स्वनुं सुंय
स्यदुं पीठुं सारि वुंय प्रोव आधिकार
नाश गौ दारिद्रस मंज अकिस क्षण सुंय
नारायणुं सुंय छु जै जै कार

जै जै गूकलस तुं बिंद्राबनुं सुय
जै जै छु नोन द्राव कृष्ण अवतार
जै जै गूपियण तुं गोवर्धन सुंय
नारायणुं सुंय छु जै जै कार

जै जै छु वसदीवनिस च्यड ह्यनुं सुंय
जै जै छु दिवकी येमि चोल भार
जै जै छु द्वखुं अन्द बन्द रोजनसुंय
नारायणुं सुंय छु जै जै कार

जै जै छु बलबेद्रस अरजुन सुँय
 भक्ति मंजु यिम द्रायि सरदार
 जै जै छु तथ विश्व रूँपु दर्शनुँ सुँय
 नारायणुँ सुँय छु जै जै कार
 जै जै छु दशरथ राजुँनिस ग्वणसुँय
 माजि कौशल्यायि बारंबार
 जै जै अजोध्यायि रामुँ जू ज्यनुँ सुँय
 नारायणुँ सुँय छु जै जै कार
 जै जै रामुँ चंद्रस तुँ लक्षमण सुँय
 सीता मातायि जै जै कार
 जै जै छु भरतस तुँ शत्रुघनुँ सुय
 नारायणुँ सुँय छु जै जै कार
 जै जै छु वावुँ लूकुँ पालुँ नन्दन सुय
 येँम्य गौँड लंकायि लचि सूँत्य नार
 जै जै छु सुग्रीवस विभीषनुँ सुय
 नारायणुँ सुँय छु जै जै कार
 मन म्योन पतुँ लारि मधुसूदनुँ सुँय
 कामुँ क्रूधुँ कंसस दिवनावि मार
 होश कति हारि मारि मुह रावनसुँय
 नारायणुँ सुँय छु जै जै कार
 क्वह आव ब्रौठ द्वह वोत प्यठ खनुँ सुँय
 तार दियुँ करि पंचालस पार
 सतुँ ची थ्यथ थवि श्वद्ध च्यथ मनुँ सुँय
 नारायणुँ सुँय छु जै जै कार

वनवुन सोन गौ मंज त्रिभवन सुँय
थवुँ नुय तस प्यौ ग्यवनुय सार
मानुँ वुन छु भक्ति राजस न्यरधनुँ सुँय
नारायणुँ सुँय छु जै जै कार

हीतुँ अकि माया तीतुँ न्यर ग्वण सुँय
महामायायि सूँत्य व्यवाकार
शीतुँ पीतुँ वरणुँ स्वरणुँ टोठ रात द्यन सुँय
नारायणुँ सुँय छु जै जै कार

वनुँ वुन यि केंछा ओस प्रथ वनसुँय
तिय वातुँ नोव गूपियौ गुप्कार
वारुँ आव शंकराचार व्वलसनुँ सुँय
नारायणुँ सुँय छु जै जै कार

अनुगृह चोन मंज अनुँ सुँय तुँ धनुँ सुँय
वाँसि ताज पोशुँ नावि होशुँ व्यवहार
कृष्णस तोशि मंज पोशुँ वर्षनुँ सुँय
नारायणुँ सुँय छु जै जै कार

* * *

वार्ता

हरी हर द्राव ह्यथ महाराजुं महरेज
दयिय दै ओस तति गयि दयि गथ नैज
हयोतुख रूखसत खबर प्रथ जायि साँपुंज
शरण शिव जी सुँजिय मायायि साँपुंन्य
व्यमानस क्यथ पकान ह्यथ ओस्य भवानी
स्यदुँच ओठ ब्रोँठ ब्रोँठ आसस दवानी
करान ज़य ज़य ज़या ओसुँस दया ह्यथ
वितस्ता नरमदा गंगा गया ह्यथ
त्रिसंध्या रौंद्र संध्या पवनुँ संध्या
करान आसुँ ध्यानुँ तसुँदे श्रान संध्या
पकान अमृत छकान अमरावती ओस
ग्यवान तस गीत पानै सरस्वती ओस
शेयव तरफौ वनान तस भैरवी ओस
परान तस पाँछ तव पंचस्तवी ओस
स्वंदर वौणी स्वंदर लहरी परान ओस
महा माया महा माया करान ओस

* * *

शारिका रूँपुं पार्वती त्वता

स्मरैज चाजि सारी पाफ हारी
हारे पर्वतुँच हारिये

संकटुँ कट छख ही मुकट धारी
तीजुँ चानि प्रजलनुँ आव संसार
सिंहासन ची छै सवारी
हारे पर्वतुँच हारिये

गौरी नावस लगोय पोर्य पारी
चाव प्रेमुँ द्वधुँ चडवारिये
जाजिख अभिनव गुप्त आचारी
हारे पर्वतुँच हारिये

नैट्य, लछुँल्य, आकाशन, ग्रटन, तारी
नोन नीरिथ वोन चोन महिमा
परम शक्ति माजिख शंकराचारी
हारे पर्वतुँच हारिये

शिव-शक्ति रूँप जानिथ चववापारी
गुल्य गँडिथ वोननै म्य यारी कर
ह्यथ नखस नियनख मंज्य कष्टवारी
हारे पर्वतुँच हारिये

न्यथ सुमीरस तामथ लोर्य लारी
कति आस वातनुँच शक्ति तोर
पर्वतुँ प्रेदिक्षनुँ पाप न्यवारी
हारे पर्वतुँच हारिये

आदि शक्ति पानुं छख सर्व आधिकारि
पूजा करे वुंन्य सारी चैय
साध, संत, वैरोग्य, जूग्य ब्रह्मचोरी
हारे पर्वतुंच हारिये

चक्रीश्वर सुंय छु जै जै कारेय
सारिवुंय रोट दरबारैय सुय
स्यद्ध पीठुं प्यठुं गयि स्यद्ध ह्यथ सारी
हारे पर्वतुंच हारिये

अष्टादशुं ब्वजुं वुंय सूंत्य पर्वतुं
ह्यतुं कारे पुछ्य छख भतुं बांग्रान
सर्व व्यापख छख सर्व व्वपकोरी
हारे पर्वतुंच हारिये

कर्म लीखा छख पानुं परम शक्ति
करमुं सानि पनजी भक्ति लेख
क्रेति करमुं फल छख दिववुंज सारी
हारे पर्वतुंच हारिये

चाजि शक्ति सूंत्य जीव दीव व्यवहारी
चानि सूंत्य व्वल्सनुं आव संसार
चानिय सूंत्य छे सोज दुनिया दोरी
हारे पर्वतुंच हारिये

अजपा गायत्रिय जपुंहाथ अन्दरिय
श्री स्वंद्री यूगुं नेद्रे मंज
मनुं प्राणुं ध्यानुं तै ज्ञानुं व्यचोरी
हारे पर्वतुंच हारिये

परमात्मै रूप्पुं छख जगत्तुं च सौक्ष्मी
जितेंद्रिय येंद्रौक्ष्मी छख
प्राणु शक्ति सूत्तय छख पानुं व्यवहारी
हारे पर्वत्तुं च हारिये

पानुं छख यूगी तुं पानुं छख ज्ञानी
वाणी रूप्पुं भवानी छख
बोज सूत्तय ह्यस रट्टुं च व्यस्तारी
हारे पर्वत्तुं च हारिये

चामर लागुं होय पोश चौर्य चारी
चण्डी चुंय छख चेतन रूफ
च्यथ शक्ति छख चेनुं वुंज च्वपारी
हारे पर्वत्तुं च हारिये

मुह जालुं मंजुं वुफनुक व्वपाया
कर राजुं हंसुन साया त्राव
हंसुं नादुं सूत्तय तार येमि हंसुं दारी
हारे पर्वत्तुं च हारिये

हीमाल पर्वत्तुं राजुं कुमारी
पादन लगै पार्य पारिये
कृष्णुज भक्ति बोज कन धार्य धारी
हारे पर्वत्तुं च हारिये

* * *

शिव जी महाराजस त्वता

शक्ति रोस शक्ति प्रावुँ भक्ति रोस सम्भलुँ
भक्त वत्सलुँ चानि शक्ति पातुँ सूँत्य

नायकुँ फल दायकुँ जन्म सफलुँ
लेंबि मंजु फवलुँ पंपोशा ह्यू
क्वलुँ दूँप प्रजलुँ मंज क्वलुँ म्वकलुँ
भक्त वत्सलुँ चानि शक्ति पातुँ सूँत्य

कल्पनायि रोस वंदुँ है नेष्कलुँ कलुँ
कलुँ मालुँ धारुँ वुँनि कलुँ वालो
चमुँ प्यालुँ प्रेमुँ अमृतुँ जलुँ जलुँ थलुँ
भक्त वत्सलुँ चानि शक्ति पातुँ सूँत्य

चँद्रुँ चूँडुँ सिरियुँ नेत्रुँ हे कमलुँ कोमलुँ
शीन ज़न गलुँ मेलुँ ज़लुँ सुँय सूँत्य
न्यथ च्यतुँ वुजमलि मंज ज़लुँ प्रजलुँ
भक्त वत्सलुँ चानि शक्ति पातुँ सूँत्य

नेष्कल ठेहरुँ मंज मनुँ चंचलुँ च़लुँ
फलुँ रस्यति करमुँ परमुँ गथ प्राविथ
त्राविथ नरकस स्वर्ग मण्डलुँ डलुँ
भक्त वत्सलुँ चानि शक्ति पातुँ सूँत्य

श्रावन शीन ज़न ध्यानुँ जंगलुँ गलुँ
पानुँ कुनि रोजुँ न तुँ ज़ानुँ छुस ज़ल
चैय हिव्य जामुँ व्यरक्तुँ कीवलुँ वलुँ
भक्त वत्सलुँ चानि शक्ति पातुँ सूँत्य

नित्य कर्मुं च्यतुं किन्य भस्म न्यर्मल मलुं
नाव छुम कृष्ण हावतम शिव रूप
शत्रुं क्षयुं रूगुं निशुं अकि ब्यलुं पेत्रुं बलुं
भक्त वत्सलुं चानि शक्ति पातुं सूत्य

* * *

शिव तू वेष्णु सुँज अंद्यतुँ भावुँ महिमा

हयथ प्रभाथा क्वछि क्यथ आव
शामुँ रूप चाव घरँ सोन

रंग अँछन हुंद वुछ्य वुछ्य त्राव
छोँत तूँ क्रुहन नुँदुँ बोन
गाश सँत्यन गाश प्रजुनाव
शामुँ रूप चाव घरँ सोन

अख अँकिस निशुँ प्रथ अखा ज़ाव
असि कुनुय प्वरणा मोन
कुनि सुँय छिय लछुँ बैद्य नाव
शामुँ रूप चाव घरँ सोन

चेतन येँलि चेननुँ आव
अदुँ क्या गौ नोँव तूँ प्रोन
ज़ानुँ वुन ज़ान दिह दृष्टि त्राव
शामुँ रूप चाव घरँ सोन

प्रथ चीजुक सुय छु स्वभाव
प्रथ कुनि कुय दैव लोन
रूपुँ कुय रूप वावुँ कुय वाव
शाम रूप चाव घरँ सोन

प्राण ह्यू तस टोठ गंजराव
ल्वलि मंज भाग ललुवोन
च्यतुँ ऑनस म्वख पनुन हाव
शामुँ रूँप चाव घरँ सोन

अख चेतन ब्रहम नोन द्राव
वैष्ण कृष्णन शिव ज़ोन
आत्मस प्यठ छुस कुनुय भाव
शामुँ रूँप चाव घरँ सोन

* * *

करमुं कांडुक महत्त्व

न्यरवानुं परमुं पदुं धरमुं सभाये
करमुं काण्डुं चि कुकिलाये बूल

नामुं स्मरुं सौस रामुं कथाये
“वन्दे वाल्मीकि कोकिलम” बूल
जै श्वकदीवुं जि शोगुं भाषाये
करमुं काण्डुं चि कुकिलाये बूल

न्यथ पद कथ पथ जंगलुं चि जाये
शिवुं सुं जि राये सत्संगुं पाठ
सथ श्रवणुं य येलि वोन कोर व्वमाये
करमुं काण्डुं चि कुकिलाये बूल

बूजिथ शक्ति गयि मंज निद्राये
विचित्र बूद अदुं रूद संसार
रोव कोर समतायि सुं त्य ममताये
करमुं काण्डुं चि कुकिलाये बूल

ब्वद्ध कति वाति ईशरुं यछाये
होल तुं स्योद, सोम असोम रूद संसार
थूल गौ श्वकदीव तथ अवस्थाये
करमुं काण्डुं चि कुकिलाये बूल

प्रेदिक्षन दिनि अन्तुं रैस्यतिस द्राये
फीरिथ आये मंदछिथ बीठ्य
अर्ध प्रक्रम द्रुस्त छु यिछि पूजाये
करमुं काण्डुं चि कुकिलाये बूल

आदि मध्य अन्त रोंस करमुं लीखाये
लोग व्यूग नाना रूपुं किन्य ल्यूख
शिव शक्ति रूप तति मारान ग्राये
करमुं काण्डुँचि कुकिलाये बूल

तम्बलुं ना कर वुछुं मेलुं नुँच जाये
फरजानगी सूँत्य मस्तानगी
अस्य कुनुय होश ह्यथ द्वयि मंज द्राये
करमुं काण्डुँचि कुकिलाये बूल

जै जै छु होशुं हचि रँचि भावनाये
क्राल क्रोज कठ कँटिज छि सौक्षी अथ
छावुँल्य बूल्य शूभि यिछि पूजाये
करमुं काण्डुँचि कूकिलाये बूल

आशि तोशुं ज़ोम ब्राँदुँचि आशाये
चार्यर पूरयव तुँ सोर्य तोंग
चोँतरस छु कतुँर्य राजुँ हंसुँ साये
करमुं काण्डुँचि कुकिलाये बूल

थाव ब्रह्म वित प्वरषन हुँज त्राये
कर अखण्ड आकारँ राये स्वस्थ
वर कृष्णस दिथ न्यर वासनाये
करमुं काण्डुँचि कुकिलाये बूल

* * *

शिवरात्रि हुंद फलसफुँ

शामुँ छुय क्वछि सूमुँ सिरियुँ रूंपुँ प्रभात
शिवुँ रोच हुँदि द्वह छै सतुँरात

तेषस प्वनरवससुँय छु अभिज्यथ साथ
सिरियुँ वाति तथ मंजु लागि वेहराथ
अमृत वर्षनुँ फल दियुँ बुतराथ
शिवुँ रोच हुँदि द्वह छै सतुँरात

छोच प्रकृथ सोज होंगिज लोच ज्ञान
भव सहँ सदरस मंजु छै ईरान
म्वक्तुँ प्रावुँनाव त्राव शक्ति पातुँ बरसाथ
शिवुँ रोच हुँदि द्वह छै सतुँरात

वटक बोरव नाथुँ छुख चुँ शंभू नाथ
सोथी ह्यथ छुख साथुँय साथ
पालुँ वुनि सालुँ युँतुँ पालुँ वुँज छि शिव राथ
शिवुँ रोच हुँदि द्वह छै सतुँरात

बानुँ रोस बानुँ प्रावि स्वय गयि सतराथ
शक्ति प्रावि शक्ति हीन गौ शक्ति पात
फ्रस्तस तुँ वीरि बनि कल्पुँ वृक्ष तुँ पारिजात
शिव रोच हुँदि द्वह छै सतुँरात

भाग्यवान साविदान असि थव तुँ द्यन राथ
धरमुँ रोस कर्म हीनस कास घात
बानुँ रस्यतिस लद दयुँ धनुँ पहरात
शिव रोच हुँदि द्वह छै सतुँरात

यूगें ज्ञानुं शक्ति हुंद बखशुम म्य प्वरशात
शूभुराव जौचन मंज म्यौज जात
भ्रमुं शतरंज बाजि मंज म्य मुं कर चुं मात
शिव रौच हुँदि द्वह छै सतुरात

चेंय रौस पारुद ज़न छुस बुं द्यन तुं राथ
पानस कुन निम म्य दीना नाथ
शिव शक्ति पद मानुं शक्ति दिम साक्षात
शिव रौच हुँदि द्वह छै सतुरात

कृष्णस नालुं मति रठतुं ही शक्ति नाथ
यकजा मिलनाव पारस तुं धात
सुय गौ अनुगृह सुय गौ शक्ति पात
शिव रौच हुँदि द्वह छै सतुरात

* * *

शिवरात्रि महिमा

छै यीचन रौचनुँय मंज अख सतुँच राथ
यहै शिवराथ शिव नार्थुँज सतौ राथ
अमिय द्वह बानुँ रस्यत्यन बानुँ मेलान
छि कारण दीवता अथ रौच खेलान

अनान सौरी अमी द्वह क्रालुँ बनै
यिमन खांदर तिमन मेलान छि पानै
अमी द्वह छै यिवान बंड स्वंद ब्राँह्य
छें य्वसुँ काना बनान छस शूभ सौँह्य

बनान अलमास पारुद संगि पारस
यि द्वह पालुन छु रुत प्रथ कुनि दारस
शिकौरिस अमि द्वहै पाफ गयि माफ
क्वकरमुक शीन छुम त्रावुम प्यठै ताफ

शबे कदरो शबे मेराज मानान
तिमै यथ रौच यिम क्वदरथ छि ज़ानान
चवहर नागस अमी द्वह बानुँ नेरान
छु बानुक बानुँ पानै चरखुँ फेरान

छि सौरी तौयफुँ हावान पनुन कार
समान धरती, पवन, नभ, पोज तै नार
लगान अमि रौच गोबी कारखाना
बनान छुय बाँतिनस ज़ाहिर निशाना

छु पिछि शिव राच जै जै कार सोनुय
यूवहै क्रम मानुं वुंन्य सौरी छि प्रोनुय
अम्पुक छुय साध अभिनव गुप्त आचार्य
तमिय संसारें सैदरस सासुं बँद्य तौर्य

बुछिव येलि रूद संदिमान राजुं हुश्यार
स्यद्धथ ह्यथ गौ लोदुन अदुं शंकराचार
मुनीश्वर, बँड्य रँक्षीश्वर बँड्य तँपीश्वर
लिवान डुवान ग्यवान छिय तस ह्यवान वर

छि अँस्य अनूजान कति ज़ानौ अमिच वथ
अमिय बडि द्वह पासै कासि द्वरगथ
करँज ईकस अनीकस छुय चें द्युन नाद
करिय प्रसाद जन्मन हुँज चलिय व्याध

फकथ हुश्यार रोजुन बँड कथा छै
स्वरुन है कँह करुन है क्या कथा छै
हयकख नै कँह वटख व्यस्तार सुँय गिंद
वुन्योँदुर कर शुर्यन सूँत्य ज़ारें सुँय गिंद

बसाविय प्यत्र लूकस मूक्ष द्याविय
बनाविय भक्त लूकालूक हावी
डुल्यन डुल्यजन अन्दर भैरव छि सौरी
यिहिँज सीवा दिवथ लागिय च्वपौरी

यहै शिव राथ सोनुय घरें यियतन
यहै हेरथ विभूती असि दियतन

* * *

शिवरात्रि तुं शाक्त मत

शिवुं राच हुँदि द्वहुँ बीर्य निष्काम
असि वुछ क्वछुँ क्यथ सुबुँ ह्यथ शाम

सिरियुँ चँद्रम गौ अन्तर धान
तथ वेशुँ तारा मण्डलस सान
प्रोव शिव शक्ति कर्मुँ परमुँ धरमुँ धाम
असि वुछ क्वछुँ क्यथ सुबुँ ह्यथ शाम

जयि सोंस दयि राच हुँज शिव राथ
स्यदुँथुँय आयि ह्यथ अभिज्यथ साथ
मेचि गौ स्वन कत्रि बानन त्राम
असि वुछ क्वछुँ क्यथ सुबुँ ह्यथ शाम

सुय आव यस छुनुँ क्वल गुथुर क्राम
सूँत्य यस छुय भोय हलधर राम
दीवकी मौज कंसास्वर माम
असि वुछ क्वछुँ क्यथ सुबुँ ह्यथ शाम

शाक्तुँकि मतुँ चारिरँच चैज पाम
कैज लैज बोलुँनि गूव्यंदुँ नाम
हैज गयि स्येज यिछि बोँज प्रणाम
असि वुछ क्वछुँ क्यथ सुबुँ ह्यथ शाम

दक्षिणाचारुँ वामाचारुँ वथ
येँम्य होव तैम्य प्रोव ईश्वर गथ
स्यद्ध गौ राजुँ यूग प्राणायाम
असि वुछ क्वछुँ क्यथ सुबुँ ह्यथ शाम

फलदायक छि कल्प वृक्ष तँ पौर्य जाथ
थ्यकुँ जी छँ सारिनुँय यिछ शिव राथ
प्वक्तुँ द्राव शक्ति मारगुक यि फल खाम
असि वुछ क्वछुँ क्यथ सुबुँ ह्यथ शाम

कैम्य कोड युथ रुत आश्चर्य मथ
ख्यथ चथ शांत गयि सौरी ह्यथ
यूगुँ धर्म सालि वोत भूगुक बाम
असि वुछ क्वछुँ क्यथ सुबुँ ह्यथ शाम

हे रति' नाव शिव रात्रि प्यौ
तमि द्वह बेयि जिंदुँ कामदीव गौ
छुय 'रती' कामुँदीवजि त्रियि नाम
असि वुछ क्वछुँ क्यथ सुबुँ ह्यथ शाम

सर्व शक्तिमानुँज वुछ दयुँगथ
क्राल क्रौज कठ कैटिज छि सौक्षी अथ
स्वश गोस करँ यिय जि मानान छु आम
असि वुछ क्वछुँ क्यथ सुबुँ ह्यथ शाम

प्रथ चीजस शक्ति अथुँ लोग
सारिनुँय वाँत्य तन हेरुँच भोग
धर्म अर्थ काम मोक्ष हुंद पौगाम
असि वुछ क्वछुँ क्यथ सुबुँ ह्यथ शाम

सारिनुँय तूष्यतन सर्व शक्तिमान
पाँछ द्वह पूष्यतन अमि येमि सान
जाम ब्रांद रट्यतन जयि सोस जाम
असि वुछ क्वछुँ क्यथ सुबुँ ह्यथ शाम

राम चँद्रन रौमीश्वर पूज

फोज हयथ सेंद्रस तौर तुँ कथ रूज
अदुँ आव लंकायि जीनिथ राम

असि वुछ क्वछुँ कयथ सुबुँ हयथ शाम

सुबहस शाम गौ तुँ रातस द्यन

मन गौ तस कुन वुछ कृष्णन
गामस शहर तै शहरस गाम

असि वुछ क्वछुँ कयथ सुबुँ हयथ शाम

* * *

वार्ता

करिथ सतुँ राथ सौरी हरषुँ किन्य ओस्य
शिवाँ प्रेमुँक्य चवान ओस्य हरषुँ मस खौस्य
बुँ क्या वनुँ तति लूकन हाल क्युथ गौ
बनिथ येति ओस महराजुँ सदाशिव

बुँ क्या वनुँ तति लूकन क्युथ सपुन मन
बन्योमुत ओस येति भगवान येजमन
स्यठा रज्ज्वशहाल येति हीमाल साँपुन
करुँनि लोग आरुती नारायणस कुन

कोरुम चाजे दयाये सूँत्य युथ कार
परै लीला करै भावुक नमस्कार

* * *

शिव अस्तुति

बालुं छुय लालुं त्रेटि कनि वासुक हटि
हटि मेघुं वरुणुं चानि स्वरनुं आपदा

च्यतुं वुजुं मलि साजि परमुं आकाश खटि
अदुं कस चटि रागुं द्वीषुक वाव
गाश अनि मंज गटि आश थवि मंज त्रेटि
हटि मेघुं वरुणुं चानि स्वरनुं आपदा

त्रेशुं हचि तृष्णायि पान म्योन कोनुं नटि
यूत सौम्बरुम त्यूत व्वपद्योम लूभ
सैद्रस पोज खारुन गोम नटि नटि
हटि मेघुं वरुणुं चानि स्वरनुं आपदा

निम पानस कुन यिम दिम मटि मटि
पालना म्योजी मटि चेंय छै
असुं वुंज गंगा वसुं वुंज चें मंज जटि
हटि मेघुं वरुणुं चानि स्वरनुं आपदा

मनुं किस वनुं सुंय मंज पान युस खटि
हरें, हरुंम्बखुं चेंय प्रजुं नाविथ
पर तुं पान कुन वेंदि कति मुह सेंधि फटि
हटि मेघुं वरुणुं चानि स्वरनुं आपदा

वीरुं भद्रुं चोन जोर नै आसि कति म्वटि
मदुं कुय मद होस च्यतुं वगि तल
नखुं क्या वसि थपि द्वसि हुंदि नलवटि
हटि मेघुं वरुणुं चानि स्वरनुं आपदा

शस्तुर ब्योन ज़न नेरि मंज कुरकटि
यस छटि चानि लोलुं नारुच रेह
धारुकि द्वकुर्य दबुं सूत्य कालस चटि
हटि मेघुं वरुणुं चानि स्वरनुं आपदा

बेहोश कौरमुत छुस मुहबे लटि
सूरुं मति थपि बृषभुनि लटि सूत्य
येमि भवसरुं तरुं अकि नतुं अकि लटि
हटि मेघुं वरुणुं चानि स्वरनुं आपदा

अपरोक्ष रूपस क्या बडि क्या घटि
क्या छोटि क्या जेठि येम्य तूल पान
रावुं रावि क्या प्रावि क्या त्रावि क्या रटि
हटि मेघुं वरुणुं चानि स्वरनुं आपदा

दिह के यावनुं ख्वटि रंगुं स्वसि पटि
म्वलुं रस्यति छुय तावनुन बाज़ार
बे रंगुं लय चाजि लयि म्वखतुंच रटि
हटि मेघुं वरुणुं चानि स्वरनुं आपदा

पंचुं म्वखुं च्वपोर सुय वाति अकि व्वटि
युस ज़पि भीदुं रौस 'षडाक्षर' नाव
त्रन पोरन फेरि बिहथुंय मंज व्वटि
हटि मेघुं वरुणुं चानि स्वरनुं आपदा

कृष्णस छै मनि कामन दामन वटि
जगतुक क्रुडुं ज़ाल नतुं चटि तस
व्यरक्तुं पाद चान्य नै रटि कति वटि
हटि मेघुं वरुणुं चानि स्वरनुं आपदा

* * *

रचनाकारुँ सुंज त्वता महादीवस कुन!

न्यथ चौज पूजा शिव शंकरुँ करुँ
भस्माधरुँ दरुँ चोनुय ब्रथ

चानि अनुगृह रोस कति व्वदरुँ दरुँ
व्वछि तृष्णा छम येति रव्यथ चथ
संच चाजि रात द्वह हे दिगम्बर भरुँ
भस्माधरुँ दरुँ चोनुय ब्रथ

सेकि शाठा छुम दया सागरुँ घरुँ
जल छुम भासान फल आस ज्यथ
त्रेशुँ होत युथनुँ नागु नाथुँ अमरुँ मरुँ
भस्माधरुँ दरुँ चोनुय ब्रथ

कास्तम अमरुँ अजरुँ जरुँ जरुँ
भास्तम प्रत्यक्ष सिरियुँ ह्युव न्यथ
जौज गाश करतम चन्द्रुँ शेखरुँ खरुँ
भस्माधरुँ दरुँ चोनुय ब्रथ

चानि नावुँ सूत्यन पाफ हरुँ हरीहरुँ
पानुँ छुख पालना, सम्हार तुँ थ्यथ
भक्ति भावुँ चानि मन बागम्बरुँ बरुँ
भस्माधरुँ दरुँ चोनुय ब्रथ

चानि प्रेमुँ ओश छुम वसान बुजरुँ जरुँ
जन छम न्येत्रन मंज बाग व्यथ
भक्ति श्रुक्य चौनी हे परात्परुँ परुँ
भस्माधरुँ दरुँ चोनुय ब्रथ

वर दिम पूरुं पछमुं दक्षनुं व्वतरुं तरुं
मुह सेंधि व्यचारुं चि नावि क्यथ
कृष्णस गछतुं कीशवुं भवसरुं सरुं
भस्माधरुं दरुं चोनुय व्रथ

* * *

वार्ता

न्यरंजन वॉतिथुंय प्यव शुन्य थानस
निशाना कुस वनिय तस बेनिशानस

* * *

शिवजी तूँ पार्वती हुँदि नेरनुँ पतुँ छि लूख त्वता करान

रूपुँ रस्यति कुस ज़ानि कमि सनुँ नयि गोख
दयि गोख शुजुँ शयि ह्यथ विज्ञान
साधुँ सत्संगुँ चे न्यरनयुँ नयि गोख
जितेंद्रियि गोख लयस्थान

साधुँ नादुँ ब्यंदुँ वाणी हुँदि वनुँ गोख
नेष्कल मनुँ गोख न्यर अभिमान
आनंद भूगुँनि आनन्दुँ गणुँ गोख
न्यरंजनु गोख प्यठ शूज थान

अद्वयतुँ अच्यतुँ अन्तर ध्यान गोख
सूत्य चुँय ज्ञानुँ गोख ज़ाँज हुँज ज़ान
कीवलुँ पनन्यन निशि बेगानुँ गोख
शिव नाथुँ पानुँ गोख शक्ती सान

* * *

शिव जी तू पार्वती हुँज त्वता छि जारी

हरें हरें म्वखुं वन गोम ह्यथ व्वमाये
च्यथ आनंद गण गोम ह्यथ मायाये
हरें हरें म्वखुं वन गोम ह्यथ व्वमाये

राम रामुं रादन गोम ह्यथ सूंताये
नर नारायण गोम तपुंचे जाये
हरें हरें म्वख वन गोम ह्यथ व्वमाये

अंशसुंय कति छ्यन गोम तसुंजे माये
सूंत्य ह्यथ अर्जन गोम ह्यथ स्वभेद्राये
हरें हरें म्वख वन गोम ह्यथ व्वमाये

शब्दस पतुं कन गोम तसुंजे राये
वनुं क्या वर्तन गोम अथ शुज शाये
हर हर म्वख वन गोम ह्यथ व्वमाये

अन्धकार अर्पन गोम अहंताये
न्यर ग्वण दिथ ग्वण गोम व्वपासनाये
हरें हरें म्वख वन गोम ह्यथ व्वमाये

मिल नौविथ द्वन गोम दिथ निष्ठाये
द्रष्टि तल सत्जन गोम मंज धारणाये
हरें हरें म्वख वन गोम ह्यथ व्वमाये

सफल प्रेदिक्षण गोम घरि याम द्राये
विश्व रूप हन हन गोम कुजी त्राये
हरँ हरँ म्वख वन गोम ह्यथ व्वमाये

द्रष्टि तल त्रिभुवन गोम मंज तुययि
कृष्णस पतुँ मन गोम बोँज राधाये
हरँ हरँ म्वख वन गोम ह्यथ व्वमाये

* * *

Book Donated for
ASHRAM LIBRARY

अन्तस प्यठ छु रचनाकार हरि हरस त्वता करान

कृपा करतम हरी हरै

बुँ क्या करै जोर

लूसिथ प्योमुत छुस बुजरै

खोतमुत छुम बोड बोर

यथ पंचालस क्यथुँ पोठ्य तरै

बुँ क्या करै जोर

आरुँ छु ग्रजन व्वग्ने दरै

वारुँ छु करान शोर

छूवपुँ छु करान समन्दरै

बुँ क्या करै जोर

वैन्य वैन्य यैच छोच गोस अन्दरै

ननन ज़न छुस चोर

छवपि हुंद स्वख दिम यूगीश्वरै

बुँ क्या करै जोर

पखुँ छम जरि मचुँ छुम ज़रुँ ज़रै

बन्योमुत छुस मोर

हयून छुस खोरन हुँदि ओरचरै

बुँ क्या करै जोर

सन्म्वख रोज़तम श्यामुँ स्वंदरै

प्रभात हयू च्वपोर

पंपोशस युथनुँ द्वह लागि दरै

बुँ क्या करै जोर

आभासुँ चानि सूँत्य गोमुँत्य छि खरै

अन्तः करण चोर

म्य भास प्रकाशुं रूँपुं ईशरै

बुँ क्या करै जोर

त्रै ग्वण व्वलंगिथ छुख शंकरै

शक्ति चाजि छुस लोर

ओँगनिस दोगनाव कुनी वरै

बुँ क्या करै जोर

चवरोँग ज़न म्य मुँ फिर घरँ घरै

यि बाँज्य गार छा सोर

दुबारँ मुँ डाल प्यठुँ खलुँ दरै

बुँ क्या करै जोर

अन्दर चाँनिथ ज्ञानुँकि घरै

हावुम चूरिम पोर

तथ मंज रूजिथ आनंद भरै

बुँ क्या करै जोर

कृष्णस मुचुराव भावुँकि बरै

कुनी वरै तोर


युथ लरि चेंय ह्यथ बसि अमरै

बुँ क्या करै जोर

* * *

Book Donated for
ASHRAM LIBRARY





श्री अमरनाथ शिव दर्शन

प्रकाशक:

ललिता स्टोर्स

मंदिर मार्केट, शास्त्री नगर, जम्मू (तवी) १८०००४